




ألف الفارس

عبيد صالح





لتحويلك إلى الجروب أضغط هنا



لتحويلك إلى الموقع أضغط هنا


للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

رواية

زهرة الفارس
للكاتبة / عبير
صالح



حقوق الطبع والنشر محفوظة
لدار الأديب للطباعة والنشر والتوزيع

بسم الله الرحمن الرحيم

اسم الدار	دار الأديب للنشر والتوزيع
اسم الرواية	زهرة الفارس
اسم الكاتبة	عبير صالح
رقم الإيداع	(٢٠١٩/ ٨٦٢٤٤) بدار الكتب المصرية
الإخراج الصحفي	دار الأديب . (إنجي خيري)
الغلاف	من تصميمات الدار



إهداء

إلى روح أبي أسأل الله أن يتغمده برحمته الواسعة.
إلى أمي وإخوتي فهم خير عون لي.
إلى الصديق الذي شجعني على الكتابة وكان وما زال
نوراً يسرى وسط ظلمه حياتي أسأل الله له التوفيق.
إلى من علمني بالألا يوجد فراق حتى وإن وجد .



مقدمة الرواية

كلنا نعشق لكن هناك عشق ينتهي بمجرد نسمة هواء تمر عليه تقتلعه من جذوره وهناك عشق يخلد حتى وإن مر عليه عواصف زلزلته لكل قلب حكايته ولكل حكاية بداية ونهاية ربما تكون النهاية مؤلمة لكن لكل نهاية مؤلمة بداية جديدة ..

(بطلّة الرواية وجميع الأحداث التي مرت بها
من وحي خيال الكاتبه ولا تمت للواقع بأي صلة)



الفصل الأول

حلم وطموح

علم النفس الاجتماعي يهتم بكثير من الموضوعات الاجتماعية بما فيها الإدراك الاجتماعي كما يتبنى بالخطوات المنهجية في فهم السلوك البشري على النحو التالي:

الفهم، التنبؤ، التحكم. هنتكلم فيهم بالتفصيل في المحاضرة القادمة وبكده تكون انتهت المحاضرة اللي عنده أي سؤال يتفضل.

جاءها صوت والدتها قائلة: زهره يلا قومي اخوكي جاي من الكلية النهارده قومي ساعديني في الأكل

قالت زهره في ضجر: يا ماما صحتيني ليه طيب مش كنت اكمل الحلم وبعدين احنا في الاجازه بتصحيني بدري ليه

قالت فوزية بإستغراب: حلم ايه يا زهره قومي نتيجة التنسيق هتطلع النهارده

أومأت برأسها قائلة: حاضر يا ماما هقوم اهوه

تستيقظ زهره وتقف امام المرآه تنظر لنفسها فهي فتاه جميله رقيقه ذات شعر طويل وناعم وقوام ممشوق تتحدث لنفسها بإعجاب قائلة:

- ايه الحلاوة دي يا بت يا زهره والله ميلقش عليك غير إنك تبقى دكتوراه جامعيه قد الدنيا تذهب إلى الحمام تتوضأ وترتدى إسدالها تصلى وتناجى ربها يارب حقق لى أمنيتي يارب.

تنادى فوزية: زهره إنتى فين يا بنتي

أجابتها زهره : أبوه يا ماما كنت بصلي

تناولها وعاء قائلة: طيب خدي قورى البتجان أبوكى زمانه جاي من المدرسة واخوكى في الطريق مش هنلحق نطبخ

- حاضر يا ماما

- ماما لو نتيجة التنسيق طلعت جامعاه بعيدة عن محافظه الشرقية يعنى

بابا مش هيوافق



- مش عارفه يا زهره بس إحنا ممكن نحول لجامعه الزقازيق مش بعيدة عن الفدادنة يا دوب حوالي ساعة سفر
- ماما انا كتبت كليه أداب جامعه القاهرة اول رغبة
- قالت فوزية في دهشة: ليه كده يا زهره القاهرة بعيدة خالص
- زهره بإصرار: ماما جامعه القاهرة من أفضل الجامعات وانا نفسي أبقى دكتوراه في مجال علم الاجتماع كليه الآداب انا بحب علم نفس الاجتماع من وقت ما درستة في الثانوي وبعدين انا هسكن هناك
- قالت فوزية بإعتراض: تسكني في القاهرة لوحدةك إزاي طبعاً أبوكي مش هيوافق
- يا ماما حسن في جامعه أسيوط اشمنع هوة يعني
- قالت فوزية بضجر:
- حسن راجل يروح في أي مكان
- يا ماما
- بطلي غلبه يا زهره قومي شوفي مين جرس الباب بيضرب.
- تفتح زهره الباب تجد عماد ابن عمها تفسح الطريق أمامة قائلة:
- عماد إزيك عامل إيه اتفضل
- أجابها قائلاً: الحمد لله إزيك يا زهورتي إيه الحلاوة دي
- زهره في ضجر:
- إيه زهورتي دي أنا كبرت مش لسه صغيرة أنا عندي ١٨ سنة
- أيوه بقه هتخشى الجامعة
- صحيح يا ابن عمي احكيلى بقه على جامعه القاهرة هي حلوه صح أنت بقالك
- ٣ سنين هناك
- طبعاً حلوه بس بعيدة
- تأتى فوزيه من المطبخ تنظر إلى عماد قائلة: قولها يا عماد مالها يعني جامعه الزقازيق
- قال عماد مؤكداً كلامها: طنط فوزيه معاها حق يا زهره
- يدخل مراد إبراهيم والد زهره يحى الجميع قائلاً: السلام عليكم.
- يلتفت مخاطباً عماد: إزيك يا عماد أبوك عامل إيه
- عماد قائلاً: الحمد لله يا عمي بيسلم عليك



صوب نظره تجاه فوزية قائلاً: فوزيه أنا كلمت حسن يشوف نتيجة التنسيق وهو جاى في الطريق

دخل حسن فجأة ملقى السلام

قال مراد: أهوه حسن وصل أهوه حمد لله على السلامة يا حسن

أجاب حسن قائلاً: الله يسلمك يا حاج زهره جالها كلية آداب جامعه القاهرة

قالت زهره في دهشة: بجد يا حسن ده خبر حلو أوى أنت أحلى أخ في الدنيا

تغمز فوزيه لزهره قائلة: اقعدى ساكتة

قال مراد في دهشة: طيب مينفعش نحول آداب لجامعة الزقازيق أو أي كليه تانيه في الزقازيق القاهرة بعيدة ومش هبقى مطمئن على اختك هناك غير أنها مينفعش تبقى لوحدها

قال حسن مفكراً: مش عارف يا بابا بس في ناس كتير من البلد دخلوا خدمه اجتماعيه في كفر صقر معهد فاتح جديد وكفر صقر قريبه من الفدانة ممكن نحول لزهره بحيث تبقى حاجه قريبه

قامت زهرة من على الكرسي ووجها يملؤه الغضب ونظرت لحسن قائلة:

- لا طبعاً أحول لمعهد ليه أنا عاوزة كلية الآداب وكماني جامعة القاهرة والنبي يا بابا توافق

قال مراد: بس يا زهرة...

قال عماد مقاطعاً حديثهم: بعد إذنك يا عمى طالما زهره عاوزة جامعة القاهرة خلاص ومتقلقش أنا هاخذ بالي منها

مراد في قلق: أيوه يا ابني بس أنت خلاص فاضلك سنه وتخلص دراستك

قال عماد بإقناع: يا عمى زهره هتسكن في المدينة الجامعية والمدينة أمان يعنى بيبقى عليهم أمن ونظام وبتبقي جمب الجامعة على طول مش بعيد يعنى عن الجامعة

قالت زهرة: أيوه يا بابا عماد هياخذ باله منى متقلقش يعنى

أجابها مراد: طيب يا زهرة أدخلى أوضتك دلوقتى وسبيني أفكر

قالت زهره: حاضر يا بابا عن إذنك

أوقفها قائلاً: استني فين الأكل أنا ميت من الجوع



نهضت فوزية من مكانها قائلة: حاضر يا أبو حسن تعالى معايا يا زهرة
هم عماد واقفاً وقال: طيب يا عمى أنا هستأذن وزى ما قولتك متقلقش على زهره زهره
اختى وهاخد بالى منها كويس استنى يا عماد اتغدى معانا

- معلىش يا عمى هروح علشان أبويا يمكن يحتاج حاجه وهو لوحده
أنت فوزيه حامله أطباق الطعام وضعتها على السفرة وجلس الجميع يتناولون الغذاء.
في صباح اليوم التالي استيقظت زهره من النوم حملت أبريق الماء وخرجت تروى الورود
التي زرعتها بنفسها في البلكونة فهي فتاه رقيقة تعشق الورود وتحب رائحتها وتهتم بها جيداً
ولكى يأتي من يهتم بها ويعاملها كوردة رقيقة ويحافظ عليها.

بس بس

تلقت زهرة ناحية الصوت تجد جميله جارتهم واقفه في البلكونه المجاوره
تلقت إليها قائلة: جميلة إنتى بتعاكسينى ولا إيه افكرتى إنى حسن طبعاً حبيب القلب
قالت جميلة فى قلق: حسن وصل يا زهره
اجابتها قائلة: أبوة يا اختى وصل

- طيب انا نفسي أشوفه يا زهرة نادي عليه
تضحك زهرة قائلة: يا اما نفسي أجرب الحب ده وأشوف طعمة إيه
تسرح جميلة بخيالها وتقول: الحب ده بيبجى فجأة ومن غير مواعيد وعلى قد ما بيبكون
الواحد فرحان أوى على قد ما بيتعذب أوى لما ييفترق عن حبيبة
تنحنت زهره قائلة: إحم إحم طب بس بس كفاية كدة هروح أناديلك حسن ولو أن بيبقى
مخسر عليا لما حسن يشوفك أزرع الورد ويطلع عيني ويبجى حسن يحب ويقطف الورد
ويديهولك.

ردت جميلة لما قلبك يدق هتقدرى اللى إحنا فيه

- ماشى يا اختى أدينى منتظره يدق
دخلت زهرة غرفة حسن قائلة: يا حسن يا أبو على قوم كلم حبيبة القلب مستنيك على نار
في البلكونة



نهض حسن وهمس قائلاً: هوس هوس هتفضحي الدنيا يا سوسة اطلعي برة خليني أغير هدومي

قالت بتفكير: ماشي هطلع بس بشرط

- شرط شرط إيه يا سوسة
- حسن أنا عاوزة أروح جامعة القاهرة بلاش تقول لبابا تاني معهد كفر صقر صحيح قريب بس في الأول وفي الآخر معهد وأنا نفسي ا بقي دكتوراه جامعيه في جامعة القاهرة
- ماشي يا ستى ولو ان عماد واقف في صفك ومش محتجاني ها عماد على طول في صفك
- زفرت زهره بضيق وقالت: جراك إيه يا حسن بتلمح لإيه عماد زى أخويا يعنى زيك بالظبط

أجابها قائلاً: بس هوه مش باين عليه كده باين

قالت مقاطعه كلامه: حسن بلاش تلمح لحاجه زى كده تاني أسيبك بقه تغير وتطلع لجميلة خرج حسن إلى البلكونة نظر إلى جميلة مبتسماً وقال: إيه ده هو القمر بيطلع بالنهار نظرت جميلة إليه وقالت: مخصماك يا حسن علشان جاى من إمبراح ومجتش تشوفنى أنا استنيتك كثير إمبراح

حسن بود: معلى يا حبيبتي والله جيت من أسيوط تعبان خالص ونمت حقك عليا.

وقطف ورده من الورود التي زرعها زهرة وأهداها لها قائلاً:

- دعى الورده تتحدث عني وتقول ثلاثه أشياء
- ويا ترى إيه هما بقه
- أجابها بشوق: أولاً: سامحيني

ثانياً: وحشتيني

ثالثاً: بحبك

والله البت زهره أوقات بيبقى ليها فايده زارعه ورد أشكال وألوان

ضحكت جميلة قائله: وأنت كمان وحشتني يا حسن نفسي بقه الوقت يعدى علشان تيجي تقابل بابا وتخطبني



أوماً برأسه قائلة: هانت يا جميله كلها سنه واخلص الكليه وأجى أقابل عم محمود
إنتبهت للصوت من الداخل فجأة

- يا جميلة يا جميلة

قالت في فزع: يا لهوى ماما بتنادى يا حسن سلام دلوقتي

شاور حسن بيده ضاحكاً مودعاً إياها .

دخلت زهره غرفتها وجدت هاتفها يرن اجابته قائلة: ألو عماد

قال عماد: إزيك يا زهرة

قالت بهدوء: الحمد لله إزيك إنت

- متقلقيش يا زهرة إن شاء الله عمى يوافق

- يا رب يا عماد مش عارفة أشكرك إزاي إنك وقفت معايا وحاولت تقنع بابا
أجابها عماد ضاحكاً:

- تشكريني! إنتى متعرفيش إنتى غاليه عندى قد إيه

- شكراً يا عماد أنت كمان زى حسن بالظبط

قال في تعجب: حسن! ما عالينا هجيبلك تليفون حديث علشان أبقى أكلمك على الواتس اطمئن
عليكى

أسرعت قائلة: لا لا يا عماد بابا هيجيبلى ربنا يخليك

- ماشى يا ستى اللى يريحك سلام يا زهورتى

- سلام يا عماد

استرخت زهرة على سريرها بعد ما أغلقت الهاتف مع عماد سارحة في أحلامها الكبيرة مر
على مخيلتها كلام جميلة عن الحب تحدث نفسها قائلة:

هو أنا فعلاً ممكن أقع في الحب زى جميلة ممكن ابقى متعلقة بشخص قوى كده وبتمنى
أشوفة على طول.

أحست بأحد يربت على كتفيها التفنت وجدت شاباً وسيماً ذو بشرة خمرية وعينان واسعتين
يقف أمامها وفى يده وردة حمراء مد يده يهديها الوردة قائلاً: تشبهين الوردة كثيراً لا لقد
أخطأت التعبير بل هي من تشبهك كثيراً فى جمالك وورقتك

مدت يدها تلتقط الوردة خاجله من نظراته



يا زهرة يا زهرة إيه ده كلوا نوم هكذا قالت فوزية وهى تيقظ ابنتها

فركت زهره عينيها قائلة: ماما

- أيوه قومي ابوكى عاوزك

قالت زهره فى ضجر: صحتينى ليه بس يا ماما دلوقتى

قالت فوزية: قومي يا غلباوية

ونهضت مغادرة الغرفة تستوقفها زهرة قائلة:

- ماما مش عارفة بابا عاوزنى في إيه ولا تعرفى وافق على الكلية ولا لا

قالت بإقتضاب: لا معرفش قومي يلا

- طيب جاية وراكى على طول

سرحت زهره في الشاب الذي قدم لها الوردة في الحلم وفى كلامه وشعرت بشعور غريب لا تقدر على وصفه كل ما تعنيه إنها كانت فرحه كلما تذكرت تفاصيل الحلم

جاءها صوت والدتها مرة أخرى من الخارج:

- يا زهره يا زهره

إنتبهت زهره قائلة: يوه نسيت أن بابا عاوزنى أيوه يا ماما جاياه أهوه

نهضت من على السرير وجدت فوزية في الصالة نظرت إليها قائلة: أيوه يا ماما أومال بابا فين

أجابتها قائلة: في الأوضة ادخليلة جوه

زهره فى قلق: أوبا أنا بخاف من الإجتماعات المغلقة دى ربنا يستر

- ادخلى يا غلباوية وانتى ساكتة

دقت زهره بابا غرفه والدها وجاءها الصوت من الداخل: تعالى يا زهره أقعدى عاوز اكلمك

نظر مراد إلى ابنته وقال: قوليلى يا زهره إنتى علوزه تدخلى كلية الآداب لية وكمان فى جامعة القاهرة

قالت زهره: أنا بحب قسم علم الاجتماع يا بابا ونفسى أتعمق فية بعد الليسانس أعمل ماجيستير ودكتوراة وابقى دكتورة جامعية فى جامعة القاهرة



قال مراد بفرح: بنتى الصغيرة كبرت وبقي عندها أحلام وطموحات ثم أكمل

أنا موافق يا بنتى على كليه الاداب جامعه القاهره بس عاوز أنبهك يا زهره تاخدى بالك من نفسك ومنتقش في حد شبان وبنات مصر مش زينا هنا مش كل الناس كويسين ونثق في اى حد أنا واثق فيكى وهديك الحريه وعارف إنك مش هتستخدميها خطأ

هبت زهره وقبلت يد والدها فى فرح قائلة: ربنا يخليك ليا يا بابا ربنا يقدرني وأكون قد ثقتك يا بابا

سافرت زهره إلى القاهرة بصحبه عماد

التفتت زهره لعماد وقالت: عماد هو إحنا هنروح الجامعه على طول

أجابها عماد قائلاً: لا هنروح المدينه ترتاحى من السفر وبكره هجيلك الصبح أوصلك الجامعه

- عماد هي كليه العلوم حلوه أنت دخلتها برغبتك
- لا كنت عاوز طب بس علوم كويسه مش وحشه يعنى
- انت عارف بسمع ان مستقبل كليه علوم كويس وكمان كليه تجاره يعنى حسن أخويا ممكن يشتغل محاسب في شركه ولا حاجه أما يتخرج بس أنت لما تتخرج هتعمل ايه هتشتغل في معمل صح كده

- لا يا زهره هفتح معمل خاص بيا مش هشتغل عند حد
- بجد كويس ربنا يوفقك
- ويوفقك يا زهره .

قالت مديحة: فارس تعالى العشاء جاهز

أجاب فارس: حاضر يا ست الكل جاى

جلس فارس ومديحة على الطاولة يتناولون العشاء

نظرت مديحة لفارس في فرحة عارمة قائلة:

- مبروك يا حبيبى بكرة اول يوم شغل ليك في الجامعة عقبال ما أفرح ببيك كده يا فارس وتريح قلبى بقه

ضحك فارس قائلاً: الله يبارك فيكى يا ست الكل أكيد طبعاً هتفرحى بيا بس لما اخذ الدكتوراه الأول

قالت فى اعتراض: يا حبيبى ما انت اخدت الماجستير اتجوز وبعدين حضر للدكتوراه



قال فارس: يا ست الكل الجواز مقدور عليه ولا مش عوزانى ابقي كبير زيك ولا ايه
قالت فى قلق: يا فارس أنا مليش غيرك بعد أبوك الله يرحمه نفسي أشوف ولادك يا حبيبي
نورا بنت خالتك فاضلها سنه في الجامعه وتخلص كليه الإعلام ايه رأيك نعمل خطوبه وبعد
سنه يبقى الجواز

فارس فى ضجر: ماما نورا دى زى اختى لو بتحبينى متفتحيش الموضوع ده تانى
قام فارس من على طاوله السفرة مقبلاً يد والدته قائلاً: تصبحى على خير يا ست الكل.
فارس فارس نظر فارس بإتجاه الصوت وجد فتاه جميله بيضاء اللون ذات شعر اسود ناعم
كالحرير وعينين بنيتين وسط حديقه من الأزهار تحمل إبريقاً وترش به على الزرع
ابتسم فارس واقترب منها قائلاً: إنتى مين وعرفتى اسمي إزاي
ردت قائلة: الأرواح الصافيه بتتلاقي في اى وقت
سألها قائلاً: إنتى اللى زرعتي كل الورود دى
أجابت بإبتسام: أيوه ايه رأيك عجبتك؟

- جميله اوى انتى اسمك إيه؟
- اسمي زهرة
دخلت مديحه غرفة ولدها توقظة قائلة: فارس يا فارس اصحى يا حبيبي في معيد يتأخر على
الجامعة في أول يوم شغل أنت عاوز الطلبه تقول عنك إنك مستهتر
استيقظ فارس وجد نفسه في غرفته هي الساعه كام دلوقتي
أجابه قائلة: الساعه ٧ يلا قوم .

لم تتم زهره من فرحتها بالجامعه انتظرت حتى أتى الصباح ارتدت ملابسها الأنيقه جيبه
سوداء واسعه وبلوزة لونها بنفسج فاتح وصندل أسود اللون ووضعت القليل من الكحل
أول ما وقعت عيني عماد عليها دوى صغيراً وقال:

- إيه الحلاوه والجمال ده
قالت فى خجل: بجد شكراً يا عماد
ذهبت زهره إلى الجامعه بصحبه عماد ظلت زهره تنظر يميناً ويساراً فى دهشة قائلة:



الله يا عماد هي دى بقه جامعة القاهرة دى كبيرة اوى وفيها ناس كثير ايه ده البنات لابسه كده ليه

قال عماد محذراً: زهره في الجامعه هتشوفى العجب ملكيش علاقة بحد ماشى يا زهورتى

- ماشى يا عماد

قولتيلي بقه هتختارى قسم علم اجتماع صح

- أيوه طبعاً

- خدي الجدول أهوه جدول المحاضرات كل محاضره مكتوب مكانها فين ومعادها وأنا

هروح كليتى بقه لو احتاجتى حاجه كلمينى

- هعدى عليكى الساعه ٤ علشان أوصلك

- أنا خلاص عرفت الطريق وأقدر أروح لوحدى

زفر عماد في ضيق قائلاً: إنتى مسئوله منى يا زهره متتحركيش من الكليه إلا لما أجيلك

- طب ماشى يا عماد سلام بقه

دخلت زهره المدرج وجلست في الصفوف الأولى وأخرجت كشكول وعدد من الأقلام

من أولها كده هكذا قالت الفتاه المحاوره التفت إليها زهره وقالت:

- نعم حضرتك بتكلمينى

ضحكت الفتاه قائلة: حضرتك إيه يا بنتى إحنا زمايل مش لازم حضرتك دى

- أنا حنان من هنا من القاهرة أنتى اسمك إيه

قالت زهره باسمه: اسمي زهره

- اسمك حلو إنتى منين يا زهره شكلك مش من هنا

- أنا من الشرقية

- أحسن ناس والله اتشرفت بمعرفتك يا زهره

- شكراً ربنا يخليكى

عدل فارس من جاكيتة قائلاً: أنا خلصت ونازل يا ست الكل مش هتنزلى معايا

أجابه مديحة: لا يا فارس روح أنت أنا لسه قدامى ساعة

- طبعاً أنتى محدش يقدر يكلمك تنزلى براحتك وقت ما تحبى

ضحكت مديحة قائلة: طيب يلا لأحسن تتأخر وأنت عارف عميدة كلية الاداب عصبية

ومتشدده قد إيه



- طبعاً إنتى هتقوليلى سلام بقه يا ست الكل
- فى رعاية الله يا فارس
- انتبهت حنان قائلة: إيه ده الدكتور ده دخلت هتدرسلنا ماده إيه الدكتور ده
- أجابتها زهره: فلسفه يا حنان مكتوب كده فى الجدول ماده الفلسفة دكتور ده أمل اسكتى بقه أما تخلص المحاضره نكمل كلامنا.
- قالت حنان بعجب: إيه ده يا زهره يخربيتك كتبتى كل ده ورا الدكتور ده
- أجابتها زهره قائلة: أيوه وفيها إيه
- يا بنتى كل دكتور فى الجامعة بيبقى ليه كتاب مكتوب فيه كل حاجه بيشرحها
- معلىش يا حنان خلينى على راحتى
- ماشى يا ستى زى ما تحبى قوليلى بقه هتتخصصى فى إيه
- علم اجتماع طبعاً أنا بحب علم الاجتماع أوى ونفسي ابقى دكتور ده فى المجال ده
- دكتور ده مره واحده ماشى يا ستى ربنا يوفقك
- قالت حنان بدهشة ناظرة امامها: زهره بصى بصى مين القمر ده ده دكتور عندنا بس ده شكله صغير خالص شكله لسه متعين جديد ورينى كده الجدول فعلاً مكتوب بعد دكتور ده أمل دكتور فارس علم الاجتماع
- نظرت زهره لدكتور فارس وجدت شاباً وسيماً ذو ابتسامه جذابه وعيون واسعه
- قالت حنان: زهره سرحتى فى إيه
- قاطعتها زهره قائلة: بس يا حنان المحاضره هتبتدى.
- دخل فارس المدرج والقى التحية على طلبة قائلاً: السلام عليكم
- معاكم دكتور فارس المنشاوى هدرسلخوا ماده علم الاجتماع تقدرخوا تعتبرونى أخ كبير بالنسبه للماده بسيطه وسهله جداً
- أولاً: مفهوم علم الاجتماع حد عنده فكره يقولى إيه هو علم الاجتماع
- أيوه اتفضل اللى رافع أيدة هناك
- علم الاجتماع هو دراسه سلوك الإنسان بكل جوانبه
- كويس أوى برافو عليك
- قالت حنان بالحاح: زهره بت يا زهره



زهره بضجر: حنان خليني أركز في المحاضره

لفت إنتباه فارس الفتاتان وحين نظر أوقف المتحدثه قائلاً:

- اتفضلى قومى يا أنسه

نظرت زهره للدكتور وجدته ينظر إليها قائلاً: أيوه انتى اتفضلى قومى قوليلى كنا بنتكلم في إيه

وقفت زهره والتزمت الصمت ولم تتحدث

قال فى غضب: طبعاً هتعرفى إزاي وأنتى مش مركزه معانا خالص وبتتكلمى مع زميلتك

أجابت زهره بصوت خافض: أنا أسفه

- اتفضلى اقعدى وركزى معانا

جلست زهره مطأطأه الرأس يعترئها الغضب

وبكده تكون انتهت المحاضره ، خرج دكتور فارس من المدرج

نظرت حنان إلى زهره وقالت: زهره مالك إيه ده إنتى بتعيطى ليه يا هبله

قالت باكية: عاجبك كده يا حنان الدكتور هزأنى قدام المدرج كله

- معلش هو بس دكتور جديد وعاوز يرسم نفسه شوية متزعزعه حقك عليا أنا هنزل

الكافيتريا أجيبلك حاجه معايا

- لأ مش عاوزه حاجه

ذهبت حنان تاركة زهره غارقه تفكر فيما حدث وظلت تحدث نفسها قائلة: مكنش لازم

يزعقلنى كده قدام الطلبة

- الله بقه يا زهره مهو شافك وأنتى بتتكلمى وهوه بيشرح

- بس أنا حاسه إنى شوفت الوش ده قبل كده بس مش فاكده فين ولا عاوزه افكر

- إنتى بتتكلمى نفسك

نظرت بجوارها وجدت عماد قالت فى دهشة: عماد أنت جيت من زمان

انتبه لعينيها قائلاً:مالك يا زهره إنتى معيطه في حد ضايك قوليلى إيه اللى حصل

اجابته قائلة:

- لا أبداً ده الكحل ساح وخلصنى أدمع هقوم أغسل وشى



- ماشى أنا قولت أعدى عليكى في نص اليوم اطمئن عامله إيه في الكليه هبقى أجيلك أما تخلصى
- دخل فارس مكتبه بالكليه جلس على كرسية يعتريه شعور بالعظمه لتحقيقه جزء من أحلامه وتذكر فجأه زهره وهى تعتذر له
- قطع أفكاره صوت طارق على الباب
- رد فارس مجيباً اتفضل
- إيه يا عم الشياكه دى كلها جيت أباركلك على أول يوم شغل في الجامعة
- قام فارس مصافحاً: مين صاحبي وأخويا والله واحشنى يا أحمد عامل إيه اقعد اقعد احكيلى بقه أخبارك وأخبار بسنت
- قال أحمد فى قلق: والله يا فارس أنا حاسس انى اتسرعت في الخطوبه دى
- قال فارس: ليه بتقول كده يا أحمد بس
- أجابه أحمد قائلاً: على طول بنتخايق مع بعض على حاجات بسيطه وتافهه
- قال مطمناً: معلىش يا سيدي طول بالك شويه وربنا يهديكوا لبعض
- سيبك انت منى وقولى اخبارك إيه مش هنفرح بيبك ولا إيه
- هي الحاجة في البيت وأنت هنا ولا إيه مترحمونى شويه يلا قوم نكمل كلامنا في الطريق.
- تفوهت زهره عبر هاتفها أيوه يا عماد انت فين أنا خلصت
- جاءها صوت عماد من الجهة الاخرى: جاى عليكى أهوه اقفلي
- سألها عماد قائلاً: قوليلي بقه يا زهره عملتي إيه النهارده
- قالت ببرود: عملت إيه في إيه ولا حاجه اخدنا محاضرات وبس
- مكلمتيش حد ولا حد كلمك
- لا واحده كلمتني اسمها حنان كانت قاعده جنبني
- قالتلك إيه
- قالت زهره بحلق: في إيه يا عماد هو تحقيق ولا إيه
- عمى بيتصل



ألو أيوه يا عمى أنا كويس وزهره كويسه متقلقش هي معايا خلصت المحاضرات وهوصلها للمدينة أهى معاك يا عمى

- كلمى عمى عاوز يكلمك

أخذت زهره الهاتف من عماد مخاطبة أباهما قائلة: أيوه يا بابا الحمد لله أنا بخير أيوه يا بابا الكلية كويسه والجامعة جميله خالص حاضر هأخذ بالى من نفسي مع السلامة

قالت فوزية فى قلق: إيه يا أبو حسن زهره عامله إيه وحشتني البت دي

طمئننها قائلاً: كويسه يا فوزيه خلصت محاضراتها وعماد هيوصلها للمدينة

- ربنا يحميها وينجحها يا رب

- حسن فين يا فوزيه

- حسن ببشرب الشاي في البلكونة مش عارفه واقف طول النهار في البلكونة ليه

ناد مراد ابنة: يا حسن يا حسن

قال حسن: أيوه يا حاج جاى أهوه التفت إلى جميلة قائلاً:

باي يا جميله هكلمك فون لما أدخل أوضتى

قال مراد بجدية: هتسافر أسيوط امتى النهارده الأحد

أجابة حسن قائلاً: بكره يا حاج أصل النهارده كان في محاضره واحده قولت أريح في البيت وأبقى اخدها من زميلي

- ماشي يا حسن ربنا يكرمك وتخلص على خير.

تعالى نتغدا سوا النهارده يا أحمد هكذا قال فارس لصديقة أثناء سيرهما بالسيارة

رد أحمد قائلاً: لا يا عم نزلني هنا هروح لأحسن بسنت هتتصل وتعملي تحقيق

- ماشي يا سيدي

- يلا عاوز حاجه

- سلامتك يا احمد مع السلامة

مدت زهره يدها بالهاتف وقالت:

- اتفضل موبايك

قال عماد: ما تخليه معاكي يا زهره

- لا معايا بابا جابلي موبايل حديث أهوه



- طب هاتى انزلك الواتس علشان أبقي اكلمك اطمئن عليكى
- تكلمني ليه هو أنا هيجرالى حاجه ما انت وصلنتي الصبح ومروحنى دلوقتى أهوه
- يا غلباويه هاتى الموبايل من غير كلام كثير
- اتفضل الموبايل أهوه
- خلاص كده الموبايل اتظبط بس متديش رقمك لحد
- طيب يا عماد خلاص حفظت الوصايا العشر الحمد لله أخيراً وصلنا
- يا زهره أنا بخاف عليكى وأنتى مسئوله منى
- ماشي يا عماد يلا سلام بقه
- سلام يا زهره
- وصلت زهره إلى غرفتها بالمدينة وجدت فتاه تقف بجوار الشباك
- نظرت إليها زهره قائلة: إنتى مين
- أهلاً أنا مايسه زميلتك في الأوضه وكمان معانا هناء من الفيوم أنا من إسكندرية إنتى اسمك إيه
- ردت زهره قائلة: أنا اسمى زهره
- قالت مايسه باسمه: منين يا زهره
- من الشرقية
- أهلاً ناس طيبين الشراقوه بسمع عنهم كثير
- شكراً ربنا يخليكى
- إحنا أداب معاكي بردوا بس في قسم مختلف عنك علشان كده متقابلناش في الكلية أنا
- في قسم الفلسفة وهناء قسم علم نفس
- إنتى في قسم إيه
- علم اجتماع
- اجتماع كويس جداً قسم لذيذ وخفيف أنا هنزل استلم الغداء هتنزلى معايا
- لا اتفضلى أنتى أنا هريح شويه
- استلقت زهره على سريرها متذكره موقف دكتور فارس تجاهها من أول محاضره وراحت
- في نوم عميق
- وصل فارس لشارع صلاح الدين بالزمالك حيث مكان منزله الكبير دخل ملقى التحية قائلاً:
- السلام عليكم يا ست الكل ، إيه ده نورا إنتى هنا إزيك عامله إيه وأخبار الدراسة



قالت نوراً: الحمد لله يا فارس أنا قابلت خالتو في الجامعة وجيت معاها اساعدها في تجهيز الأكل. مبروك يا فارس على شغلك في الجامعة أنا فرحت أوى علشانك اجابها بفرح: الله يبارك فيكي عقبالك أما تخلصى وتشتغلى كمان أو مال ماما فين خرجت مديحة من المطبخ قائلة: دكتور فارس وصل عملت إيه النهارده قال فارس: الحمد لله يا ست الكل

نظرت إلية مديحة قائلة: طيب اقعد مع نورا على ما اجهز الأكل قال فى إقتضاب: نورا مش غريبه صاحبه بيت عن إنكو هدخل إرتاح شوية غضبت نورا لذلك فهي تحبه منذ الصغر ولكنه لا يبالي بمشاعرها نظرت إلى خالتها وقالت: أنا همشى يا خالتو أجابتها مديحة: استنى اتغدى معانا يا نورا

- لا اعذريني يا خالتو ماما لوحدها
- طيب يا بنتى سلميلى عليها مع السلامه يا حبيبتي.
خرجت نورا وهي باكية ركبت سيارتها وأخرجت هاتفها تقلب في صور فارس فهي عادة ما تحتفظ بصوره على هاتفها استقر نظرها على صورته تحبها كثيراً وأخذت تحدثها وكأنها شخص أمامها ،

فارس إلى متى تتجاهل مشاعري انتظرت كثيراً أن تشعر بعشقى لك منذ رأيت عيني هذه الدنيا أحببتك وكأنك وطنى لبيتك تشعر بى لبيتك تعلم عذاب قلبى ليتنى أستطيع إنتزاع قلبى من بين ضلوعى كى أتحرك منك فأنا مكبله بقيود عشقك كل الوجوه في نظرى لا تساوى شيئاً فقط وجهك هو من يزلزل كيانى ويبعث في قلبى البهجه والسرور سأنتظر ربما تشعر بى ربما يأتي اليوم الذي انتظره منذ سنوات طويله.

رن هاتفها فجاء أيقظها من ذكرياتها المؤلمه مسحت دموعها وأجابت الهاتف:

- أيوه يا ماما أنا جايه في الطريق ثم أكملت
- ماله صوتى يا ماما أنا كويسه جايه في الطريق سلام بقه علشان سايقه العربيه وأنا بكلمك

أغلقت الهاتف وألقته بجوارها وانطلقت بسيارتها.

قالت مديحة بغضب: يعنى دى معامله تعاملها لبنت خالتك البنت نزلت زعلانه



رد فارس بحق: ماما إنتى مكبره الموضوع ليه أنا جاى من الجامعه تعبنا واستأذنت ارتاح شويه فيها ايه

- ولا حاجه ربنا يهديك يا فارس
- اقفلى الباب وراكى وطفى النور هنام شويه وبعدين أقوم اتغدى.
وضعت فوزيه العشاء على السفره ووجهت نظرها نحو زوجها قائلة: يا أبو حسن تعالى يلا العشاء جاهز

قال مراد بقلق: فوزيه أنا قلقان على زهره

أجابتة قائلة: متقلقش عليها زهره جدعه وكمان عماد معاها

نظر إليها فى خوف : عماد دى اخر سنه ليه فى الجامعه وبعدها هتبقى لوحدها

- يا أخويا سلم أمرك لله بنتك متربيه ومش ممكن تغلط
- أيوه أنا عارف وواثق فيها بس مش واثق فى الناس اللى حواليتها.
إيه بتقول إيه على صوتك عاوزه المدينه كلها تعرف إنك بتحبنى تفوهت مايسة بتلك العبارة عبر الهاتف

نظرت إليها زهره فى عجب قائلة: مايسه يا مايسه

انتبهت مايسة لها قائلة: ثوانى يا علاء خليك معايا أيوه يا زهره

قالت زهره: من فضلك وطى صوتك مش عارفه أنام وبعدين يعنى خطيبك بيكلمك فى الليل متأخر مش عارف عندك كليه الصبح

قالت مايسة ببرود: خطيبى لا مش خطيبى ده الجو بتاعى

زهره فى تعجب: يعنى إيه الجو بتاعك؟

مايسة فى ضيق: جرا إيه يا زهره زميلى فى الجامعه وبنحب بعض

- إنتى فاهمه غلط يا مايسه أنا مجربتش الحب قبل كده بس اعرف ان اللى بيحب حد بيحافظ عليه ويخاف على مصلحته عموماً إنتى حره بس معلش وطى صوتك يا
تخرجى تتكلمى بره علشان بس عاوزه أنام ورايا جامعه الصبح
- حاضر يا زهره.

انتبهت جمالات لابنتها فور وصولها فذهبت إليها وقالت: نورا مالك يا بنتى جيتى من عند خالتك ودخلتى على أوضتك على طول



اعتدلت نورا في جلستها قائلة: أبداً يا ماما مصدعه بس شويه

نظرت إليها بتمعن قائلة: والصداع هو اللي خلاكي تعيطي كده يا بنتي بصي لحياتك ومستقبلك حرام عليكى نفسك

قالت في ضجر: تانى يا ماما هتفتحي الموضوع ده تانى الله يخليكى أنا مش ناقصه لو سمحتى يا ماما سيبينى لوحدى دلوقتى

- ماشى يا نورا ربنا يريح قلبك يا بنتى.

سألت حنان زهره قائلة: زهره في محاضره إيه بعد كده استنى كده مكتوب في الجدول علم اجتماع

فرحت زهره حين أخبرتها حنان أن المحاضره القادمه محاضره علم الاجتماع للدكتور فارس لا تدري لماذا فرحت برغم موقف دكتور فارس منها في المحاضره الماضيه.

قالت زهره: حنان أنا في حاجه مفهمتهاش وعاوزه أسأل فيها دكتور فارس

حنان مستفهمه: حاجه إيه يا زهره

قالت زهره: خصائص الظواهر الاجتماعيه

- مش عارفه يا زهره بصراحة مركزتش مع الدكتور وهوه بيشرحها بس ممكن تسألى

لما الدكتور يدخل ويبدأ يشرح أهوه الدكتور جه

- طب اسكتى كفايه اللي حصل في المحاضره اللي فاتت

دخل فارس المدرج وشرع فى شرح الدرس وانتبه للطالبة التى رفعت يدها نظر إليها قائلاً:

- أيوه الانسه اللي رافعه أيدها اتفضلى قولى سؤالك

هبت زهره قائلة: حضرتك قولت من خصائص الظواهر الاجتماعيه إنها مترابطه وكذلك

نسبيه يعنى إيه مترابطه ويعنى إيه نسبيه

سألها قائلاً: إنتى اسمك إيه؟

أجابت: زهره

تفاجأ قليلا من اسمها وصمت للحظه ثم رد قائلاً: بصي يا زهره الظواهر الاجتماعيه

مترابطه بمعنى قد يفسر بعضها البعض ويؤثر بعضها في الأخر يعنى كل منها بيمنح تفسير

للاخر ويؤثر على الآخر.

أما بقاء النسبيه يعنى تخضع لعوامل الزمان والمكان يعنى نسب متناسبه من الزمان والمكان.



تمام كده يا زهره وصلت

أجابت بإبتسام: تمام شكراً

- اتفضللى اقعدى

أنهى دكتور فارس محاضرتة وتوجه إلى مكتبه منشغلاً بالتفكير في زهره ولا يعلم لماذا تلك الفتاة شغلت تفكيره بهيئتها البسيطة

وهل لها علاقة بالفتاة التي رآها في منامة.

التفتت حنان لزهره وقالت: زهره أنا هروح اقعد جمب محسن

زهره بعجب: محسن مين يا حنان؟

- أهوه اللي هناك ده اتعرفت عليه أول امبارح ده شاب لذيق خالص

- حنان هو إنتى جايه تدرسى ولا جايه تتعرفى على الشباب

- في إيه يا زهره مالك بتكلمينى كده ليه

- أنا أسفه يا حنان أنا بس خايفه عليكى إنتى صديقتى الوحيد

- متقلقيش يا زهره.

السلام عليكم يا بنات هكذا قالت هناء فور وصولها غرفتها بالمدينة القت التحية على زهره ومايسة

نهضت مايسة قائلة: هناء أتاخرتى ليه يا بنتى

اجابتها هناء قائلة: معلش يا مايسة عقبال ما رتبت نفسي

- اعرفك بزهره آداب قسم اجتماع من الشرقيه هناء يا زهره اللي حكيتلك عنها

اعتدلت زهره فى جلوسها قائلة: اهلا وسهلاً اتشرفت بمعرفتك

أجابتها هناء باسمه: الشرف ليا يا زهره

قالت مايسة فى ضجر: إيه الزهق ده يا بنات متيجى نخرج أنا زهقانه أوى

عقدت هناء حاجبيها مجيبة: أنا جايه من السفر تعبانه ومش هقدر اخرج اخرجوا أنتوا

التفت مايسة موجهة كلامها إلى زهره: تيجى نخرج إحنا يا زهره

زهره فى عجب: تخرجى فين يا بنتى المغرب أذن من شويه

قالت مايسة: وإيه يعنى باقى ساعتين ونص على معاد قفل الباب هنكون رجعنا



اجابتها زهره قائلة: لا يا مايسه مقدرش اخرج خصوصاً في الوقت المتأخر ده
قالت مايسه مستغربة: متأخر مالك يا بنتى مقفلة كده ليه ما تفكى شويه
زهره فى ضجر: ولا مقفلة ولا حاجه يا ستى أنا كده كويسه بطبيعتى
قالت مايسه فى دهشة: طب عندى فكره يا بنات تيجوا نرقص

- أهوه ده اللى ناقص هكذا قالت هناء
ماشى يا هناء إنتى وزهره هقوم أرقص أنا خليكوا كده منكدين حد معاه أغنية حلوه على
الموبايل ارقص عليها

ضحكت هناء فى خبث مجيبة: معايا شيك شاك شوك
التفتت زهره موجهة كلامها لمايسة وقالت فى حدة: المشرفة لو جت وشافتنا هتزعق
واحتمال تعملنا إنذار

قالت مايسه ببرود: يا زهره مش هيحصل حاجة شغلى يا هناء الاغنية
أخذت مايسه تتمايل يمينا ويساراً على أنغام الموسيقى وتتنظر إليها الفتاتان في عجب
قالت هناء فى دهشة: ما أنتى شاطرة أهوه وبتعرفى ترقصى انا مبعرفش
قالت مايسه: أومال يا بنتى مش إسكندرانيه

التفت هناء موجهة كلامها إلى زهره وأنتى يا زهره بتعرفى ترقصى
اجابت زهره: معرفش الصراحه يا هناء مجربتش الموضوع ده

- طب ما تجربى يا زهره
- لا يا اختى أنا اتكسف يا هناء
- يا بنتى إحنا بنات مع بعض تتكسفى من إيه
- معلش وبعدين أنا ورايا بحث هقوم اعمله
- اجابتها مايسه فى ضجر: قومى يا اختى قومى هتفلى قوى.
- اجابت زهره على هاتفها قائلة: أيوه يا حسن الحمد لله أنا بخير أيوه الإمتحانات بعد أسبوعين
- حاضر يا حسن هذاكر كويس أنت امتحاناتك إمتى
- ماشى يا حسن ربنا معاك مع السلامه.



نظرت زهره إلى حنان قائلة: حنان عملتي البحث بحث دكتور فارس ما تيجي نروح نسلم البحث

حنان بضجر: لا لسه مخلصتوش يا زهره روحى انتى

قالت زهره: طيب ما تيجي معايا يا حنان

- معلىش يا زهره محسن كلمنى وجاى دلوقتى روحى انتى

- طيب مكتب دكتور فارس في أي دور

- الدور الثانی

- طب ماشى هروح لوحدى باى

إنتیه فارس لدقات خفيفه على باب مكتبه رفع رأسه قائلاً: اتفضل

دخلت زهره ونظرت إلى فارس قائلة: السلام عليكم دكتور فارس

نظر فارس لزهره عن قرب وكأن الزمن توقف عند تلك اللحظة وكأنها تمتلك سحراً في عينيها تجذب به من ينظر إليها انبهر فارس من جمالها وحيائها ورد قائلاً: وعليكم السلام اتفضلی

- أنا اسفه على الازعاج أنا جيت أسلم البحث

- لا أبداً مفيش إزعاج اتفضلی

أخذ فارس منها البحث ووضعه على المكتب همت زهره مغادره أوقفها فارس قائلاً:

- زهره إنتى من هنا من القاهرة

- لا حضرتك أنا من الشرقيه من قرية تابعه لمحافظة الشرقيه

- زهره لو وقف معاكى أي حاجه في الماده تعالى أسألى في أي وقت

- شكراً دكتور فارس عن إذنك

غادرت زهره لكن طيفها لم يغادر المكان رائحتها لم تغادر قط وملامحها بقت معلقه على جدار مكتبه تعجب فارس لما حدث له من تلك العيون الصافيه والابتسامه الرقيقه.

قالت حنان: زهره يا زهره مبرديش عليه ليه سلمتى البحث زهره

قالت زهره بعدم إهتمام: إيه يا حنان أنتى بتكلمينى

حنان فى إستغراب: بكلمك بقالى ساعة بناديلك وإنتى مبرديش مالك يا بنتى دكتور فارس زعلك ولا حاجه

زهره وكأنها فى عالم آخر: إيه يا حنان



- لا انتى مش معايا خالص
- معلش يا حنان هروح علشان تعبانة شويه
- طب مش هتستنى عماد
- لا عماد هيتأخر وانا عاوزة امشي دلوقتى سلام أشوفك بكره.
- التقطت جميلة هاتفها فى غضب وأجرت إتصالاً:
- حسن الحقنى يا يا حسن متقدملى عريس كويس وموافقين عليه في البيت اعمل إيه
- هتيجى إمتى علشان تكلم بابا بتقول إيه
- طيب الامتحانات هتخلص إمتى
- بعد شهر يا حسن طيب إزاي هقدر أقنعهم خايفه يغصبوا عليا
- طيب متتاخرش عليا يا حسن أنا هستناك
- مع السلامه يا حبيبى.
- قالت حسنية لابنتها: كنتى بتكلمى مين يا جميلة
- جميلة فى إرتباك: دى واحده صاحبتى يا ماما
- قالت حسنية: طيب يا جميله أقول لابوكى إيه لو تقدرى تقنعينى بس مش موافقه ليه دا
- عريس كويس وابن ناس
- قالت بأسى: ماما بالله عليك أنا حاسه انى مش مرتاحه وبعدين انتوا مستعجلين ليه بكره
- يجبلى أحسن منه
- حسنية بحزم: انتى خلصتى المعهد يا جميله يعنى خلصتى دراسه وكل اللى من جيلك
- اتجوزوا
- عقدت حاجبيها قائلة: أيوه يا ماما بس ده جواز ومينفعش نتسرع
- حسنية فى حنق: انتى حره يبقى اتصرفى مع أبوكى لما ييجى.
- وصلت زهره لغرفتها في المدينه وجدتها فارغه فصدقاتها مايسه وهناء ما زالوا في
- الجامعه فرحت لكونها ستجلس في هدوء فهي عاده ما تحب الهدوء
- سرحت بخيالها بعيداً لم تدري ما يحدث لقلبها ينبض بشده تسمع تغريد العصافير معلنه
- البهجه والسرور، تشم رائحه الأزهار في كل مكان ترى الجمال أمامها في أرجاء الغرفه
- فلا توجد عصافير ولا أزهار ولا يوجد جمال في تلك الغرفه ، وجد كل ذلك في خيالها



تلك اللحظة التي ينتظرها الكثير لحظه يخفق فيها القلب بشده وبلا وعى اللحظة التي تشعر بعدها بجمال الكون وصفاء القلوب فمن منا لم يمر بها.

رن هاتفها واعادها من خيالاتها

إجابة قائلة: أيوه يا ماما كويسه أوى الحمد لله باقى أسبوع على الإمتحانات

- حاضر بذاكر بابا عامل إيه ماما أبقي أروي الورد كل يوم متنسهوش لأحسن يموت
- مع السلامه يا ماما.

جلس فارس على طاوله غرفته يرتب بعض الأوراق ويدون بعض الأفكار لكي يتوصل لفكره موضوع لرساله الدكتوراه

وجد نفسه يكتب اسمها ويرسم حوله أزهار لا يدري لماذا تلك الفتاه شغلت تفكيره ومن تكون لتشغل تفكير فارس المنشاوى دكتور الجامعه وأحد أكبر عائلات حى الزمالك.

زهرة إزيك مشوفتيش حنان التفقت زهره وجدت محسن خلفها أجابة قائلة: أهلا يا محسن حنان راحت الكافيتيريا

نظر إليها بخبت قائلاً: زهره إيه الحلاوه دى تعرفى ان عيونك جميله

قالت بضيق: محسن من فضلك مسمحكش تتكلم معايا بالطريقه دى

- شعرت بيد تجذبها من زراعها بقوه مع صوت قائل: مين اللى انتى واقفه معاه ده وواقفه معاه ليه

قالت فى ألم: عماد سيب ايدى أنت اتجننت

عماد بإصرار: ردى عليا.

شاهد فارس عماد وهو يجذب زهره من زراعها أثناء سيره في بهو الكليه

قالت زهره فى ضيق: عماد سيب ايدى عاجبك كده اهوه دكتور فارس شافنى يقول عليا ايه دلوقت

قال عماد فى ضجر: مين دكتور فارس ده كمان

- ده دكتور علم الاجتماع وبعدين اللى كنت واقفه معاه ده محسن زميل حنان كان
بيسألنى عن حنان محصلش حاجه لكل ده أنا أقدر احافظ على نفسي كويس واحط
حدود للتعامل مع الناس

- أنا اسف يا زهره مستحملتش أشوفك واقفه مع حد أنا أنا...



- أنتى بنت عمى ومسئوله منى
- أنا مبعثش صغره يا عماد وأنت خلاص هتمتحن وبعدها هترجع البلد دى اخر سنه ليك أنا اقدر اعتمد على نفسى عن إذكك علشان اتأخرت على المحاضره
- لا تدري ماذا تفعل لكى تصلح ما حدث اعترأها الخوف والخلج فصورتها تدنت في نظر دكتور فارس ، طرقت زهره باب المدرج طرقات خفيفه
- جاءها الصوت من الداخل اتفضل
- دخلت وحين وجدته دكتور فارس نظرت إلى أسفل قد تأخرت على المحاضره ولم تكن محاضره أخرى محاضره دكتور فارس الذى شاهدها منذ قليل في موقف غير لائق
- استوقفها دكتور فارس قائلاً: اتأخرتى ليه يا انسه المحاضره بدأت من بدري
- لم تجب فقط اعتذرت على التأخير
- قال فارس ببرود: اتفضلى اقعدى بس بعد كده يا ريت نحترم مواعيد المحاضره ونركز شويه خلاص الامتحانات مبقاش عليها كثير المفروض مفيش اى حاجه تشغلنا عن المحاضرات والمذاكره.
- تمنت زهره ان تنشق الأرض وتبتلعها في باطنها جراء لما سمعت لقد تلقت درساً قاسياً ولم تقدر على إصلاح الموقف فالتزمت الصمت
- قالت حنان فى ضجر: هو الدكتور ده مستقصدك ولا ايه يا زهره
- زهره فى ضيق: بس يا حنان أنا مش ناقصه
- مالك يا بنتى
- أنتى السبب يا حنان محسن جه يسألنى عنك شافنى عماد مسكنى من ايدى بيقولى مين ده وقتها كان دكتور فارس معدي بالصدفه مش أقولك بقه على نظراته ليا وقتها
- يا لهوى يا زهره فعلا موقف محرج طب هتعملى إيه
- مش هعمل حاجه زى ما تيجى بقه
- اخرج فارس هاتفة من جيبة وأجرى إتصلاً بصديقة ألو ، أحمد أنت فين عاوزك مفيش متضايق بس شويه
- أنا خلصت المحاضره وقاعد في المكتب هتطلع ولا انزلك انا ونمشى سوا
- طب تمام هنزلك سلام



قال فارس بعدما سرد على أحمد ما حدث: بس يا سيدى أنا اللي مجننى مش عارف متضايق
ليه يا أحمد

غمز أحمد بعينية قائلاً : كده تبقى وقعت يا معلم

فارس مستفهماً: وقعت؟ وقعت ازاي يعنى؟

- مش عارف وقعت ازاي يا فارس
- عارف بس إيه الفايده ما أنا شوقتها الصبح مع واحد وكمان شكله واخد عليها
- يا عم ما يمكن تكون أنت فهمت الموقف غلط ويمكن يكون مجرد زميل عادى يعنى طالما أول مره تحس إنك مشدود لحد أوى كده متضيعش الفرصه أنا هقولك تعمل إيه يا ريس.

قالت زهره مستفهمة: دكتور فارس حضرتك وزعت اسمى من ضمن أسماء الناس اللي طلبت منهم يعيدوا البحث أنا عملت المطلوب وجيت افهم النقص فين علشان اضيفه ولا حضرتك عاوزنى اعيد البحث كله؟

قال فارس بحق: البحث بتاعك كويس هو بس ناقص حاجات بسيطه تتضاف بالنسبه للنظريه والتطبيقات لو كنتى مركزه مكنش هيفوتك حاجه زى كده اتفضلى على محاضرتك همت مغادره أوقفها قائلاً: زهره إنتى طالبة مجتهده أتمنى الموقف اللي شوقته إمبراح ميتكررش تانى

قالت معذرة: أنا اسفه مش هيتكرر تانى بس اسمحلى أوضح لحضرتك سوء الفهم اللي حصل....

قال فارس بعدما سمع ما قالت زهره: تمام يا زهره دلوقتى وضحتلى الصوره ركزى بقه في الماده كويس المحاضره الجايه هتكون اخر محاضره قبل الامتحان خدي رقم تليفونى علشان لو احتجتى حاجه قبل الامتحان

قالت بإمتنان: شكراً لكرمك يا دكتور فارس عن إذن حضرتك.

نظرت هناء إلى زهره قائلة: زهره مش هتنزلى علشان تستلمى الغدا الوجبه هتروح عليكى

- زهره. زهره بكلمك سرحانه في إيه انتبهت زهره قائلة: هناء أيوه بتقولى إيه
- بقولك الغدا يا بنتى



- ماشى يلا نروح سوا أومال مايسه فين لسه مجتش
- مايسه يا ستى مع علاء الجو بتاعها
نظرت زهره إلى هناء: هناء إنتى حبيبتى قبل كده؟

قالت هناء: بصى يا ستى اللى يقدر يفيدك أكثر في الموضوع ده مايسه

- أنا عاوزه أعرف وجهه نظرك إنتى في الحب مايسه فاهمه الحب غلط عمرك
حبيبتى؟

سرحت هناء بخيالها وأجابتها قائلة: ماذا تريدان أن أخبرك هل أخبرك ان العشق كالموت
يأتي فجأه وبدون سابق إنذار فحينما يدق القلب تصبح للحياه معنى آخر حيث تدق نغمات
الفرح على أوتار الحياه كما يتطاير رحيق الأزهار في الهواء منثراً عبيره في الأرجاء حين
يصاب القلب بمرض العشق فلا شفاء إلا بقاء المحبوب.

قالت زهره: إيه الفلسفه دى يا بنتى حقك تدخلى قسم فلسفه زى مايسه يعنى جربتى؟

أومأت رأسها قائلة: أيوه يا اختى بحب ابن الجيران وبتمنى ربنا يجمعنا سوا

- إن شاء الله يا هناء إنتى تستاهلى كل خير
- إنما انتى بتسأللى كل الأسئلة دى ليه يا زهره إنتى بتحبنى يا بت
- والله يا هناء مش عارفه كل اللى اعرفه إنى مبسوطه أوى وأول مره أحس بحاجه
غريبه زى دى لما بشوفه
- تبقى بتحبنى هو بيبدأ بلخبطه وفرح وحجات كده يوووووووه مش هنخلص من
مواويل الحب دى لو فتحنا فيها.
شعر فارس بفرحه عارمه حين أوضحت له زهره موقفها مع عماد وكأنه كان ينتظر تبرير
للموقف

دكتور فارس سرحان في إيه يا ترى

انتبه فارس لصوت والدته فاعتدل في جلسته قائلاً: تعالى يا ست الكل

نظرت قائلة: بتفكر في إيه

قال فارس: برتب خطه لرساله الدكتوراه

- ربنا يوفقك يا حبيبى
- تسلمي لى يا ست الكل
جلست زهره تستذكر دروسها وامسكت هاتفها ألو



- حنان عامله إيه في الماده الامتحان بعد بكره
أجابت حنان: اهوه يا زهره بحاول ألم كل حاجة

قالت زهره: طيب أنا في حاجات مش واضحة بالنسبالي في نظريه التعلق
ضحكت حنان قائلة: أنا كمان مش فهمها فكك منها
زهره في عجب: إنتى كمان مش فهمها ثم أكملت

- يا بنتى افكنى منها إزاي افرض جت في الامتحان يا فالحه
- طب طب خلاص سلام

استنشقت نفساً عميقاً وأسندت رأسها على الحائط وكأنها تستريح من عناء مشوار طويل جال
بخاطرهما الإتصال بدكتور فارس أصابتها نار الحيره وقعت بين عالمين مختلفين ما بين
سماع صوته من عدمه

لم يصدق حين وجد رقم غريب يرن على هاتفه وكأن قلبه شعر بأنها هي زهره ذات العيون
الساحره

ألو

- السلام عليكم دكتور فارس أنا زهره

قال فارس وقد تسللت الفرحة لقلبه: وعليكم السلام أهلا زهره أنا سعيد جداً بإتصالك

قالت بخجل: أنا أسفه على الإزعاج بس في حاجه في الماده مش واضحة بالنسبالي وخفت
تيجى في الإمتحان

- ولا إزعاج ولا حاجه إيه اللي واقف معاكى

- نظريه التعلق وأنواعه

- طيب ركزى معايا نظريه التعلق هي نظريه تصف طبيعه العلاقات بين البشر مثلاً

كتعلق الطفل بامه فتعد بالنسبه له كل من حوله ولا يستكين مع اى شخص آخر

نيجى بقه لأنواع التعلق هما نوعين

أولاً: التعلق الطبيعى أو السوي: يعرف بأنه دافع الحب الأساسى فهو سياق محدد نتيجته
عملية إجتماعيه تختص أشخاص وليكن مثلاً في محيط العائله والأصدقاء.

ثانياً: التعلق المرضى: حاله عاطفيه تحدث لبعض الأشخاص وهي مرتبطه أكثر بالحياة
اليوميه ونمط تصرفاتنا مع الأشخاص مثل التعلق بأحد الأصدقاء بشده



والذين يعانون من التعلق المرضى يجدون صعوبة في تقدير الذات ويلجأ هؤلاء الأفراد إلى أشخاص يحتاجون رعايتهم ومنحهم القوة اللازمة لهم وأسباب التعلق المرضى راجعه للظروف والنشأ والتربية.

- تمام كده وصلت

- أيوه فهمت الحمد لله شكراً

قال مستفهماً: في حاجه تانيه واقفه معاكي في الماده

أجابت باسمه: لا الحمد لله كده كله تمام مش ناقصني حاجه أنا بس مش عارفه متوتره ليه

ده أمر طبيعي يا زهره علشان أول سنه في الجامعه لكن طالما لامه خيوط الماده متقلقيش اتكلى على الله وهستنى تطمينيني بعد الإمتحان

حاضر شكراً دكتور فارس

بالتوفيق يا زهره في رعاية الله.

قالت مايسة مخاطبة زهرة: كنتى بتكلمى مين وسرحانه كده

انتبهت زهره لقدوم مايسة : مايسه إنتى وصلتى إمتى

مايسة بمكر: اسم الله عليكى لسه واصله حالاً ودخلت قدامك ها بقه مين

أجابت زهره بإرتباك: مين إيه ده عماد ابن عمى

- وعماد اللي مخليكى مش على بعضك كده

- أنا لا أبدأ ده بس توتر علشان الإمتحانات

- توتر طيب ربنا يوعدنا بالتوتر على طول

- بس يا مايسة خلىنى اراجع الماده

نظرت زهره في كتابها لكن عقلها في مكان آخر ظلت تحدث نفسها

هو أنا ليه بفرح أوى لما بتكلم معاها ولية كدبت على مايسه وقولت لها إنى كنت بكلم عماد

يا إلهي أناجيك وأنا وحيد في غربتى إن كان قربه منى خيراً لى فارزقنى التوفيق وحسن التصرف وابعده عنى الضلال وإن كان شراً فاصرفه عنى بحكمه دون عناء.

قالت حنان فى لهفة: عملتى إيه يا زهره

أجابتها زهره: الحمد لله يا حنان الإمتحان كان كويس أنتى عملتى إيه



قالت حنان: الحمد لله حليت يا رب ننجح بقه أنا مش مصدقه سنه خلصت بسرعه كده
يلا عقبال سنه رابعه ونتخرج بقه

- يا رب يا حنان
- أنا هروح أشوف محسن
- حنان أنا مش مرتاحه لمحسن ده إنتى ليه على طول معاه كده يا حنان
- أنا بحبه يا زهره
- بتحبيه طيب هو بيحبك
- قالى انه بيحبنى
- مش كفايه إنه يقولك لازم تفهمى وتحسى من تصرفاته إنه بحبك حنان متزعلش منى
- بس الشاب ده تصرفاته بتقول إنه شخص غير مسئول أنا خايفه عليكى
- عارفه إنك بتحبينى وتخافى عليا ربنا يخليكى ليا بس مش عارفه أنا بفرح أوى لما
- ببقى معاه وببقى عاوزه يكلمنى على طول
- تتحدث وكأنها تصف حال زهره

شعرت زهره بما تقوله بصدق وصمتت رن هاتفها فجاء أخرجته من الحقيبة لم تصدق حين
وجدت المتصل دكتور فارس

طيب يا حنان هروح ارد على التليفون بعيد عن الدوشه

- ألو : دكتور فارس الإمتحان كان كويس الحمد لله
- جاءها صوت دكتور فارس قائلاً: أنا مش سامعك كويس يا زهره أنا في المكتب تعالى
- نراجع الإمتحان سوا

أجابت فى لهفة: حاضر هطلع لحضرتك حالاً

نظر إليها قائلاً: اتفضلى يا زهره عملتى إيه اقعدى الأول

جلست زهره قائلة: الحمد لله حليت كويس

سألها قائلاً: عملتى إيه في السؤال الثالث كتبتى النظرية والأسباب والنتائج زى ما شرحت
في المحاضره

- أيوه زى ما حضرتك شرحت بالظبط

- يعنى إمتياز إن شاء الله

- إن شاء الله يا دكتور



قال فارس بتمعن: زهره والدك بيشتغل إيه

اجابت بهدوء: والدي بيشتغل مدرس

قال فارس: إنتى هتروحي البلد

- أيوه عماد ابن عمى هيجيلى بعد بكره بعد الإمتحان وهنساfer
- هتسافرى كده على طول؟ عاوز أقابلك بره الكليه في موضوع مهم عاوز أكلّمك فيه
قالت بدهشة: لازم بره الكليه بس أنا مش بخرج لوحدى خالص عماد على طول معايا
موضوع إيه هو انا هшил الماده ولا إيه

أجابها ضاحكاً: تشيلى إيه بس طيب عندى حل كويس هكلمك في الموبايل لما تروحي.
وقف عماد امام الكلية متجولاً بنظره باحثاً عن زهره إلى أن ظهرت نظر إليها وقال في
ضجر: اتأخرتى كده ليه مستنيكى بقالى ساعة قدام الكليه اللجنه كلها خرجت وبعدين كلمتك
كثير على الواتس إمبراح مبرديش عليا ليه

قالت في حنق: عماد كنت تراجع الماده مع دكتور فارس

- عماد بشك: إيه حكاية دكتور فارس يا زهره
قالت زهره: عماد ده الدكتور اللى بيدرسلى في إيه

- عملتى ايه في الإمتحان طيب
- حليت الحمد لله كان كويس.
قالت زهره بملل: إنتى كمان هتنزلى يا هناء

أجابتها هناء: أيوه هخرج مع البنات ما تيجى معانا

قالت زهره: لا مقدرش انزل بالليل كده ومقدرش اخرج من غير ما اخذ إذن بابا
قالت هناء بإطمئنان: زهره إحنا كلنا بنات مع بعض خارجين نغير جو بعد ضغط
الإمتحانات علشان نفصل شويه ونيجى نكمل الماده اللى بعد كده

- معلش يا هناء اخرجى إنتى
قاطع حديثهما رنين هاتف زهره أجابته قائلة: أيوه يا عماد

قال عماد بضجر: إيه يا زهره بكلمك على الواتس مبرديش ليه

- إحنا كنا لسه مع بعض وبعدين أنا جايه تعبانة وعاوزه أناام شويه



قال عماد: طيب اية رأيك نخرج شوية

قالت بتأفف: لا يا عماد مش علوزه أخرج يوه يا عماد طب خليها بعد بكرة بعد اخر ماده سلام دلوقتي علشان هنام.

قال عماد في ضجر: ماشي يا زهره سلام

فتحت مديحة باب غرفة ولدها وقالت في ود: فارس علوز حاجه يا حبيبي أنا هدخل أنام أعتدلت فارس في جلسته وقال: لا يا ماما تصبحي على خير



الفصل الثانى

نبض القلوب

جلست زهره بجوار هاتفها تنتظر مكالمة فارس في حيره وخوف
دق جرس هاتفها انتفضت مذعوره وتناولت هاتفها مجيبه
- ألو

قال فارس فى تودد: إزيك يا زهره عامله إيه فى الماده الجايه
أجابه فى إرتباك: الحمد لله يا دكتور باقى حجات بسيطه واخلصها
قال فى حماس: زهره إنتى طالبه مجتهده أنا معجب بأخلاقك وطموحك وعلى طول بحس
إن فى حاجه بتشدنى ناحيتك وإنك بتبادلينى نفس الشعور
تسلست تلك الكلمات إلى أذن زهره فصمتت زهره عن الكلام من هول المفاجأه
ناداها فى قلق: زهره مبرديش ليه إنتى معايا

قالت فى إرتباك: أيوه معاك يا دكتور فارس أنا بس متلخبطة ومش عارفه أقول إيه
قال فارس فى تمعن: قولى اللى إنتى حاسه بيه أنا شوفتك فى أحلامى قبل ما اعرفك
ردت زهرة فى لهفه: وأنا كمان حلمت بيك ثم أسرعت بمبادرة أنا أسفه إنى تجاوزت حدودى
يا دكتور فارس

قال فارس فى محاولة لطمئنتها: زهره أنا عاوز أعرف جواب محدد إنتى بتبادلينى نفس
الشعور

أجابت زهره بنبره خافته : أيوه ببقى فرحانه لما بتكلمنى ومش عارفه بيحصل معايا كده ليه

- علشان الأرواح بتتلاقى إنتى قولتلى كده هكذا قال فارس ثم أكمل حديثه:

- زهره إنتى بتحبى الورد أنا شوفتك وأنتى بتروى الورد

أجابه فى إستغراب: هو حضرتك نزلت بلدنا قبل كده أنا فعلا كنت كل يوم اطلع البلكونه
أروى الزرع



رد فارس ضاحكاً: شوفتك في الحلم يا زهره ثم أردف : هسيبك دلوقتي علشان تذاكري هكلمك بعد الإمتحان اطمئن عملتي إيه مع السلامه.

أنهت زهره المكالمه مع دكتور فارس وشعرت أنها طائره فوق السحاب وتلتف حولها أسراب الطيور في صفوف متناسقه كعروس في موكبها وأيقنت أن الذي رآته في أحلامها هو نفسه فارس أحلامها الذي تبحث عنه دكتور فارس المنشاوى.

وقفت زهره أمام مكتب دكتور فارس منتظره أن تذهب الطالبات اللاتى يتحاورن معه دخلت زهره المكتب بعد مغادرة الطالبات نظرت إلى فارس فهب واقفاً وكان يحمل كتابين فى يده وأردف قائلاً: اتفضلى يا زهره

قالت فى حماس: إيه الكتب دى يا دكتور فارس

أجابها باسماء: الكتابين دول علشان تقرأيهم في الإجازة

(الطريق إلى الإمتياز) (قوة التحكم في الذات)

دول كتابين للدكتور إبراهيم الفقى هتستفادى منهم كثير.

شكرت زهره دكتور فارس فى فرح وأخذت الكتب وانصرفت

فوزيه خلصتى الأكل زهره زمانها على وصول هكذا قال مراد منادياً زوجته

قالت فوزية فى إطمئنان: أيوه يا أبو حسن متقلقش يا أخويا كلمت حسن

- أيوه كلمتة حسن كمان في الطريق.

- أنت فين دلوقتي يا حسن وحشتنى أوى انا محتجالك يا حسن تسلفت تلك العبارة عبر

الهاتف إلى أذن حسن

رد حسن فى تودد: أيوة يا جميلة متقلقش يا حبيبتي أنا فى الطريق

قالت جميلة فى قلق: متعرفش يا حسن عملت إيه علشان أقدر أقنعهم إنى مش عاوزة العريس بس كل شويه ييجى حد ثم أكملت باكية : تعالى يا حسن شوف حل معاهم أنا مقدرش أعيش من غيرك

قال حسن فى إشتياق: أنا كمان مقدرش أعيش من غيرك أهدى يا جميلة هحل الموضوع سلام دلوقتي يا حبيبتي أنا خلاص قربت أوصل

قال مراد منادياً زوجته فى لهفة : فوزيه افتحى الباب زهره وعماد على وصول



فتحت فوزية الباب ودخلت تكمل تجهيزات الطعام ولم يمض سوى عشرة دقائق وأتى عماد ومن خلفه زهره

دخل عماد قائلاً: السلام عليكم يا عمى

أجاب مراد فى ترحاب : وعلیکم السلام أهلاً يا عماد

تقدمت زهره من خلف عماد وأقتربت من والدها قائلة: إزيك يا بابا وحشتنى أوى ثم انحنى تقبل يديه فاحتضنها في شوق قائلاً: بنتى الحلوه عملتى إيه في الإمتحانات إيه أخبار القاهرة حلوه

أجابت زهره فى فرح: الجامعه جميله أوى يا بابا والامتحانات كانت كويسه متقلقش بنتك شاطره مش أقل من جيد جداً كمان

أنت فوزية من المطبخ مسرعة فور سماعها صوت ابنتها قائلة: وحشتينى يا زهره

هبت زهره فى لهفة تجاه والدتها وقالت: ماما حبيبتي إنتى كمان قوليلى الورد عامل إيه ثم أسرع إلى البلكونة كى تطمئن على ورودها تنتظر إليها فى شوق تستنشق رائحتها وتتحسس كل وردة على حدة تعتبر الورد أصدقاءها سرحت قليلاً ثم قالت :

وحشتونى كلکوا متعرفوش إيه اللى حصل معايا لاقيت فارس أحلامى الفارس اللى بدور عليه.

قفشتك وإنتى بتعترفى ها قوليلى وقعتى في الحب ومين فارس الأحلام ده هكذا قالت جميلة فجأة

التفتت زهره مخاطبة جميلة : جميله عامله إيه وطى صوتك طيب لاحسن اتفصح

جميلة فى لهفة: متقلقش قولى قولى سرك في بير

قالت فى فرح أقولك إيه يا جميلة دلوقتى بس حسيت بيكى أنتى وحسن

دخلت زهره غرفتها ليلاً منهكه من إثر الطريق فالمسافه بين القاهرة وقرية الفدادنه بعيدة نظرت إلى الكتابين الذي أعطاهما إياها فارس اختارت كتاب وفتحته كى تقرأ إذ بورقه سقطت من داخل الكتاب تناولتها زهره وفتحتها

من فارس الأحلام إلى زهره الربيع (عينك كالؤلؤ الكامن كقمر مضئ وسط الظلام كسحابه تحمى من غزاره الأمطار كشمس تبعث دفئها كنور يهدى من يضل الطريق لقد أسرت في جمال تلك العيون ارحمى أسيرك ودعيني انظر إليك في عجب كُبلت بقيود العشق فما من



أحد يحررنى كما لشفتيك نصيباً من الغزل تقطران رحيقاً من العسل دعينى أذوقه حتى أثمل

احتار كثيراً في وصفك فلم تسع قصائدى جمالك أنتظرك يا صغيرتى عودى إلى محبوبك سريعاً عرفت بأنك ستفتحين هذا الكتاب أولاً فوضعت ما أشعر به في تلك الرسالة). فارس الأحلام

أنهت زهره قراءة الخطاب ثم شعرت بدوار يصيبها مما قرأت وكادت أن تسقط مغشياً عليها لكنها تمسكت بأحراف سريرها وجلست كي تستريح فحين تناولت الكتاب كانت واقفة في منتصف الغرفة استرخت على سريرها وفي يدها رسالة فارس قرأتها عشرات المرات وانسدلت الدموع من عينيها لم تصدق أن فارس مغرم بها لهذا الحد كما لم يصفها أحد بهذه الطريقة صحيح ان عماد يحبها لكنه لم يعبر عن حبه لها بالطريقة التي تروق لها فتمنت كثيراً ان فارس أحلامها يتقن الشعر والغزل كي يتغزل بها فهي فتاه رقيقه تحب الأزهار والأشعار والأدب وعلم الاجتماع أيضاً

سمعت صوت والدتها من الخارج : زهره يا زهره

وضعت زهره رسالة فارس تحت وسادتها ومسحت دموعها

أجابت الصوت فى إرتباك: أيوه يا ماما

قالت فوزية فى عجل : تعالى يا زهره العشاء جاهز

دخلت زهره غرفة حسن قائلة: حسن وصلت إمتى حمد الله على السلامه عملت إيه في الامتحانات أيوه يا عم يا بخت الناس اللي هتتخرج دى

أجابها فى ود: الحمد لله يا زهره كله تمام إنتى عملتى إيه حليتى كويس

قالت فى فخر: طبعاً يا ابني نحن نختلف عن الآخرين

وفى غرفة المعيشة جلس مراد وولده حسن نظر مراد إلى ابنه قائلاً: أيوه يا حسن أدينا بقينا لوحدنا عاوزنى في إيه

قال حسن فى إرتباك: أنا عاوز اخطب يا حاج

قال مراد فى إستغراب: تخطب دلوقتى؟

حسن قائلاً: أيوه أنا خلاص هتخرج



أمعن مراد النظر في حسن وقال: أيوه هتتخرج وهتبقى خلصت دراسه بس مينفعش تخطب دلوقتي يا حسن مش لما تلاقي شغل يا ابني هتخطب وانت بتاخذ مصروف لسه وبعدين مين دي اللي عاوز تخطبها ومستعجل كده

قال حسن في تردد: جميله جارتنا بنت عم محمود أنا بحبها وعاوز اخطبها دلوقتي والجواز بعد سنتين لما أكون نفسي

مراد في إستيعاب: جميله بنت ناس طيبين بس هي هتستناك لما تكون نفسك ده لو أهلها وافقوا على الخطوبه وانت لسه متخرج

قال حسن في قلق: يا بابا ارجوك ساعدني بيتقدملها ناس وهيغصبوا عليها توافق مراد في حرص: يا حسن الجواز قسمه ونصيب يا ابني ولازم تفكر بالعقل والمنطق - تظهر نتيجتك وتدور على شغل أول ما تستلم شغل نروح وقتها نخطبها قال حسن معترضاً: بس يا بابا...

أجابه مراد مقاطعاً حديثه: أنا قولت اللي عندي يا حسن اصبر شويه لما ربنا يكرمك وتشتغل

طرقت مديحة باب غرفة ولدها وفتحت قائلة: فارس احمد جه مستنيك في الصالون

قال فارس في تفهم: حاضر اعمليله حاجه يشربها وانا جاي

صافح فارس أحمد قائلاً: إزيك يا ريس عامل إيه

قال أحمد في لهفة: الأخبار عندك انت يا دكتور طمني عملت إيه مع زهره

أجاب في فرح: كله تمام يا أحمد وحشتني ونفسي أشوفها يا رب الدراسه تبدأ بقه

غمز أحمد بعينية وقال في تلذذ: يا سيدي يا سيدي

قال فارس مغيراً مجرى الحديث: قولي أنت اخبارك إيه يا أحمد استقريت في شغل الشركه

- أيوه شغل كويس والله

- مالك يا أحمد شكلك متضايق

- أنا فسخت خطوبتي يا فارس

قال فارس بأسى: لا حول ولا قوه إلا بالله ليه كده يا أحمد

رد أحمد في وجوم: أنا وبسنت مش متفاهمين مع بعض خالص



- طيب أنت مقتنع بقرارك يا أحمد
- أيوه مقتنع
- طب متزعلش نفسك إن شاء الله ربنا يعوضك بواحدة تفهمك وتفهمها الجواز قسمه ونصيب
- الحمد لله يا فارس لعله خير.
- قالت جميلة في غضب: أنت بتقول إيه يا حسن أبوك موافقش
- قال حسن في تفهم: أيوه وبصراحه عنده حق يا جميله أنا ممعيش حاجه علشان اجي أتقدم بيها ولا حتى شغل
- نظرت إلية في أسى قائلة: أنت بتقول كده يا حسن واكملت باكية أنا مش علوزه منك حاجه
- ربت حسن على يديها وقال في حنان: أيوه يا حبيبتي بس مينفعش أتقدم وأنا لسه متخرج اصبري واستحملي أول ما امسك شغل هاجي أقابل عم محمود
- نظرت إلية في حزن قائلة: حسن أنا مقدرش أكون لحد غيرك
- مسح دموعها قائلاً: أنا يا حبيبتي مش هسمح تكوني لحد غيري هدور من دلوقتي على شغل مش هستنى النتيجة.
- طرقات على باب منزل فارس المنشاوي همت مديحة وفتحت الباب قائلة: اتفضلى يا حبيبتي نورتي البيت ماما مجتش معاكي ليه يا نورا
- قالت نورا في تودد: هو أنا مش كفايه ولا إيه يا طنط مديحه
- كفايه طبعاً يا حبيبتي
- أومال فارس فين يا خالتو
- في أوضته اقعدى يا نورا عن إذنك هنادى على فارس
- فارس فارس اطلع نورا بره وبتسأل عليك هكذا قالت مديحة لولدها
- أجابها فارس في إعتذار: معلش يا ست الكل أنا مستنى مكالمه مهمه سلمى لى عليها
- قالت مديحة في ضجر: فارس ميصحش كده يا ابني على الأقل سلم عليها وادخل تانى
- أجابها في تأفف: حاضر يا ماما جاى وراكى على طول
- خرج فارس من غرفته متجهاً إلى غرفة المعيشة حيث نورا نظر إليها وقال في برود:
- أهلا نورا عامله إيه عملتى إيه في الامتحانات



قالت فى حب: الحمد لله خلاص هتخرج

أجابها بإختصار: بالتوفيق يا نورا

صممت لحظات ثم قالت: فارس أنا متقدملى عريس خريج سياسة واقتصاد وشغال فى وزاره الخارجيه وابن ناس كويسين ومن عيلة كبيره

قال فى دهشة: بجد يا نورا طب كويس أوى فين المشكله بقه

قالت فى تردد: المشكله إنى فارس مشكلتى أنا

دخلت مديحه تحمل كوباً من العصير وضعتة أمامها قائلة: اتفضللى يا حبيبتى

وقف فارس قائلاً: عن إذك يا نورا أنا مستتنى مكالمه مهمه بخصوص الرساله ثم غادر متجهاً إلى غرفته

انفجرت نورا من البكاء ولم تتمالك نفسها اقتربت منها مديحه واحتضنتها قائلة: معلىش يا بنتى يعلم ربنا إنى بعترك بنتى اللى مخلقتهاش ومتمناش لأبنى واحده غيرك يا نورا ثم اكملت

اصبرى يا حبيبتى شويه كمان يمكن الرساله اللى شغلاه عن الارتباط امسحى دموعك يا حبيبتى وقومى روحى لاحسن الوقت اتأخر وماما هتقلق عليكى

مسحت نورا دموعها ووقفت قائلة: حاضر يا طنط هصبر واستحمل عن إذك

قالت مديحه باسمه: بخدي بالك وأنتى سايقه وسلمي لى على ماما.

يا أبو حسن عماد بره عاوزك هكذا قالت فوزية لزوجها

قال مراد مرحباً: أهلاً يا عماد اتفضل اقعد يا ابنى

جلس عماد ثم قال: عمى أنا خلاص هتخرج من كليه العلوم وأبويا هيساعدنى وأفتح معمل تحاليل إن شاء الله

قال مراد باسمه: ربنا يوفقك يا ابني

أشبك عماد أصابعه فى بعضها وقال فى إرتباك: عمى أنا بحب زهره وأمنيه حياتى ارتبط بيها

قال مراد فى دهشة: أنت زى حسن يا عماد وملاقيش لبنتى أفضل منك بس زهره لسه صغيره أما تخلص الجامعه أنا مش عاوز اشغل بالها بالمواضيع دى دلوقتى



- عارف يا عمى بس إحنا ممكن نعمل خطوبه بس والجواز ببقى بعد ما تتخرج
- معلش يا عماد يا ابني أنا مش هوافق لزهره على اى إرتباط غير لما تخلص الجامعه
- ولا يهملك يا عمى أستناها لما تخلص
- أما ييجى وقتها يا ابني إن شاء الله
- أيوه يا حنان عامله إيه تفوهت زهره بهذه العبارة عبر الهاتف
- قالت حنان باكية: أنا مش كويسة يا زهره
- قالت زهره فى إستفهام: مالك يا بنتى بتعيطى ليه طب بالراحه علشان افهم منك
- محسن يا زهره
- ماله محسن يا حنان
- مبيردش عليا يا زهره بقالى أسبوع ببعته رسايل واتصل عليه مبيردش ولما رد قالى متكلمنيش تانى من غير سبب
- يا حنان أنا قولتلك قبل كده محسن ده مش بيتحمل مسئوليه عليا اهدي بس كفايه عياط يا بنتى ميستاهلش دموعك دى
- قالت حنان بألم: يا زهره إنتى مش حاسه بيا انا حاسه إنى بموت أنا بحب محسن أوى يا زهره مقدرش أعيش من غيره
- أجابتها زهرة فى حسره: طيب يا حبيبتي قومي اتوضي وصلي ركعتين لله وادعي ربنا يخفف عنك وإن شاء الله هتنسيه يا حنان صدقيني ربنا هيعوضك بواحد أفضل منه يكون راجل يصونك ويحافظ عليكى شويه وهكلمك اطمئن عليكى سلام يا حبيبتي.
- اتجهت زهره إلى غرفة والدها بعدما اخبرها حسن انه يريد لها فى غرفة
- قالت زهره باسمه: خير يا بابا
- نظر مراد إلى ابنته فى تمنع قائلاً: قوليلي إيه رأيك في عماد ابن عمك
- قالت بإستغراب: عماد كويس ومحترم فى إية يا بابا
- صمت مراد للحظة وكأنه يستكشف شئ ما ثم رد قائلاً: عماد كان هنا وطلبك منى والله وكبرتى وهيجيلك عرسان يا زهره
- قالت فى دهشة: بابا أنا لسه بدرس وبعدين عماد بعتبره زى حسن بالظبط وكمان لسه بدري أنا مش عاوزة اتجوز دلوقتي عاوزة احقق حلمي الأول وبعدين افكر في الجواز



- متقلّيش يا زهره أنا عمري ما هغصبك على حاجه يا بنتى أنا رفضت قولتله زهره بتدرس ولما تخلص
- بابا ولا حتى اما أخلص دراسه عماد أخويا إزاي أقدر اغير الصوره دى في دماغى
- خلاص يا زهره أنا نهيت الموضوع خالص علشان مش عاوزك تنشغلى بحاجه غير دراستك يا بنتى سواء عماد أو غيره مش هوافق على إرتباط غير لما تخلصى دراستك وتبقى دكتوره جامعيتو افخر بيكى
- ربنا يقدرنى يا بابا وتفخر بيا
- لم يهدأ لها بال منذ حديث والدها وعلمها برغبة عماد في الارتباط بها صحيح أنها تعلم إنه يحبها لكن طلبه للخطبه فاجأها خافت لما يخبئه لها القدر وتخيلت نفسها مكان صديقتها حنان برغم إن فارس لم يشبه محسن على الإطلاق ولكن الجرح واحد
- امسكت بهاتفها كأنها تبحث عن أحد يطمئننها من مخاوفها إذ بها استقرت على رقم فارس وضغطت زر الإتصال
- جاءها صوت فارس عبر الهاتف: زهره استنينك كثير
- قالت باكية: فارس
- قال فارس فى محاولة لفهم ما حدث: مال صوتك
- ولا حاجه يا فارس
- كأنه شعر بما يجول بخاطرهما
- قال فى قلق: زهره قلقتينى عليكى يا حبيبتي مالك
- قالت فى أسى: عندى برد علشان كده صوتى متغير
- ثم أرادت أن تغير الحديث قالت فى إستفهام: قولى بقه عرفت منين إنى هختار كتاب قوه التحكم في الذات الأول
- أجابها بصوت يملؤه الفرح: عجبك أشعاري هو أنا مبعرفش أقول شعر بس أما شوفتك بقت شاعر
- فارس
- نعم يا حبيبتي
- اوعدنى إنك متسيبنيش ابدأ



قال فارس في حب: أوعدك يا صغيرتي سأكون لك أبّ وأخّ وصديقاً وحبيباً ثم أكمل أوعدك سأفعل المستحيل من أجل أن أرى ابتسامتك فلا حزن بعد اليوم أوعدك سأعتني بك كورده فريدة من نوعها لقد أصبحت زهرة فارس وستظلين زهرته إلى الأبد أيكفي وعود أم تريدين المزيد

قالت في هيام: فارس أنا بحبك

قال في شوق: وأنا بحبك يا زهرة وعمري ما هتخلي عنك النتيجة تطلع وهاجى أقابل والدك تذكرت زهرة كلام والدها وأسرعت قائلة:

لا يا فارس مينفعش بابا مش هيوافق دلوقتي استنى لما أخلص الكليه

فارس في إستغراب: ليه يا زهرة

قالت في محاولة للإيضاح: بابا رأيته أن الارتباط هيعطلني عن الدراسه ورفض أي إرتباط دلوقتي

رد فارس في ضجر: بس يا زهرة.....

قالت مقاطعه حديثه: فارس لو جيت دلوقتي ممكن اخسرك أنا مش عاوزه اخسرك

قال فارس متفهماً: حاضر يا حبيبتي أنا أستناكي العمر كله قوليلي بقه قرأتى حاجه في الكتاب

- هو أنت اديتلي فرصه أقرأ حاجه
- ليه يا زهرة الربيع
- مش قادره أقرأ غير جوابك قرأته فوق الخمسين مره وكل مره كائي بقرأ لأول مره
- قولي صحيح ليه مبعثليش الكلام ده على الواتس
- بصى يا ستى أنا بحب الزمن القديم زمن الجوابات وبيتهيالى إنى لو كتبت الكلام ده على أي وسيله من وسائل التواصل هيفقد معنى كبير من قيمته
- وأنا كمان يا فارس رأيى من رأيك
- شوفتى بقه إننا متشابهين تقريباً في كل حاجه يلا بقه نامى لأحسن الوقت اتاخر
- يا فارس إحنا في الإجازة هو أنا ورايا جامعه
- وبعدين بقه زهرة حبيبتي بتسمع الكلام السهر مش كويس لو سهرتى هتصحى متأخر وتقومى كسلانة وينفع تسببى ورودك عطشانه الصبح



- حاضر يا فارس لا مقدرش اتأخر على ورودى بالميه علشان متتأخرش عليا في إهتمامك ورعايتك

- تصبحى على خير يا زهرتى

- وأنت من أهل الخير يا حبيبى.

احتضنت زهره هاتفها وكأنها تشكره فمن خلاله سمعت صوت حبيبها فمجرد ما سمعت صوت فارس ذهبت كل مخاوفها من المستقبل فهو وحده من يطمئنها ويربت على كتفها نسيت كل شيء حتى صديقتها حنان فلقد وعدتها الإتصال بها وغرقت في نوم عميق وكأنها لم تتم منذ أعوام

كنت بتكلم مين مخليك مبسوط كده يا فارس هكذا قالت مديحة لفارس

قال فارس مغيراً الموضوع: إنتى لسه صاحيه يا ماما

- فارس نورا جايلها عريس كويس أوى

- أيوه قالتلى طيب كويس الخطوبه إمتى

- خطوبه يا فارس البننت هتروح منك

قال فارس فى ضجر: يا ماما نورا دى زى أختى بلاش كل شويه تكلمينى في الموضوع ده أنا مش قادر أحس تجاهها بأى حاجه خالص

مديحة فى محاولة لإقناعه: بس هي بتحبك يا فارس

قال فارس مسترجياً: يا ماما لو ارتبطت بنورا وأنا مش بحبها هبقى ظلمتها وظلمت نفسي أرجوكى متفتحيش معايا الموضوع ده تانى

قالت فى إستسلام: هقول إيه بس يا ابني اللى يريحك يا فارس تصبح على خير.

مبروك يا زهره نجحتى وبتقدير عام جيد جداً تقوه فارس بهذه العبارة عبر الهاتف

زهره فى فرح: بجد يا فارس الله يبارك فيك أنا فرحانه أوى

قال فارس بصوت فرح: وأنا كمان فرحان علشانك علم الاجتماع إمتياز إيه الشطاره دى

قالت زهره فى ثقة: طبعاً مش تلميذتك لازم أكون شاطره

فارس فى إشتياق: هتيجى إمتى يا زهره وحشتينى

قالت فى حب: خلاص الدراسه باقيلها أسبوع وتبدأ هاجى يوم الجمعة إن شاء الله حسن هيوصلنى ويرجع عماد خلاص اتخرج



- طيب يا زهرتي تيجي بالسلامه.
- صرخت زهره في فرح: بابا يا بابا يا أحلى أب في الدنيا دي كلها أنا نجحت جيد جداً
- قال مراد في فرحة عارمة: مبروك يا زهره زغرتي يا فوزيه
- دخل عماد وقال في دهشة: إيه ده بتزغرتوا عرفتموا منين ان زهره نجحت أنا لسه جاي أقولكوا
- قالت زهره في إرتباك: حنان صاحبتى جابتلى النتيجة يا عماد
- عماد مبتسماً: مبروك يا زهره
- الله يبارك فيك يا عماد
- تبادلت زهره القبلات مع عائلتها في فرحه عارمه
- الحمد لله جيد يا زهره تفوهت حنان بهذه العبارة عبر الهاتف
- زهره في حماس: أنا جيد جداً مبروك يا حنان جيد بردوا كويس مش وحش
- قالت حنان في ألم: الحمد لله يا زهره أنا بس تعبانه شويه محسن مش بيغيب عن بالي ابدأ على طول بفكر فيه نفسي الدراسة تبتدى بقة علشان أشوفه
- قالت زهره في غضب: حنان محسن ده تنسيه نهائي يا حبيبتي ومتكلمهوش وأما تشوفيه صدفه وكأنك مش شيفاه ده شخص مش كويس يا حنان صدقيني ربنا هيعوضك بشخص كويس يا حنان إنتي بس اشغلي نفسك بالقراءه بالرياضه بأى حاجه يا حنان المشكله في الفراغ لو قضيتي على الفراغ هتبقى قضيتي عليه وتبقى كويسه
- قالت حنان في إستسلام: حاضر يا زهره مش عارفه من غيرك كنت عملت إيه دائماً بتهوني عليا
- سلام يا جميل
- مع السلامه يا زهره
- قالت زهره لوالدها في فرح: بابا حسن كلمنى دلوقتى هو كمان نجح بتقدير جيد جداً
- قال مراد فرحاً: الحمد لله اللهم لك الحمد هقوم أصلى ركعتين شكر الله يا فوزيه جهزى الأكل وفرقى ساقع على الشارع كله
- فوزية في حماس: حاضر يا أبو حسن



حسن وصل يا ماما تفوهت زهره بهذه العبارة منادية والدتها من المطبخ ثم نظرت إلى أخيها قائلة: مبروك يا حسن ألف مبروك التخرج

أجابها حسن في فرح: عقبالك يا زهره ومبروك نجاحك

- إبتدى بقه دور على شغل وربنا هيكرمك ها إنت فاهمنى طبعاً
- بس يا غلباويه.

مبروك يا حبيبى فين هديه النجاح بقه هكذا قالت جميلة لحسن

أجابها حسن في حب: بس كده اتفضلى يا ستى أحلى ورده من ورود البت زهره

ضحكت جميله قائلة: حرام عليك هتخلص على الورد زهره بتضايق

قال حسن ببرود: يا ستى هتزرع غيره وبعدين هي أصلاً خلاص هتسافر علشان الكليه.

قال مراد لابنته في حرص: زهره عماد خلاص اتخرج إنتى هتبقى لوحذك خلى بالك من نفسك يا بنتى

أجابه في تفهم: حاضر يا بابا متقلقش عليا أشوف وشك بخير.

دخلت زهره غرفتها بالمدينة الجامعية وقالت في فرح: وحشتونى يا بنات

انتبهت هناء تجاه الصوت واعتدلت في جلستها قائلة: زهره حمد الله على السلامه

صافحتها زهره في ود قائلة: الله يسلمك يا هناء عملتى إيه أنا جبت جيد جدا

قالت هناء في فرح: مبروك يا زهره أنا جيد الحمد لله

قالت زهره باسمه مبروك ليكى انتى كمان

طبعاً الدحيه بتاعتنا لازم تجيبى جيد جداً مبروك أنا بقه مقبول

هكذا قالت ماييسه فور خروجها من الحمام وسماعها بعض من الحديث

التفتت إليها زهره قائلة: معلى يا ماييسه شدى حيلك السنين الجايه وتقديرك هيعلى

مايسه بعدم إهتمام: يا شيخه بلا مذاكره بلا بتاع مش نجحنا وخلاص

هناء بعدم رضى: بس يا ماييسه هتحبطينا يا شيخه

قالت زهره موجه حديثها للفتاتين: يلا ناموا عندنا جامعه الصبح بدري



داعب السهر جفونها ولم تنم من فرحتها سترى فارس غداً إلى أن سمعت أذان الفجر فقامت وتوضأت وصلت ودعت ربها بالتوفيق كما ناجت ربها برغبتها في قرب فارس منها دوماً إلهي أسألك أن تجمعني بمحبابي على سنه رسولك الكريم إلهي اغفر لي وارضني بما تمنيت وفي صباح اليوم التالي ذهبت زهره إلى الجامعة في نشاط عانقت زهره صديقتها حنان قائلة: حنان وحشتيني أوى أوى

ربت حنان على كتفها قائلة: إنتي كمان يا زهره

- طمئني عليك يا حنان عامله إيه دلوقتي أحسن شويه
- أيوه الحمد لله أحسن ثم همست قائلة: اسكتي يا زهره وأن جايه شوفت دكتور
مديحه نازله من عربيتها إيه تقولي وزيره ولا رئيسه جمهوريه لابسه شيك أوى
وتحسى إنها سيده مهمه كده
زهره في إستفهام: مين دكتور مديحه
- دكتور مديحه عميده الكليه يا زهره
- قولتيلي طيب اكيد لازم تبقى سيده مهمه مش عميده هي محاضره علم الاجتماع باقي
عليها كتير
- أنا عارفه بتسألي ليه يا رب يغيروا دكتور فارس
قالت زهره مسرعة: لا يا حنان يا رب ما يغيروه يغيروه ليه
حنان في عجب: ومالك اتخضيتي كده ليه وبعدين أنا بقول كده علشانك مش الدكتور ده
أخرجك مرتين قبل كده قدام الطلبة
قالت زهره محاولة إخفاء إرتباكها: أيوه يا حنان بس أنا بفهم منه شرحه كويس جداً تحسي
أن الماده بسيطه ومش معقدة ثم شردت قليلاً وأكملت: يا سلام يا حنان ده أنا نفسي يدرسلنا
المواد كلها ظلت تتحدث ونسيت نفسها
قالت حنان مستفهمة: هي إيه العبارة يا زهره

- عبارة إيه يا حنان
- مالك حاسه فيكي حاجه متغيرة
- حاجه إيه يا شيخه أنا جعانه تعالى ننزل نجيب حاجه من الكافيتيريا قبل المحاضره
ما تبدأ

دخل فارس المدرج ظل يبحث عنها بنظره وسط الطالبات غضب كثيراً ينتظر رؤيتها منذ
أن سافرت السنة الماضيه وصلت زهره إلى باب المدرج وبجوارها حنان وحين وجدتة



مغلّقاً نظرت إلى حنان في قلق وقالت: كده يا حنان أهوه المحاضره بدأت والدكتور دخل
هنعمل إيه دلوقتي

- عادى هندخل يا زهره صحيح الجدول لسه متعلقش ومنعرفش دكتور مين ولا طبعه
إيه بس ندخل وربنا يستر
طرق الفتاتان طرقات خفيفه على باب المدرج ودخلا نظر فارس ناحية الباب وتسلسل الفرع
إلى قلبة حين وقع نظره عليها فقد وجد ما يبحث عنه
نظرت زهره إلى فارس وقالت في إرتباك: أسفين على التأخير يا دكتور
فارس بتفهم: مفيش مشكله اتفضلوا

جلست زهره وظلت تنتظر لفارس وكأنها في عالم آخر كما بادلها فارس النظرات خلسه من
حين لأخر يشبه الطفل الذي يسرق الحلوى ليتذوقها دون أن يراه أحد
أنهي فارس محاضرتة وذهب إلى مكتبه في إنتظارها
نظرت زهره إلى حنان قائلة: حنان أنا هقوم أروح الحمام وأجى
أومأت حنان برأسها حمد لله على سلامتك يا زهره هكذا قال فارس حين دخلت زهره مكتبه
قالت زهره في حب: الله يسلمك يا دكتور فارس

- ما بلاش دكتور دى
- معلىش علشام إحنا في الكليه
أخرج فارس من درج مكتبه صندوقاً صغيراً ملفوفاً بحيث لا يظهر ما بداخله ومد يده إلى
زهره قائلاً: اتفضللى

- إيه ده يا دكتور فارس
- قال فارس مبتسماً: هديه نجاحك حطيتها في الشنطه ولما تروحي ابقى افتحيها
وضعت زهره الصندوق داخل حقيبتها بعدما شكرته وصمتت ثم نظرت إلى فارس في
خوف

لاحظ فارس قلقها وقال: مالك يا زهره
- حنان بتلمحلى في الكلام لاحظت إنى فضلت ابصلك طول المحاضره وأنا سرحانه
خايفه تعرف حاجه
ما تعرف يا زهره يا ريت كل الناس تعرف إنى بحبك



- لا يا فارس علشان مستقبلك مينفعش يبقى في علاقة بين طالبه ومعيد بس حنان لو عرفت مفهانش مشكله هي كويسه وأنا واثقه فيها وده اللي مطمئني.
- دخل أحمد صديق فارس فجاء مقاطعاً حديثهما قائلاً: السلام عليكم
- فارس في ترحاب: وعليكم السلام أهلا يا أحمد اتفضل اقعد اعرفك زهره طالبه مجتهد
- نظر احمد إلى زهره وقال: أهلا زهره
- قالت زهره في خجل: أهلا بحضرتك ثم نظرت لفارس وقالت: عن إذن حضرتك وغادرت
- قام فارس وأغلق باب المكتب وراءها
- نظر أحمد إلى فارس سريعاً وقال: هي دي زهره اللي خطفت قلبك
- أيوه إيه رأيك
- شكلها محترمه وبنت ناس ذوقك حلو يا فارس
- عادت زهره لصديقتها حنان وقبل أن تجلس بجوارها أوقفتها حنان قائلة: أنا هروح لدكتور فارس أسأله على الكتاب تعالى معايا
- جلست زهره وابتلعت ريقها قائلة: لا يا حنان مش قادره روحى إنتي
- ماشى باى باى
- انتبه فارس وأحمد لصوت طرقات على باب المكتب قال أحمد: الحق يا فارس شوف مين بيخبط يمكن زهره رجعت تانى
- قال فارس في عدم فهم: اسكت يا أحمد استنى ثم إذن للطارق بالدخول
- قال فارس موجهه حديثه لحنان التي دخلت واعتذرت على الإزعاج: اتفضلى يا حنان
- قالت حنان في إرتباك بعدما وقع نظرها على أحمد: أنا جيت اسأل حضرتك عن الكتاب
- فارس في تفهم: الكتاب لسه قدامه أسبوع وينزل في نفس المكتبه
- همت مغادرة ثم قالت: شكراً دكتور فارس عن إذن حضرتك
- مين دي يا فارس هكذا قال أحمد بعد مغادرة حنان
- أجابة فارس: دي حنان صاحبه زهره طالبه مجتهد بردوا
- بس حلوه يا أخى
- عجبتيك يا احمد



- أيوه
- طبعاً بعد ما فسخت خطوبتك بقيت بتبص للبنات عموماً حنان بنت كويسه ومحترمه
- غير بنات القاهرة وكفايه إنها صاحبه زهره
- أيوه قولتلى زهره يا عم
- قالت حنان فى دهشة: اسكتى يا زهره شوفت واحد قاعد مع دكتور فارس بس إيه قمر يا بت
- يا زهره كان نفسي اعرف اسمه
- أجابتها زهره: ده أحمد صاحب فارس
- حنان فى إستغراب: إيه اللي عرفك؟ وبعدين فارس كده من غير دكتور؟
- قالت زهره مرتبكة: أنا قولت اعرفه معروفش
- قالت حنان فى عتاب: زهره إنتى مخبيه عنى إيه هو إحنا مش إخوات
- هقولك يا حنان بس أوعدينى يبقى سر ما بينا
- أوعدك يا زهره
- أنا بحب دكتور فارس وهو كمان بيحبنى وكان عاوز يجى يقابل بابا بس أنا موافقتش دلوقتى
- يا بنت الإيه إيه المفاجأه دى وموافقتيش ليه يا خايبه
- بابا مش هيوافق يا حنان على أي حد دلوقتى على الأقل فى سنه رابعه
- ربنا يسعدك يا زهره إنتى طيبه وتستاھلى كل خير.
- دخلت والدہ جميلة غرفتها وقالت بحسم: أبوكى خلاص أدى للناس كلمه والعريس المره دى كويس فعلاً يا جميله وإنتى عارفه أبوكى لما يقول كلمته
- هبت جميلة واقفة وجلست على ركبتهأ أمام والدتها وقالت فى رجاء: حرام يا ماما الله يخليكى أرجوكى
- همت حسنية مغادرة وقالت بشدة: الخطوبه الخميس الجاى
- انفجرت جميله فى البكاء فأحلامها ضاغت هباءً طارت فى الهواء وضلت طريقها مثلما تضل الطيور طريقها وتذهب بلا عوده
- ظلت تتحدث باكية: أين أنت يا حسن ألم تشعر بى قلبى يتمزق
- قال حسن فى قلق: فى إيه يا جميله قلقت لما شوفت رسالتك ومال عيونك
- قالت جميلة وهى تبكى: حسن أنا خطوبتى الخميس الجاى



صمت حسن كمن تلقى ضربه قوية على رأسه أفقدته النطق
جميلة فى عتاب: أنت ساكت ليه يا حسن هتسيبنى لواحد تانى ياخذنى منك
أجابها حسن فى حزن:جميله أنا بتعذب أكثر منك وملاقتش شغل لحد دلوقتى
قالت فى رجاء:حسن تعالى قابل بابا أنا هقنعهم يوافقوا حسن أنا مقدرش أعيش مع واحد
غيرك

بعد نظره عنها قائلاً: جميله أنا مقدرش اعمل حاجه من غير موافقه أبويا وبعدين أقابل
أبوكى أقوله إيه أنا متخرج لسه وممعيش حاجه وعاوز أتجوز بنتك
أمسكت بيده وقالت:خلاص يا حسن تعالى نهرب مع بعض ونتجوز
نزع يده برفق قائلاً: جميله مش أنا اللى أسرقك أنا بحبك أيوه بس مقدرش أضرك

- جميله انسينى وشوفى حياتك
قالت فى ألم:انساك بالسهوله دى طب إزاي يا حسن يا ريت أقدر أشيلك من قلبى أو حتى
أشيل قلبى من مكانه علشان ارتاح
قال حسن فى شدة:جميله ربنا يوفقك فى حياتك ثم دخل حسن وأغلق باب البلكونه ورائه
جميلة تصرخ فى ألم:حسن متسيبنيش يا حسن حسن....

وصلت زهره لغرفتها بالمدينه وأغلقت الباب بالمفتاح وأخرجت الصندوق من حقيبتها
وفتحته وجدت بداخله قطعه خشبيه على شكل دائره وفوقها طبقتين كل طبقه أصغر من
الأخرى تشبه أدوار قالب التورته وفى أخره مثبتة عروسه باليه تشبه راقصات الباليه
تفحصتها زهره جيداً وجدت زر متين أسفل القطعه الخشبيه الأولى ضغطت عليه فأخرج
أصوات موسيقيه هادئه وتحركت العروسه فى حركات دائريه تتراقص على إنغام الموسيقى
لم تتمالك زهره نفسها من الفرحه وضعتها على الطاولة ووقفت ترقص وتتمايل مع أنغام
الموسيقى كما تفعل العروسه كطفله تقلد ما تراه أمامها ويعجبها

رن هاتفها معلناً قدوم رسالة كفت عن الرقص وفتحت الرسالة وجدت كلمه واحده (عجبتك)
ضغطت زر الإتصال ولكنها تراجعحت حين سمعت دقات على باب الغرفه سمعت الصوت
من الخارج:زهره إفتحى إنتى قافله الباب ليه

حملت العروسه وضعتها فى دولابها وفتحت الباب وجدت مايسة أمامها نظرت إليها مايسة
فى عجب قائلة:إيه قافله الباب بالمفتاح ليه



قالت زهره إرتباك: معلى يا مايسه كنت بغير هدمى ونسيته مقفول

رن هاتفها خشيت أن يكون فارس فهى لم تريد أن يعرف أحد علاقتها بفارس خوفاً على مستقبل فارس سوى صديقتها حنان فهى مخلصه ووفيه لها

رفعت مايسه حاجبها وقالت فى تمنع: إيه مش هتردى ولا إيه

التقطت هاتفها فى إرتباك وجدت رقم جميلة هدأت من إرتباكها وأجابت قائلة:

- جميله إزيك مالك مش فاهمه منك حاجه بتعيطى ليه طب اهدي واحكىلى بالراحه
قالت جميلة باكية: هتخطب الخميس الجاى يا زهره وحسن اتخلى عنى وقالى ربنا يوفقك
جميلة محاولة تهدئتها

- خطوبه إزاي وبالسرعة دى طب هكلم حسن وافهم منه اللى حصل إهدى بس وبطللى
عياط هكلمك تانى يا جميله
أيوه جميله أوى يا فارس ربنا يخليك ليا يا حبيبى هكذا تفوهت زهره عبر الهاتف
قال فارس مستفهماً: عجبك الهدية اومال صوتك متغير ليه؟
قال فارس بعدما شرحت له مشكلة حسن وجميلة: طب هو حسن خريج إيه

- حسن أخويا خريج كلية تجارة
- تجاره كويس أوى احمد صاحبى خريج تجاره وشغال فى شركه كويسه أوى هسأله
على شغل لحسن
- بجد يا فارس يا ريت يا حبيبى
- أيوه بس متزعلىش نفسك أنا מבحبش أشوفك زعلانه
- حاضر أنا هقف بقه لاحسن واقفه فى البلكونه أصل مايسه هنا ومعرفتش اتكلم قدامها
- كل ده واقفه بتكلمينى فى البلكونه يا زهره طب يلا ادخلى ولما يبقى مش عارفه
تكلمينى قولى هكلمك على الواتس كتابه وقتها
- ماشى صحيح يا فارس حنان عرفت وقالتلى ربنا يسعدكوا
- ماشى يا حبيبتى يلا روحى نامى على طول تصبى على خير.
قالت مايسه فى مكر: كنتى بتكلمة مين؟

أجابت زهره فى إقتضاب: حسن أخويا إنتى عارفه مشكلته هو وجميله بفهم منه اللى حصل.
رن هاتفها مجدداً أجابته قائلة: أنا كويسه يا ماما انتوا كويسين



فوزية فى قلق:كويسين يا بنتى بس مش عارفه حسن أخوكى ماله على طول قاعد فى أوضته

قالت زهره:معلش يا ماما تلاقى حكاية الشغل مأثره عليه بس تتعدل سلميلى على بابا ومتنسيش الورد يا ماما

- مع السلامه يا ست الكل.
نظر أحمد إلى فارس وقال مطمئناً: حاضر يا فارس هسأل المدير إذا كانوا محتاجين حد فى الشركه بس هو تقديره إيه

- جيد جداً يا أحمد وكمان معاه كورسات الله يخليك اتصرف إنت متعرفش الحكاية دى
مأثره على زهره إزاي

- ماشى يا عم الحبيب.
يا بنت الإيه إيه البنطلون الجامد ده تفوهت مايسة بهذه العبارة مخاطبة زهره

- جميل أوى عليكى ثم أكملت فى دهشة إيه ده أنتى هتلبسى جيبه فوق البنطلون
قالت زهره بتأكيد: أيوه علشان الجيبه لو اترفعت ولا حاجه

مايسة فى ضجر: إنتى هبله يا بنتى مبتنزليش بالبنطلون ليه ده شكله تحفه عليكى وعودك
حلو

نظرت زهره إلى نفسها فى المرآه وقالت: لا يا مايسة ده ضيق وبعدين ملبسش بناطيل
لوحث مايسة بيديها قائلة:إنتى عبيطه أوى مبتلبسش بناطيل ومبتحطيش ميكب هو فى إيه
لسه بدري أوى على ما تكبر ونبقى عاقلين أوى بالشكل ده يا بنتى عيشى سنك
أرتدت زهره الجيبه وأكملت حجابها قائلة: مايسة أنا مرتاحه كده عن إذك علشان اتأخرت
على المحاضره.

قالت زهره فى عجب:أيوه بس أنا معرفش اى حاجه هنا وعمرى ما خرجت لوحدى أنت
عارف كان عماد معايا السنة اللى فاتت خطوه بخطوه

قال فارس فى تودد:أنا معاكى يا زهره هخرجك هخرج سوا نفسي أخرج معاكى

- أيوه يا فارس بس أقول لبابا إيه متعودتش اطلع من غير ما أخذ إذن
- طيب عندى فكره إيه رأيك تيجى حنان معانا وهكلم أحمد كمان ونخرج كلنا أحمد
معجب بحنان أوى ونفسوا يكلمها بس أنا قولتله أدى لنفسك فرصه الأول أنت لسه
خارج من تجربته



- مش عارفه يا فارس طيب هنروح فين
 - إنتى نفسك تروحي فين
 - أقولك بس متضحكش عليا
 - قولى يا ستى ومش هضحك
 - نفسي أروح الملاهى
- قال فارس بثقة: بس كده إنتى تؤمرى وفارس ينفذ هكلم أحمد وأنتى كلمى حنان نخرج سوا كلنا يوم الجمعة قوليلى لسه عندك محاضرات ولا هنروحي
- لا معنديش محاضرات بس هروح المكتبة الأول وبعدين أروح
 - ماشى هبقى أكلّمك أما تروحي.
- أخرجت زهره هاتفها من الحقيبة بعدما سمعت رنينه وأجابت قائلة: متقلقيش يا جميله أنا كلمت فارس هيشوف لحسن شغل وربنا هيعدلها
- قالت جميلة فى وجوم: الخطوبة الخميس الجاى يا زهره
- قالت محاولة تهدئتها: عارفه يا جميله ان الخطوبه الخميس الجاى بعدها بشويه قوليلهم فى البيت إنكوا مش متفاهمين مع بعض ووقتها يكون حسن مستلم شغل كويس وتتخطبوا خلى عندك أمل
- جميلة فى حزن: حسن اتخلى عنى يا زهره
- معلىش متزعلش منه هو بس مضغوط ومش عارف يعمل إيه مع السلامه يا حبيبتى.
- جلس حسن فى غرفته مسترخياً على كرسيه غارقاً فى ذكرياته مع جميله تمر على ذاكرته يتذكر وجهها وهو مبتسم عيونها الضاحكه طفولتها وخجلها حين يغازلها يضحك تاره عنوه ويحزن تاره إلى ان شعر بشئ ثقيل فوق قلبه كلما يمر الوقت كلما يقبض على صدره لعن تلك الظروف التي حرمته من حبيبته.
- قالت حنان بدهشة: بجد يا زهره معجب بيا
- قالت زهره بود: أيوه يا حنان أحمد شاب كويس جداً يا ريته يكون من نصيبك ها هتخرجى معانا ولا إيه
- قالت حنان بحماس: طبعاً هخرج ده أنا هجهز نفسي من دلوقتى
- قال أحمد بضجر: لا يا عم فارس مش خارج معاكوا وبعدين مينفعش أنت خارج مع زهره أنا هروح معاكوا اعمل إيه



امعن فارس النظر فى أحمد وعقد حاجبية قائلاً: ما هي دى المفاجأه يا معلم حنان كمان جايه
قال أحمد بدهشة: بجد يا فارس لا طالما حنان هتيجى تمام قشطه.

قال مراد مستفهماً: فوزيه مش بتنادى على حسن يتعشى ليه
أجابته فوزية قائلة: ناديته أكثر من مره بيقول مش علوز يأكل
هم مراد واقفاً وقال: طيب انا هقوم أشوفه

دخل مراد غرفة ولده وجده جالساً فريساً للذكريات ربت على كتفه قائلاً: حسن يا ابني
أحوالك مش عجبانى اليومين دول انت متعرفش الخير فين ربنا بيبتلى الإنسان علشان يختبر
مدى صبره على البلاء فوض أمورك لله يا ابني وقوم صلى ركعتين لله وتعالى نتعشى سوا

اعتدل حسن فى جلسته وقبل يد والده قائلاً: حاضر يا حاج ربنا يخليك لينا
تعرفى ان اسمك جميل وكمان شخصيتك بتشبه اسمك هكذا تفوه أحمد مخاطباً حنان
قالت حنان فى دهشة: إزاي يعنى شخصيتى بتشبه اسمى
قال أحمد بغزل: يعنى عيونك مليانه حنان وطباعك جميله
صوبت نظرها بعيداً عنه وقالت بخجل:

- شكراً يا أستاذ أحمد
- لا أستاذ إيه بقه قوليلى يا أحمد
قالت بفرح: حاضر يا أحمد

قال أحمد بإبتسام: ها بقه يا أنسه حنان تحبى تركبى أي لعبه من دول
ضحكت حنان لقوله أنسه رغم توصيته برفع الألقاب قائلة: اى حاجه
لا يا فارس مش هدخل بيت الرعب أنا بخاف هكذا تفوهت زهره
قال فارس بإطمئنان: يا بنتى أنا معاكى هتخافى من إيه يعنى وبعدين كلها شخصيات
مصنوعة بيخوفوا بيها جذبها فارس من يدها قائلاً يلا يلا
انتزعت يدها بسرعه فلم تعتاد أن يلمسها أحد

غضب فارس من نفسه جراء لما فعل نظر إليها قائلاً: أنا أسف يا زهره



فأجابت قائلة: معلش يا فارس أنا أصلاً متفاجئة من اللي أنا بعمله أول مره أخرج مع حد أو أكلم حد

قال فارس بحب: عارف يا زهره أوعدك إني هحافظ عليكى يلا بقه يا برنسيسه على بيت الرعب

دخلوا إلى غرفه مظلمه بدأت علامات الخوف تظهر على زهره تمتت قائلة: فارس خليك جمبى أنا خايفه ومش شايفه

- متقلقيش أنا جنبك على طول

فجأه وسط الظلام أنار جانب من الغرفة ووجدت أمامها وجه مخيف ملطخ بالدماء

فصرخت وألقت برأسها في حضن فارس وكأنها تبحث عن مكان آمن تختبئ فيه ومن شدة خوفها نست كل قواعد الأصول

احتضنها فارس وربت على كتفها قائلاً: متخافيش تعالى نطلع

ظلت زهره في أحضان فارس إلى ان وصوا إلى باب مفتوح وجدت الضوء وكشفت الطريق أمامها وأيقنت أنها أصبحت في الأمان

انتتزع نفسها بهدوء من بين ذراعيه وقالت: هي حنان وأحمد راحوا فين

أرادت ان تجذب أفكار فارس لمحور حديث آخر عما حدث في الداخل

ضحك فارس قائلاً: هكلم أحمد أشوفهم فين

نظرت إليه فى إرهاب قائلة: فارس أنا علوزه أروح

- ليه يا زهره لسه بدري

- معلش حاسه بتعب شويه

- حاسه بايه نروح لدكتور

- لا لا دكتور إيه الموضوع مش مستاهل أنا بس دايله شويه وأما أروح هرتاح وهي كويسه.

دخلت حسنية غرفة جميلة وجدتها جالسة واضعه يدها على رأسها وبجوارها فستان خطبتها نظرت إليها وقالت فى ضجر: جميله إنتى لسه مجهزتيش الناس على وصول

رفعت جميلة رأسها فى أسى قائلة: يا ماما خلصينى من الخطوبة دى أرجوكى



قالت حسنية بحسم: جميلة النهاردة خطوبتك والموضوع خلاص اتحسم يلا اجهزى بسرعه
علشان الناس على وصول

غادرت حسنية الغرفة وظلت جميلة تتحسس فستانها وتتحدث إلى خلجات نفسها تلك حياه
قاسيه حقاً تهوى بأحلامنا إلى القاع لكن لاندري بما تخلينا عن حلم يفتح الطريق لحلم آخر
إرتدت جميله فستان الخطبه فلم يبق امامها سوى تقبل الأمر الواقع فحسن تخلى عنها ولم
يتمسك بها للنهايه

سمع حسن أصوات الزغاريد والموسيقى اختنق صدره وألقى بكل ما وجد على الطاولة على
الأرض

جرت فوزية فور سماعها أصوات أشياء تسقط فتحت غرفة حسن قائلة في دهشة
وقلق: حسن في إيه ده إيه إيه اللي بهدل الأوضه كده
لم يرد حسن على أمه وترك المنزل وخرج.

هوة ده كل اللي حصل يا فوزيه هكذا قال مراد لزوجته

قالت فوزية بحزن: يا حبيبى يا ابني أنا خايفه يا مراد ليعمل في نفسه حاجه

- إبنك راجل يا فوزيه هو بس متضايق شويه ده امر طبيعى وهيرجع البيت متقلقيش

- يا رب ربنا يهديك يا ابني وترجع البيت

أمسكت حنان بيد زهره وقالت فى إمتنان: زهره شكراً أنا اتبسطت أوى في الخروج دى
أحمد شخص كويس أوى

نظرت إليها زهره وقالت: مش قولتلك يا حنان ربنا هيعوضك بواحد يقدر قيمتك إنتى أصلا
محبتيش محسن الفتره اللي عرفتوا فيها بعض كانت قصيره أوى كان مجرد تعود مش اكرر

- عندك حق يا زهره أنا مبقتش بفكر في محسن خالص

- الحمد لله ربنا يكرمك مع أحمد يا حنان.

استرخت زهره على سريرها تعيد أحداث اليوم في مخيلاتها وبرغم إنها خجلت كثيراً لكونها
ألقت بنفسها في حضن فارس إلا أنها شعرت بفرحه عارمه وتمنت ألا تفارق ذلك الحزن
فكانت تبحث عنه منذ زمن ولأول مره تشعر بالسكينه والإطمئنان رن هاتفها أيقظها من
تخيلاتها

- طمئنى عليكى عامله إيه دلوقتى تسالت تلك العبارة إلى إذنها عبر الهاتف

أجابته بإمتنان: بقيت كويسه يا فارس



قال فارس بقلق: زهره مالك طول الطريق كنتى ساكتة إنتى متبسّطيش من الخروجه
قالت مسرعة: لا بالعكس يا فارس أنا أول مره اتبسّط كده وأول مره أخرج أصلاً خرجت
مره مع عماد قبل كده بس مفرحتش قد فرحتى بالخروج ده وكمان لما ببقى في البلد
بفضل محبوسه على طول في أوضتى محدش بيخرجنى

قال فارس بالحاح: أو مال مالك؟

قالت في خجل: فارس أنا أسفه

- على إيه يا زهره
- على اللي حصل في بيت الرعب
قال فارس بشوق: لما ضميتك يا زهره حسيت إنك مسئوله منى وإنك مش هتقدرى تستغنى
عنى ولا أنا هقدر استغنى عنك

خلاص بقه إنسي اللي حصل ثم أكمل ضاحكاً: ده أنا هدخلك بيت الرعب على طول علشان
اللى حصل ده يحصل على طول

ضحكت قائلة: توبة ادخله تانى ده أنا اترعبت حرام عليك.

رن هاتف حنان انتفضت مسرعة حين لمحت رقم أحمد أجابت قائلة: ألو أحمد

- عامله إيه يا حنان
- الحمد لله يا أحمد شكراً على الخروج الحلو ده من زمان مخرجتتش واتبسّطت
- بس كده يا ستى ليكى عليا كل أسبوع اخرجك
- بجد يا أحمد
- طبعاً يا قمر
- ربنا يخليك يا أحمد
- قوليلى بقه أخبار المزاكره إيه
- الحمد لله ماشيه ثم أكملت مستفهمة أحمد زهره قالتلى إنك كنت خاطب
- أيوه يا ستى
- طيب وسيبتها ليه
- محصلش تفاهم ما بينا إحنا الاتنين مش قادرين نفهم بعض
- طيب كويس ثم أردفت مسرعة قصدي إن شاء الله تلاقى واحده تفهمك
- قال أحمد بحب: ما خلاص يا حنان أنا لاقيت اللي تقدر تفهمنى



قالت فى مكر: بجد طيب خير

أجابها متعجباً: خير! ماشى يا ست البنات.

وقفت زهره أمام المرآه ترتدى ملابسها كى تذهب إلى الجامعه

تناولت الجيبه كى ترتديها تذكرت كلام مايسه لها عن البنطلون الجينز نظرت لنفسها فى المرآه وقالت محدثه نفسها: والله البت مايسه عندها حق البنطلون جامد جداً هو بس ضيق شويه بس مش مشكله هنزل بيه علشان خاطر فارس أكيد لما يشوفنى هعجبه كما وضعت ميكب كامل على وجهها هي عاده ما تكتفى بالقليل من الكحل وذهبت إلى الجامعه

قالت حنان فى دهشة بعدما رأت زهره قادمة فى إتجاها بهيئتها الجديده: يخربيتك يا زهره إيه اللى أنتى عملاه فى نفسك ده

إيه رأيك يا حنان حلو

- حلو بس ابقى إلبسى بلوزه طويله على البنطلون وكمان أول مره أشوفك حاطه ميكب أوفر كده

- إيه رأيك يا حنان يا ترى هيعجب فارس

- أكيد معقول كل اللى إنتى عملاه ده وميعجبوش

دخل فارس قاعه المحاضرات ظل يبحث عن زهره بنظره كعادته وحين شاهدها تعجب كثيراً مما رأى أنهى محاضرتة سريعاً وذهب إلى مكتبه

همست زهره إلى حنان فى قلق وقالت: حنان فارس باعتلى مسج بيقولى تعالى على المكتب حالياً

- طيب يا زهره روحى وأنا هستناكى هنا

طرقت زهره طرقات خفيفه على الباب ودخلت قائلة: فارس وحشتنى

أجابها بغضب: إيه اللى إنتى عملاه فى نفسك ده إيه اللبس ده إزاي نزلتى كده قدام الناس وإيه الألوان اللى فى وشك دى دلوقتى حالياً تروحي على المدينه

قالت فى إستغراب: أروح ليه طيب مش هلبس كده تانى بس أروح لسه عندى محاضرات

قال فارس بحده: من غير كلام كتير دلوقتى تروحي حالياً يا زهره و مترجعيش الكليه النهارده

إمتلأت عينيها بالدموع وكادت أن تبكي نظر لها فى جديه وقال: إنتى لسه واقفه مكانك يلا روحى دلوقتى وحسابنا بعدين



غادرت زهره المكتب مسرعه

أحست بإرتكابها شيء مخجل وليس أمام فارس وحده بل أمام كل من شاهدها من وقت خروجها من المدينه إلى ان وصلت إلى المدرج غادرت الجامعه مسرعه وهي باكيه

- زهره إنتى فىن المحاضره هتبتدى هكذا تفوهت حنان عبر الهاتف

- حنان أنا روحت

- روحتى ليه؟ فى إيه ومال صوتك؟

- معلىش يا حنان هبقى أكلمك بالليل سلام دلوقتى.

فعندما وصلت إلى المدينه توقعت قدوم البنات من السفر فالיום أول الأسبوع وكانا قد سافرا آخر الأسبوع الماضى مسحت دموعها ودخلت الغرفه وبالفعل وجدت مايسه

حين رأتها مايسه قالت فى دهشة: إيه ده يا بت يا زهره نزلتى بالبنطلون زى ما قولتلك شوفتى بقه إنه جنان عليكى لا وكمان حاطه ميكب تلاقيكى إتعاكستى معاكسه بس إيه اللى رجعتك بدري من الجامعه ومال عيونك إنتى معيطه

أجابت زهره بصوت خافض: لا ده بس من الميكب عن إذنك يا مايسه هروح أغير فى الحمام

بدلت ملابسها زالت أثار الميكب من وجهها وكلما تذكرت نظرات فارس لها وصوته العالى تبكي صحيح إنها أخطأت لكن لم تعتاد على القسوه منه انتظرت يتصل بها ليصالحها ولكنه لم يفعل

قالت زهره فى حزن: من ساعة اللى حصل يا حنان مكلمنيش هتجنن

حنان قائلة: طب ما تكلميه إنتى

- إتصلت بيه مردش عليا

وصل حسن إلى المنزل بعدما غادره غاضباً دخل قائلاً: السلام عليكم

هبت فوزية واقفة وقالت فى لهفة: حسن كنت فىن كل ده يا ابني أنا وأبوك قلقنا عليك

قال حسن بوجوم: كنت بشم شويه هواء بره البيت وادينى جيت

نظر مراد لزوجته قائلاً: إيه يا فوزيه هو حسن صغير مهو كويس أهوه قدامك ثم وجهه كلامه لحسن وقال: تعالى أقعد يا حسن أعمليلنا كوبايتين شاي يا فوزيه



تفاجئت زهره حين وجدت فارس يتصل بها فقد مر أسبوع ولم يحادثها مسكت هاتفها واجابت قائلة:فارس كلمتك كثير مبتردش عليا ليه؟

- زهره ايه اللي إنتى عملتيه ده مبصتيش لنفسك في المرايه قبل ما تنزلى مين اللي شجعتك تنزلى باللبس ده ده مش لبسك
- أنا أسفه يا فارس مش هعمل كده تانى أنا مش بستحمل قسوتك وبعدك عنى مايسه هي اللي قالتلى ان شكلى حلو وإنى لازم أعيش سني وأنا كنت عاوزه أبقي حلوه في نظرك
- زهره كذا مره قولتلك مايسه دى متسمعيش كلامها لأنها شخصيه متحررة وهوائيه وفاهمه الحريه غلط
- يا زهره أنا حبيتك لجمالك الطبيعى ولبسك البسيط الحشمة مينفعش حد يآثر عليكى لازم تكونى مستقله بشخصيتك يا زهرتى
- حاضر يا حبيبي حقك عليا يا فارس
- تسللت الفرحة إلى قلب حنان فور سماعها هذه العبارة
- حنان خدي معاد من والدك علشان عاوز أقابله
- خفضت نظرها للحظات وقالت بفرح يصاحبه مكر: تقابل بابا ويا ترى عاوز تقابل بابا ليه يا أحمد؟

قال أحمد بخبث:أبدأ كنت محتاج فلوس وعاوز استلف منه هكون أقابله ليه يعنى

ضحكت حنان بصوت مرتفع وقالت:حاضر يا أحمد

قال احمد فى شوق: قوليلى بقه تحبي نعمل الخطوبه إمتى

قالت حنان فى خوف:أحمد أنا خايفه تكون اتسرعت أنت لسه فاسخ خطوبتك من فتره قريبه

قال أحمد بثقة:لا يا حنان عمري ما كنت واثق في قرارى قد اللحظة دى لما شوفتك حسيت إنك إنتى الإنسانه اللي بدور عليها واللى أقدر أكمل حياتى معاها وأنا متطمئن قلبى دق لأول مره يا حنان معاكى بحس إنى في عالم تانى ودنيا تانيه

أوقفت حنان أحمد فجأة فكانوا يسيران فى أحد المنتزهات واحتضنته بشدة تلك هي الأنثى حين تسمع إعتراف حبيبها بحبه لها تطير مع الفراشات وتنسى كل شيء اعتبرت إنهما وحيدين في تلك العالم ولم ينظر إليهما أحد.

جميله خطيبك قاعد بره بقاله ساعة اطلعى عيب كده يا جميله هكذا قالت حسنية بغضب



قالت جميلة في تأفف: قوليله إنى تعبانہ ومش هقدر أقعد معاه

قالت حسنية بضجر بعدما نفذ صبرها: جميله لو مطلعتيش هقول لأبوكى لما ييجى يتصرف معاكى وبعدين حسن عملك إيه يعنى مفكره انى مش عارفه كنتى بترفضى ليه أنا عارفه إنك على علاقة بحسن بس حسن يا دوب لسه متخرج ومعدوش حاجه ولا حتى شغل يصرف منه وأهله على قدهم فكرى في مستقبلك خطيبك حالته كويسه يقدر يعيشك كويس الحب مش بياكل عيش أنا هطلع أقوله إنك جايه ورايا

خرجت جميله في تذمر وجلست بجوار خطيبها محمود

نظر لها مبتسم وقال: إزيك يا جميله

أجابت في برود: كويسه

قال محمود بقلق: جميله هو أنا ليه بحس إنك مش مبسوطه

قالت في توتر: لا أبداً أنا بس مصدعه شويه

قال بعدم إقتناع: سلامتک يا جميله ألف سلامه هستأذن علشان اسيبك ترتاحى.

قالت حنان بفرحة عارمة: زهره أحمد هيجى يقابل بابا علشان يطلبنى منه أنا مبسوطه أوى يا زهره

احتضنتها زهره بفرح وقالت: ألف مبروك يا حنان ربنا يسعدك مع أحمد

- عقبالك إنتى وفارس أنا مش عارفه انتوا مستنيين إيه؟
- خايفه يا حنان خايفه فارس يتقدم دلوقتى يترفض علشان الدراسه وأبقى خسرتة
- يا بنتى فارس دكتور في الجامعه معقول يعنى ابوكى هيرفض
- حتى لو عجبه فارس هيرفض علشان خاطر عماد ابن اخوه يعنى يبقى قايل لابن أخوه مش هوافق على إرتباط دلوقتى وبعدين يوافق على فارس
- قالت حنان بتفهم: عموماً هانت يا زهره خلاص الإمتحانات قريب وهيبقى باقى سنتين هيعدوا بسرعه

- يا رب يا حنان

قالت جمالات لابنتها بغضب: ما هو أنا عاوزه أفهم يا نورا هتفضلى مستنيه فارس لأمتى اتخرجتى بقالك سنه ورفضتى ناس كتير كويسه وهو مش عاوز يتحرك حرام عليكى شبابك يا نورا



قالت نورا في ضجر: ماما لو بتحبييني متكلمنيش في الموضوع ده تانى معقول تكونى مش حاسه بيا للدرجة دى وأكملت فى أسى أنا فتحت عيني على فارس ابن خالتي عيشت طفولتي كلها معاه إزاي اتجوز حد غيره يا ماما أنا هستناه العمر كله

همت جمالات مغادرة غرفه ابنتها وقالت: هقولك إيه يا نورا ربنا يريح قلبك وبالك يا بنتى ويهديكى.

ربت مراد على كتف ابنه قائلاً: قوم صلى العشاء يا حسن وأقرأ شويه في المصحف هترتاح يا ابني صدقنى الصلاه والقرآن ده ملجأ كل محتاج

أوماً حسن براسة وقام ليصلى ، أنهى حسن صلاته وجلس يدعو الله أن يلطف بقلبه ويفك كربه.

نظر محمود إلى جميلة فى محاولة لفهم ما تخفيه: جميله أنا هساعدك بس صارحيني في حد غصبك على الخطوبه

هربت بنظراتها بعيد عنه قائلة: ليه بتقول كده يا محمود

قال محمود: بقالنا حوالي شهرين مخطوبين وأنتى مش مبسوطه مش بتبادليني نفس الشعور أوعدك محدش يعرف حاجه

امتألت عينيها بالدموع وصمتت عن الكلام

نظر إليها محمود قائلاً: إنتى بتحبى حد تانى؟

أومأت برأسها إيمائه خفيه

قال متفهماً: أنا كده فهمت ربنا يوفقك يا جميله أنا هنهى الموضوع مع عم محمود ومتخافيش من حاجه.

قالت زهره عبر الهاتف: لا يا فارس متقلقش الخط دلوقتى استنى احكيلى حدوته

فارس فى دهشة: حدوته! إيه هو أنا بكلم بنت أختى ولا إيه

قالت بدلال: علشان خاطرى هتسيبنى أنام زعلانه يعنى

قال فارس بحب: طيب يا ستى أما نتجوز ابقي احكيك حدوته وأنيك كمان زى العيال الصغيره



زهره بقلق: فارس هو أنت ممكن تبعد عني مجرد لما بفكر بتعب لما بيعدى عليا يوم من غير ما تكلمنى بتخفق وبحس إنى ناقصنى حاجة

قال فارس بثقة: مش ممكن أسيبك أبداً مهما حصل يا زهره أنا مصدقت لأقبتك

- ربنا يخليك ليا يا فارس احكيلى بقه الحدوته
- حاضر يا ستى بس بعدها تنامى على طول الإمتحانات خلاص قربت ولازم تحافظى على مستواكى
- كان يا ما كان

قالت حسنية لابنتها بغضب: إنتى عملتى إيه علشان محمود يفسخ الخطوبه

جميلة بدھشة: معملتش حاجه يا ماما هو فسخ الخطوبه

قالت بحق: أيوه قال لأبوكى مفيش نصيب نكمل أنا وجميله

فرحت جميله لكنها أرادت أن تخفى فرحتها عن والدتها وأجابت:

- الجواز قسمه ونصيب يا ماما
 - ماشى يا جميله خلى حسن ينفعك.
- فارس متأخرش في الجامعه خالتك معزومه عندنا هي وجوزها ونورا تفوهت مديحة بهذه العبارة

هم فارس مغادراً: حاضر يا ست الكل مش هتأخر

أوقفته مديحة قائلة: فارس ملاحظه اليومين دول إنك مبسوط كده ومزقظط

فارس بارتباك: عادى يعنى يا ست الكل

- ماشى يا ابني ربنا يبسطك على طول
 - عن إنك بقه لأحسن العميده بتاعتنا صعبه أوى وهتعلمى قصه لو اتأخرت مع أنها أوقات كتير بتتأخر عادى
- أجابته ضاحكه: الجد والإجتهاد من سمات الشخص الملتزم مع السلامه يا حبيبى.

قالت زهره بدھشة: بجد يا جميله الخطوبه اتفسخت طب إزاي احكيلى حسن عرف طيب

قالت جميلة بعتاب: لا حسن لسه معرفش

- ليه يا بنتى مقولتيلوش ده هيفرح أوى



- أنا ز علانة منه أوى يا زهره
- ز علانه من حسن ليه يا جميله هو كان في إيده إيه يعمله يا شيخه كلميه فرحيه أقولك هكلمه أنا سلام.
- التقطت زهره هاتفها مسرعة وأتصلت بوالدتها: جاءها الصوت من الجبهه الاخرى
- زهره عاملة ايه يا بنتى
- قالت بفرح: الحمد لله أنتوا عاملين إيه يا ماما الإمتحان الأسبوع الجاى ادينى حسن أكلمه
- قالت بلهفة: حسن عندى ليك خبر بمليون جنيه
- قال حسن بحق: قولى يا زهره مش فايقلك ولا فايق لهزارك
- قالت زهره: جميله خطوبتها اتفسخت
- قال حسن بفرح: بجد يا زهره أنتى أحلى أخت في الدنيا دى كلها
- إيه خدمه بس فين المليون جنيه
- بعدين لازم اكلم جميله دلوقتى سلام
- قال فارس بشوق: زهره هتلبسى إيه بكره وأنتى نازله
- قالت برقة : هلبس الطقم البنى
- لا إلبسى الجيبه البيضه والبلوزه الموف الطقم ده حلو عليكى أوى
- حاضر يا فارس
- القت مايسة كتابها جانباً ونظرت إلى جميلة قائلة: أيوه بقه بتدحى من الصبح أنا زهقت من نص ساعة
- قالت هناء فى قلق: ربنا يستر أول مادة رخمة
- نظرت إليها زهره وقالت فى ثقة: مش رخمه ولا حاجه هي بس محتاجة تركيز شويه
- قالت مايسة بتمعن : زهره سمعتك وإنتى بتكلمى جميله هي ليه فسخت خطوبتها
- نظرت هناء لمايسة وقالت فى حدة: وإحنا مالنا يا مايسه
- قالت زهره: جميله بتحب حسن وهو كمان بيحبها من زمان وخطيبها حس أنها مش مبسوطه معاه ففسخ الخطوبه
- اعتدلت مايسة فى جلستها قائلة: دى بت خايبه إزاي تضيع عريس كويس كده حالته كويسه



أغلقت هناء الكتاب الذي بين يديها وقالت: الفلوس مش كل حاجه يا مايسه
أشارت زهره بيديها لهناء وقالت: هناء عندها حق يا مايسه المهم الراحة النفسيه
قالت مايسه بضجر: يا سلام يا أختى انتى وهى

نظرت زهره فى ساعتها قائلة: يلا زاكروا متضيعوش الوقت

- كده فهمتى كل حاجه تقوه فارس بهذه العبارة عبر الهاتف
 - أيوه يا فارس مش عارفه من غيرك كنت هعمل إيه
 - ركزى بقه فى الإمتحان ومتقلقيش يا زهره وابقى عدى عليا طمنينى بعد الإمتحان
- قالت زهره بفرح: بجد يا حنان الخطوبه الجمعه الجايه

قالت حنان: أيوه يا زهره بعد اخر يوم فى الإمتحانات متروحيش البلد لو مجتيش هزعل

- لأ طبعاً هاجى هروح لفارس علشان اطمنه إنى حلّيت كويس
- نظرت زهره إلى فارس فى شك وقالت: مين دى يا فارس؟

قال فى عجب: طالبه

زهره بحنق: طالبه وقاعده معاك بقالها ساعة

فارس مستفهماً: ساعه!

قالت بضيق: أيوه أنا جيتلك من شويه لاقيتها فى المكتب ومدخلتش استنيت لما تخرج كانت بتعمل إيه كل ده؟

قال فارس: كانت بتراجع الإمتحان يا زهره ثم أكمل وقد ارتسمت على شفتاه بسمة ماكره وبعدين تعالى هنا إنتى بتغيرى

قالت زهره فى ضجر: أيوه يا فارس لما بشوفك مع واحده بتجنن حتى لو كانت طالبه ومتهمكش بحس بنار فى قلبى

قال مستفهماً: بتحبينى للدرجه دى يا زهره؟

قالت بهيام: عرفت الحب على يدك وتذوقت طعم الحياة رأيت الوجود حين عرفتك وشعرت بلذة السعاده ولدت من جديد حين قابلت فارس وأيقنت بأني ابتليت وعشقتك اسأل الله ألا يرفع عنى البلاء.



قال فارس بفرح: أنتى عارفه لو مكناش في الجامعه كنت حضنتك بس نتعوض في بيت الرعب

ضحكت زهره قائله: أنا خلصت الكتب قرأتهم وجبتهملك معايا

قال فارس بحماس: قرأتهم كلهم طيب بقه استفادتى إيه من كتاب تطوير الذات

- دكتور إبراهيم الفقى ده دكتور عظيم الله يرحمه بيقول: ثلاث أشياء تسقط قيمه المرأه (حب المال والأنانيه وحب السيطرة) وثلاث ترفعها (التضحية والوفاء والفضيله) بيقول كمان متدور ش على السعاده بعيد هتلاقىها جواك وأنت مش واخذ بالك أنا استفدت كثير من الكتاب ده يا فارس

- شاطره يا صغيرتى هجيبلك المره الجايه كتب تانيه تاخديهم معاكى وأنتى مسافره تقرأيهم في الاجازه

- بجد أنت أحلى فارس في الدنيا دى كلها. نظر حسن إلى جميله وقال فى رجاء: سامحيني يا جميله أنا كنت بتعذب اكثر منك قسيت عليكى غصب عنى سامحيني

قالت جميله بحب: مسمحاك يا حسن أنا كنت في غربه وأنت بعيد عنى أوعدنى متسيينيش تانى

- أوعدك يا جميله فما أجمل عوده المحبين بعد الغياب تتعذب النفوس بالفراق كثيراً وتفقد الإحساس فتقطع للموت ويبقى سيد الأمانى ومن حصل عليه فقد فاز.

قالت زهره لوالدتها عبر الهاتف: خطوبه حنان يوم الجمعة يا ماما هحضر الخطوبه وهاجى تانى يوم متقلقيش بيت حنان قريب من الجامعه

- روحى يا زهره وخدى بالك من نفسك

- حاضر هاخذ بالى من نفسي

قالت زهره فى حيرة: حنان أنا معنديش حاجه كويسه أحضر بيها عاوزه أشتري طقم حلو ومش عارفه اجيب منين ولا اعمل إيه تعالى معايا معرفش الأماكن اللى بيبقى فيها وخايفه أتوه في بلدكوا دى

أجابتها ضاحكه: بلدنا حد يتوه في القاهره بردوا دى أم الدنيا حاضر يا ستى بكره بعد الإمتحان نروح وسط البلد.



دخلت زهره غرفتها وجدت مايسه جالسة وسط كتبها

نظرت إليها زهره وقالت: أخبار المذاكرة إيه

قالت مايسه فى تأفف: حاسة بغباء فظيع إذاكر حاجه من هنا واجى اسأل نفسى معرفش حاجه ثم ألقت كتابها بجانبها وأكملت كمن تذكر شئ:

- صحيح ابن عمك جالك وساييلك أمانة مع المشرفة
قالت مستغربة: عماد كان هنا مقلش يعنى إنه جاى وبعدين أمانه إيه

- مش عارفه يا زهره المشرفه كانت هنا وقالتلى لما تيجى زهره تنزل تستلم الحاجة
اللى جتلها

- حاضر يا مايسه هغير هدومى وانزل على طول
نزلت زهره لمشرفه الدور ميس ناديه طرقت الباب ودخلت قائلة: السلام عليكم يا ميس أنا
جيت استلم الامانه اللى جتلى من البلد

مدت المشرفة يدها بطرد وقالت: اتفضلى يا زهره جالك الطرد ده ابن عمك سابه مع الأمن
قالت مايسه فى حماس: إيه اللى فى الطرد ده يا زهره
قالت زهره: مش عارفه يا مايسه هفتح وأشوف

فتحت زهره الطرد وجدت فستان سواريه أسود مطرز بخرز باللون الموف كما وجدت
كارت كُتب عليه: (الفستان ده لأميرتى علشان تلبسه فى الخطوبه. فارس الأحلام)

قالت مايسه بعدما رأت الفستان: واو إيه الفستان الحلو ده ده جنان يا زهره إنتى بتلبسى
فساتين سواريه هو عماد ابن عمك بي فهم فى الحجات دى مهو رومانسى أهوه أو مال مش
عاجبك ليه

أومأت زهره برأسها وتحسست الفستان بيديها واحتضنته كأنها أرادت أن تشم رائحة فارس.

قالت حنان عبر الهاتف: زهره يلا مش هنروح نشترى الطقم

اجابتها زهره فى فرح: لا يا حنان خلاص فارس جابلى فستان

- بجد
- أيوه جابلى من غير ما أقوله إنى معنديش حاجه أحضر بيها الخطوبه
- ربنا يجمعكوا مع بعض يا زهره
- يا رب يا حنان



عقدت جميلة حاجبيها وقالت في غضب: معقول يا حسن خريج تجاره وتشتغل سكيورتي (موظف أمن)

قال بحق: هعمل إيه يا جميله أهى شغلانه مؤقتة لعند ما ربنا يكرمى بشغل في مجالى وبعدين مش أحسن ما أفضل قاعد من غير شغل

قالت بتفهم: معاك حق يا حسن ربنا يكرمك يا حبيبى وتلاقى الشغل اللى يناسبك.

ارتدت زهره الفستان كما ارتدت صندل عالى وطرحه شيفون من درجات اللون البنفسجى فهى وفارس يحبان هذا اللون ووضعت القليل من الكحل وملع شفاه فهى تؤمن بأن الجمال إذا أضيف له لمسات خفيفه أصبح أجمل

حين وقع فارس نظره عليها أطلق صفيراً ووقف يشاهدها في عجب قائلاً:

- إيه الجمال ده يا زهره إنتى كده هتغلبى العروسه
قالت في خجل: عجبتك؟

أوماً برأسه: طبعاً قمر يا زهره

سار أمامها وفتح لها باب السياره قائلاً: اتفضلى يا أميره

ركبت زهره سياره فارس ذاهبين إلى خطوبه أحمد وحنان

نظرت إليه زهره قائلة: فارس هو أنت ليه قولت إنك ابن عمى لما بعثلى الفستان

- علشان مش اعملك مشاكل في المدينه

- أنا قولت كده بردوا

دخلا سوياً إلى قاعه الحفلات

يخربيتك يا زهره إيه الجمال ده ذوق فارس يجنن هكذا تفوهت حنان حينما وقع نظرها على زهره

احتضنت زهره حنان قائله: ألف مبروك يا حبيبتي عقبال الفرح

كما هنا فارس صديقه أحمد ألتقطا الصور مع بعضهما

ثم أخذ فارس زهره وجلسوا على طاولة مع المعازيم

دارت أنغام الموسيقى الهادئه قام العروسان يرقصان مع بعضهما فوقف فارس وانحنى أمام زهره ماداً يده قائلاً: تسمحيلى بالرقصه دى



زهره فى دهشة: فارس الناس بتبص علينا رقص إيه أنا مبفهمش فى الرقص بتاعكوا
همس لها قائلاً: أنا هعلمك جذبها برفق إليه وأحاط خصرها بيده ووضع يدها على كتفه قائلاً:
بصيلي بقة وامشى بهدوء مع نغمات الموسيقى
رقص فارس وزهره فى حريه كعصفورى خرجاً للتو من القفص محلقين فى الفضاء فشعرا
بتجاوز أحلامهما فوق السحاب.
جميله خلاص يا حبيبتي هاجى بكره من العاشر قولى لعم محمود إني جاي أقابله بكره هكذا
قال حسن لجميله عبر الهاتف
قالت جميله فى دهشة: بجد يا حسن

- أيوه يا حبيبتي بقالى فتره شغال كويس وأقدر أجيبك شبكه كويسه
- أنا مش مصدقه يا أبو على خلاص حلمنا هيتحقق
- كل أحلامنا هتتحقق يا ست الحسن والجمال
- ربنا يخليك ليا يا شاطر حسن.

بعد مرور عام

قالت زهره لوالدها فى فرحة عارمة: بابا أنا نجحت إمتياز زى كل سنه
مراد فى فرح: مبروك يا حبيبتي ربنا يباركلى فيكى يا زهره باقى سنه وتخرجى
أومات برأسها: أيوه يا بابا باقى سنه واحده وبعدها احضر للماجيسترس على طول
اعتدل مراد فى جلسته قائلاً: إيه رأيك يا زهره نعمل خطوبتك أنتى وعماد مع خطوبه حسن
وجميله

قالت زهره فى دهشة : بابا أنا مش موافقه على عماد
مراد مستفهماً: ليه يا زهره عماد شاب كويس؟

- بس أنا بعنبره زى حسن أخويا أرجوك يا بابا إنهى معاه الموضوع
- طيب أدى لنفسك فرصه يا زهره
- بابا لو بتحبني وعاوزنى أفضل على نفس المستوى من التفوق على طول متغصبش
عليا خلينى أركز فى اخر سنه دى أهم سنه لو مجبتش إمتياز مش هعمل ماجيستير
على طول هيبقى فى تمهيدى دبلومه قبل الماجيستير إنما اللى بيحبب إمتياز بيعمل
الماجيستير على طول مش عاوز تفخر بيا وابقى دكتور جامعيه قد الدنيا



- حاضر يا بنتى مش هغصب عليكى ربنا يوفقك ويحققك أحلامك
قطفت زهره ورده من ورودها وأهدتها لجميلة قائلة: مبروك يا عروسه خطوبتك الأسبوع
الجاي

قالت جميلة باسمه: الله يبارك فيكى يا زهره عقبالك إيه هو فارس هيتقدملك إمتى
زهره فى قلق: وطى صوتك لحد يسمعنا بعد السنة دى هيجى يقابل بابا
قالت جميلة بعدم فهم: طيب ليه مش دلوقتى؟

قالت موضحة: خايفه لو بابا عرف إنى على علاقة بفارس يمنعنى أكمل الدراسه وكمان
يرفضه إنتى عارفه بابا أصوله صعيديه كلها سنه وتعدى بسرعه على فكره حنان جايه
النهارده من مصر علشان تحضر خطوبتك وتقضى معايا كام يوم

قالت جميلة فى شوق: بجد أنا نفسي أشوفها من وقت ما حكييتلى عنها

تفوه فارس عبر الهاتف: هتيجى إمتى يا زهره وحشتينى

قالت بحب: خلاص هانت الدراسه بعد عشره أيام

قال فارس بضجر: زهره أنا تعبت إمتى بقه نبقى مخطوبين زى أحمد وحنان وكمان حسن
وجميلة هيتخطبوا

قالت زهره: خلاص يا فارس كلها سنه واحده يا فارس بابا راجل صعيدي ميعترفش بحاجه
إسمها حب لو عرف إنى بحبك وبكلمك من وقت ما دخلت الجامعه هيفتكر إنى خنت ثقته فيا
علشان خاطرى يا حبيبى اصبر.

دخلت مديحه غرفه فارس كى ترتبها وجدت كتب على سريريه فحملتها كى تضعها على
الطاولة سقطت ورقه من إحدى الكتب انتبعت مديحه للورقه والتقطتها من على الأرض
وفتحها

(فارس منذ معرفتى بك منذ ثلاث سنوات عرفت معنى الحب أصبحت أطير على أجنحه
السعاده مثلما تطير الفراشات على رحيق الأزهار أتيت للجامعه كطفل رضيع أتى للدنيا للتو
بيكي ولم يجد سوى حضن أمه كى تضمه وتمسك بيده نحو الطريق الصحيح أمسكت بيدي
كدت أضل الطريق من دونك كنت أتعثر ولا أرى أمامى جئت فأنارت لى طريقى المعتم.



لا أدري بماذا أصفك بالمعلم أم بالأب الحانى أم الأخ والصديق أم الحبيب فأنت مزيج منهم وجود أشعرنى بأني زهره مدله في حقيقه قلبك أعلم بأنك تحبنى كثيراً وأنا أيضاً أحبك فهل يوجد مثيل لحب زهره لفارس؟

لو شعرت يوماً بوجود زهره أخرى تراحمنى في حقيقه قلبك سأشعر بتسلل الموت إلى قلبى اشتقت إليك كشوق الأزهار للمياه فمن دونها تذبل وتموت أريد أن أرتوى بقربك منى بحلم بذلك اليوم الذي نجتمع فيه سوياً أحببت تلك الحياة لوجودك فيها أسألك ألا تتركنى فتصيبني لعنه اليأس)

زهره مراد (زهره الفارس)

طوت مديحه الورقه بعدما قرأت ما بها وتعجبت لما قرأت حدثت نفسها قائلة: فارس بيحب ومن ثلاث سنوات وهي كمان بتحبه طب مقليش ليه أكيد الموضوع فيه حاجه علشان كده خبى عنى امسكت هاتفها واتصلت بشئون الطلبة قالت فى عجل:

إبعثلى إيميل حالاً بأسماء طلاب الكليه اللى درسلهم دكتور فارس من أول ما استلم الشغل في الكليه ، ظلت مديحه تبحث عن إسم زهره مراد فى القائمة الذى أرسلها لها موظف الشؤون عبر البريد إلى أن وجدته عادت لهااتفها مجدداً وخاطبت شخصاً دوماً ما تستعين به في البحث عن الالمعلومات التى تريدها

قالت مديحه: أكرم باشا عامل إيه في واحده عاوزه أعرف عنها كل حاجه اسمها زهره مراد إبراهيم محمد.

جاءها الصوت من الجبهه الاخرى: تمام يا دكتورة هتوصلك المعلومات النهارده

وقفت زهره فى البلكونه فى إنتظار صديقتها حنان

حنان إنتى فين دلوقتى هكذا قالت عبر الهاتف

- خلاص كده قربتى توصلى البيت أيوه هتلاقينى واقفه في البلكونه خلاص أنا شوفتك أهوه

دخلت زهره مسرعة لوالدتها قائلة: ماما حنان وصلت هنزل أجبها من تحت

التقت زهره بصديقتها على السلم وصاقتها قائلة: أهلا نورتى بلدنا يا حنان

حنان فى إرهاق: إيه ده يا زهره بلدكوا بعيده أوى إنتى عارفه ركبت موصلات قد إيه

همست بصوت خافض: قوليلى جيبتى الفستان



- أهوه بس هتقوليلهم إيه على الفستان
- هقول إنه بتاعك وجيبتهولى احضر بيه الشبكه
- زهره فارس باعتلك معايا حاجه كده
- حاجه إيه؟
- معرفش مفتحتهاش هو إداها لأحمد
- طيب خليها بعدين لما ندخل الأوضة
قالت فوزية بترحاب موجهه نظرها لحنان: أهلا يا حنان يا بنتى نورتي البلد زهره حكيتلى
عنك كثير

قالت حنان بود: الحمد لله يا طنط حضرتك عامله إيه وعمى مراد
قالت فوزية: كلنا بخير يا بنتى عمك مراد زمانه جاى مبروك صحيح على الخطوبه
قالت حنان بإمتنان: الله يبارك فيكى يا طنط عقبال زهره
أمسكت زهره بيد حنان قائلة: عن إذك يا ماما هاخذ حنان ترتاح في أوضتى
أومأت رأسها: ماشى يا زهره لو احتاجتوا حاجه أنا في المطبخ
دخلت زهره وصديقتها الغرفة تجولت حنان بنظرها فى الغرفة قائلة: اوضتك حلوه أوى يا
زهره

- عجبتك
- فين بقه الورد اللى إنتى زرعاه وداوشه دماغى بيه
- افتحى الباب ده هيطلعك للبلكونه
- ما شاء الله يا زهره كل ده ورد دى جنينه للدرجه دى بتحبى الورد ولا علشان اسمك
زهره

أجابتها ضاحكه: طبعاً الورد لازم يحب بعضه.
اعتدلت مديحة فى جلستها فور دخول فارس من باب المنزل وعقدت حاجبها قائلة: حمد لله
على السلامه يا فارس كنت فين لحد دلوقتى
قال فارس: ماما إنتى لسه صاحيه
قالت متجاهلة كلامه: كنت فين مردتش عليا
فارس فى إستغراب: أول مره تسألينى كنت عند أحمد



قالت بصبر: بطمن عليك يا فارس الوقت أتأخر وانت لسه بره البيت

قبل فارس يدها قائلاً: اطمنى يا ست الكل أنا كويس وزى الفل

قالت فى تفحص: قولى يا فارس أخبار رسالة الدكتوراه إيه؟

قال بثقة: خلاص يا ست الكل باقى شهر على المناقشه

- طيب يا فارس لما تبدأ الدراسه تقدم طلب اجازة من الكليه لعند ما تناقش الرسالة
- لا لا اجازة إيه مش محتاج اجازة متقلقيش أنا مضبط نفسي كويس عن إذك هدخل

أنام علشان تعبنا تصبى على خير.

حبيبتي عاملة إيه قوليلى وصلتى لبيت زهره هكذا قال أحمد عبر الهاتف

- أيوه يا حبيبى وصلت خلاص وقاعده مع زهره فى أوضتها

- حاضر هسلمك عليها مع السلامه يا روى

وضعت حنان هاتفها جانباً قائلة: أحمد ببسلم عليكى يا زهره

قالت زهره باسمه: الله يسلمه قوليلى يا حنان احمد عامل معاكى إيه مبسوطه

حنان فى فرح: مبسوطه! اول مره ابقى فرحانه كده زهره أحمد هو اللى خلانى اجيب جيد

جداً كان بيشجعنى على المذاكره على طول

- متفتتوش على معاد الفرع لسه

- أحمد قال بعد الكليه بعد سنه رابعه يا سلام يا زهره لو نتجوز كلنا فى يوم واحد أنا

واحمد وانتى وفارس

- يا ريت يا حنان ربنا يسمع منك

أخرجت حنان من حقيبتها علبة قطيفة قائلة: اتفضلى يا ستى الحاجة اللى بعتهالك فارس أنا

هطلع البلكونه اكلم ماما اطمئنها إنى وصلت

فتحت زهره العلبة القطيفه الذى أرسلها لها فارس وجدت بروشاً مصنوع من الفضة على

شكل فراشه ومزخرف باللون الوردى ووجدت معه ورقه مطويه فرحت كثيراً عرفت إنها

خطاب من فارس فتحتها تقرأ ما بها

(دعى تلك الفراشه تسترح على كتفك فقد أنهكها السفر والترحال والوقوف فوق الأزهار

باحثه عن الرحيق لفت كثيراً على الورود الجوريه وزهور البنفسج وزهر الياسمين ولم تجد

ما تبحث عنه وجدته فقط فى زهره الربيع وأرادت أن تتخذ من قلبك موطناً لها فاسمحي لها

(بذلك.)



ترقرقت عيني زهره من الفرحة وتحسست البروش بيديها

أنهت حنان حديثها مع والدتها ودخلت وحين وقع نظرها على البروش قالت في دهشة:

الله يا زهره البروش ده حلو أوى دى الهدية اللى بعتهالك فارس معايا ثم أنتبهت لعيني زهره الباكية فقالت في عجب:

- مالك بتعطى ليه يا نكديه؟

زهره بصوت ذات بحة: من الخوف يا حنان خايفة الفرحة دى تتسرق منى فجأه أنا قلبى ملك فارس وخايفه بابا يغصب عليا اتجوز عماد

اقتربت حنان من زهره واحتضنتها قائلة: ربنا هيجمعوكوا مع بعض يا زهره صدقيني شوقتي بقه نستيني خبر حلو أقولها لك أحمد لاقى شغل كويس لحسن أخوكى في الشركه اللى بيشتغل فيها في مجاله

مسحت دموعها قائلة: بجد يا حنان ده حسن هيفرح أوى

- أيوه محاسب جاله عقد عمل بره مصر وبيدوروا على حد يمسك مكانه وأحمد هيتوسطله

- ربنا يخليكى ليا يا حنان أنتى أحلى أخت في الدنيا دى كلها

- ده صوت بابا تعالى نطلع اعرفك عليه

قالت زهره لوالدها: حنان يا بابا صاحبتى من وقت ما دخلت الجامعه

قال مراد باسماء: أهلا يا بنتى نورتي البيت

مدت حنان يدها تصافح والد زهره قائلة: ربنا يخليك يا عمى

قالت زهره بحماس: أحمد خطيب حنان لاقى شغل لحسن في شركه كويسه أوى وبمرتب كويس يا بابا

قال مراد فى لهفة: صحيح ربنا يباركلك يا حنان يا بنتى ده جميل مش هتنساه

حنان بإمتنان: جميل إيه يا عمى حسن أخويا زى زهره ربنا هيكرمه إن شاء الله

قال مراد باسماء: ربنا يرضى عنك يا بنتى

انتهت زهره من تفريش أسنانها وانتبهت لرنين هاتفها

قالت بحب: فارس حياتى



قال بثقة: عجبك الفراشه؟

قالت بدلال: جميله اوى يا فارس أنا كنت أجمل واحده في خطوبه حسن وجميله لبست الفستان اللى جبتهولى وكمان حطيت الفراشه على كتفى

- كتفك اليمين ولا الشمال؟
- إيه السؤال الغريب ده! الشمال يا سيدي
- يعنى فوق قلبك كانت واقفه الفراشه أنا كده هغير من الفراشه
- أجابت زهره ضاحكه: صحيح الفراشه فوق قلبى بس هي وقفت علشان ملاقتش مكان تدخل لقلبي ثم أردفت بهيام:
- لأنك وحدك من تسكنه فكلما تنفست أشعر بأنك تتنفس معى وكلما فرحت أشعر بأنك تفرح معى وكلما تألمت أشعر بأنك تتألم

قال فارس فى دهشة: إيه ده مين علمك تقولى الكلام الحلو ده

- اتعلمت كل حاجه على إيدك
- صمتت للحظات ثم قالت: فارس عاوزه أسألك هو أنت محكتش لوالدتك عنى خالص
- قال فارس: لا يا زهره لسه بس متقلقيش هي مستتبه تسمع خبر ارتباطى دى هتفرح أوى قوليلي هتسافرى إمتى؟

- بكره الصبح متتصورش نفسي أشوفك قد إيه
- وحشتك؟
- وحشتنى أوى يا فارس قد البحر.
- أمسكت جميلة بيد حسن قائلة: مبروك يا حسن فرحتك أوى على الشغل الجديد يا حبيبي حنان دى بنت طيبه أوى

ربت على كتفها قائلاً: إن شاء الله الشغل ده يعوض ونجهز الشقه ونتجوز بقه

- يا رب يا حسن
- أمسكت حنان بجدول المحاضرات بين يديها ونظرت إلى زهره قائلة: زهره اسم دكتور فارس مش مكتوب في الجدول
- زهره باستغراب: وريني كده الجدول نظرت ثم رفعت رأسها وقالت بحزن فعلاً مكتوب اسم دكتور غيره يعنى فارس مش هيدرسلى السنة دى اخر سنه



أثناء حديثهما دخل العامل المدرج منادياً: الطالبه زهره مراد إبراهيم الطالبه زهره مراد إبراهيم

قالت حنان بدهشة: الحقى يا زهره بينادوا على اسمك

وقفت زهره ونظرت إلى العامل قائلة: أيوه انا زهره مراد

أشار العامل بيده قائلاً: اتفضللى معايا عميده الكليه طالبه تشوفك

زهره فى عجب: تشوفنى أنا!

قالت حنان موجهة حديثها لزهره: زهره عملتى إيه العميده طلبتك بالأسم ليه

زهره فى قلق: والله معملتش حاجه يا حنان هروح أشوف في إيه ربنا يستر

ذهبت زهره إلى مكتب العميده في خوف لا تدري ماذا فعلت طرقت الباب ودخلت .



الفصل الثالث

أنين الفراق

قالت زهره فى إرتباك: السلام عليكم حضرتك طلبتى تشوفينى

إزالت مديحة النظارة وتفحصتها قائلة: إنتى زهره مراد

قالت زهره فى خوف: أيوه أنا زهره مراد

قالت مديحة بغضب: أشيعة أقاويل بين الطالبات بإنك بتعملى علاقات مع المعيدىين مجلس الكليه قرر حرمائك من الإمتحان السنة دى نظراً لسوء سلوكك

صدمت زهره مما سمعت بكت قائلة: مين اللى قال كده كلام مش مطبوط أرجوكى يا دكتوراه دى آخر سنه وحرمانى من الإمتحان هيدمر مستقبلى أنا بريئه

قالت مديحة بحسم: ده قرار مجلس الكليه تقدرى ترجعى على بلدك والسنة الجايه تبقى تدخل فى الإمتحانات اتفضللى

خرجت زهره من مكتب العمدة لم تتمالك نفسها من الصدمة دخلت الحمام واتصلت بفارس

- فارس لازم اشوفك ضرورى لا مينفعش فى الكليه فى أى مكان بعيد عن الجامعه

قال فارس محاولاً تهدئتها: زهره اهدى بطلى عياط أنا هحل الموضوع

قالت بحزن: لا يا فارس متدخلش علشان مستقبلك إحنا مش لازم نتقابل ولا نكلم بعض تانى لعند ما اتخرج أنا بس مش عارفه أقولهم إيه فى البيت

قال فارس: زهره روحى دلوقتى على المدينه

زهره فى قلق: فارس هتعمل إيه أنا خايفه عليك وعلى مستقبلك

فاري بحسم: قولتلك روحى متقلقيش يا حبيبتى روحى بس دلوقتى يلا هكلمك بالليل

قال مراد لزوجة: الأكل جاهز يا فوزيه

صمتت للحظات ثم أجابت: أيوه يا أبو حسن

مراد فى تمنع: مالك يا فوزيه؟

قالت فوزية فى قلق: مش عارفه ليه قلقانه على زهره قلبى مقبوض ومش مرتاحه

- طيب كلميها



- كلمتها مردتش
 - تلاقىها في الكليه يا فوزيه
 - إيه بس اللي قلقك كده هنكلمها على المغرب تكون روحت
 دخل فارس منزلة وجد مديحة جالسة امام التلفاز انتبهت لقدمه قائلة: إنت جيت يا فارس
 أحضرلك الغداء يا حبيبى
 قال فارس بغضب: ممكن اعرف إيه اللي بيحصل بالظبط
 قالت بعدم فهم: بيحصل في إيه يا فارس؟
 صمت قليلاً ثم قال: ليه حطتينى في جدول الفرقه الأولى بعد ما كنت في الفرقه الرابعه
 أجابت فى هدوء: علشان جدول سنه أولى خفيف وأنت عندك مناقشه دكتوراه
 قال فارس بضجر: طيب ليه حرمتى زهره من الإمتحان؟
 قالت مستغربه: زهره! زهره مين يا فارس؟
 ثم أومأت برأسها كمن تذكر شئ: آه قصدك البنت اللي سلوكها مش كويس ابدأ دى سمعتها
 مش كويسه وكلام كثير بيتقال في حقها إنت إيه اللي شاغلك في الموضوع ده
 قال فارس فى غضب: ماما زهره بنت محترمه جداً ومش مضبوط كلامك إزاي قدرتى
 تكونى ظالمه أنا أسف إنى محكتلكيش عن علاقتى بزهره بس كنت مستنى الوقت المناسب
 هبت واقفة ثم قالت بصوت عالى: فارس فوق لنفسك يا حبيبى مش دى البنت اللي تستاهلك
 أنا سألت عليها وعرفت عنها كل حاجه بنت من عيلة بسيطه وغير معروفه متناسبش ابدأ
 عيلة المنشاوى
 قال بإعتراض: أنا كمان سألت على زهره وعرفت إنها بنت ناس ومن أصل صعيدى مش
 مهم تكون من عيلة كبيره وغنيه ومعروفه أبوها راجل تربوى فاضل إيه ذنبها علشان
 حبيبتى المهم إنها محترمه وبنت ناس والأهم أن قلبى اختارها ثم أردف قائلاً:
 ماما أنا أسف لو مرجعتيش عن قرار حرمان زهره من الأمتحان أنا هسيب البيت ومش
 هتشوفينى تانى ابدأ وهم مغادراً
 تبعته حاولت إيقافه قائلة: فارس استنى أنا بكلمك فارس
 خرج فارس من منزله مصدوماً لما فعلته والدته مع زهره



فتحت جمالات باب غرفة ابنتها وشبكت ذراعيها قائلة: حبيب القلب اللي رفضتى الدنيا كلها
علشان بيب يا نور يا نور بيب واحد فلاحه من الشرقيه

نهضت نور واقفة وقالت فى دهشة: ماما إنتى بتقولى إيه مش ممكن فارس يعمل كده
مسكتها من ذراعيها وقالت بغضب: فوقى بقه يا نور لمستقبلك وحياتك يا بنتى خالتك لسه
قافله معايا التليفون وحكىلى قد إيه فارس متعلق بالبنت دى وبقالهم ثلاث سنين مع بعض
وكمان ساب البيت علشان خاطرها

سقطت نور على الأرض مغشى عليها من هول الصدمة

- نور نور بنتى فوقى يا نور

مديحه إلحقينى نور اغمى عليها ومش بتنطق هكذا قالت جمالات لاختها مديحه عبر الهاتف
أسرعت مديحه لبيت أختها

ربتت على كتفها قائلة: إهدى يا جمالات الدكتور عندها وهيخرج يطمنا أهوه الدكتور طلع
خير يا دكتور

قال الدكتور: عندها صدمه عصبية واضح إنها زعلانة من حاجه تأخذ الدوا ده وبحذر من
الإنفعال والعصبية

هبت زهره واقفة ثم قالت فى دهشة: دكتور مديحه عميده الكليه تبقى والدتك

قال فارس: أيوه يا زهره

زهره فى عتاب: مقولتليش ليه يا فارس

قال فارس بضيق: خفت أقولك يا زهره

قالت زهره محاولة إستيعاب ما حدث: طيب وهي عرفت اللي بيننا إزاي

قال فارس بشك: مش عارف المهم يا زهره متقلقيش هتدخلى الإمتحانات السنة

نظرت إلية بتمعن: فارس هي قالتلك إيه عن إرتباطنا ثم أكملت كمن فارس دلوقتى فهمت كل
حاجه هي معترضه عليا وعاوزة تبعدنى عنك فارس رد عليا

قال فارس بحسم: زهره مفيش قوه تقدر تبعدك عنى اطمنى يا زهره أنا جنبك على طول يلا
بقه اوصلك علشان عندك محاضرات الصبح من بدرى تنزلى الجامعة.

مسحت جمالات على رأس ابنتها برفق قائلة: نور اقلقتينى عليكى يا بنتى



قالت نورا بغضب: أنا بخير يا ماما من هنا ورايح هشوف حياتي ومستقبلي

جماليات في دهشة: بجد يا نورا ربنا يريح بالك يا بنتي

خرجت زهره من الجامعه في طريقها إلى المدينه فجأه وقفت سياره سوداء بجوارها ونزل منها شابين جذبوها بقوه داخل السياره وهربت مسرعه

استعادت زهره وعيها بالتدريج وجدت نفسها في غرفه غريبه عنها وهيئتها يرثى لها حجابها سقط من على رأسها وملابسها مفككه ووجدت أمامها فتاه في عمر العشرينات شعرها منسدل ترتدى بنطال وبادي ونظاره سوداء تخفى الجزء الأكبر من وجهها

هبت زهره واقفة وقالت بفرع: إنتي مين؟ وعاوزه منى إيه؟ وإيه اللي جابني هنا؟

قالت الفتاه بتكبر: مش مهم أنا مين المهم أنا جيبتيك هنا ليه مدت يدها واکملت إيه رأيك في الصور دى بصى فيهم كده

نظرت زهره إلى إحدى الصور وجدت نفسها شبه عاريه وبجوارها شاب لم تعرفه

ظالت تصرخ وتصرخ إلى أن صفعتها تلك الفتاه على وجهها قائلة: إهدى علشان نعرف نتفاهم

الصور دى صورتهالك وإنتي متخدره يعنى متقلقيش أنا أخذتلك تذكاري بس محصلش حاجة تخيلي بقه يا حلوه الصور دى لو شافها فارس حبيب القلب طيب لو وزعنا منها شويه في الجامعه وشويه في المدينه بلاش يا ترى لو شافها أبوكي الراجل الصعيدي أكيد هيقتلك قاطعتها زهره في غضب:

- إنتي عاوزه منى إيه بالظبط وتعرفي فارس منين وليه عملتي فيا كده حرام عليكى

إنتي عارفه إني بريئه

قالت الفتاه بخبث: بس أي حد لو شاف الصور مش هيصدق إنك كنتي متخدره وأنا اللي خطفتك وصورتك جمب واحد تبعى بالمنظر اللي إنتي شيفاه قدامك ده

قالت زهره بألم: إنتي عاوزه إيه؟

الفتاه بحدة: تقطعي علاقتك بفارس نهائي لو عرفت إنك كلمتيه أو قابليتيه وقتها متلوميش إلا نفسك القرار قرارك تقدرى تخرجى لمكان ما إنتي عايزه

قالت زهره بحزن: بس أنا بحب فارس إنتي بتعملى كده ليه وهتستفادى إيه



قالت الفتاه بشدة: أنا بقول الكلام مره واحده بس قدامك خيارين تنسى فارس وتكملى دراستك وترجعى بلدك أهلك فخورين بيكى ولا تترفدى من الكليه بفضيحه ووقتها مش هتقدرى ترجعى بلدك.

قالت ماييسه فى زعر حين رات زهره وهياتها:

- زهره كنتى فين لحد دلوقتى ومالك متبهذه كده ليه
أجابتها زهره بصوت خافض: أنا أصلى عملت حادثه بسيطه وجت سليمه

قالت ماييسه بقلق: يا لهوى وجرالك حاجه يا زهره

قالت زهره بإقتضاب: الحمد لله يا ماييسه عدت على خير هنام وهبقى كويسه

استرخت على سريرها تبكي في صمت لا تدري ماذا تفعل رن هاتفها ولكنها اغلقته حين علمت بان فارس هو من يتصل ظلت تبكي بحرقه وألم إلى أن سمعت أذان الفجر فقامت توضأت وصلت وظلت تناجى ربها

- إلهي وحدك تعلم إنى لم أقترف خطأ تعلم إنى بريئه أسألك الستر

- إلهي أنت أرحم عليا من أمى وأبى كن بجانبى ماذا أفعل لمن ألجأ غيرك

لم تذهب إلى الجامعه ظلت في غرفتها بالمدينه وحدها فهناك ومايسه نزلوا للجامعه أخرجت عروسه الباليه التي أهداها لها فارس ووضعها أمامها وظلت تنتظر إليها وتبكي تاره وتحضنها تاره أخرى امسكت هاتفها وفتحته

رن هاتفها معلناً اتصالاً من والدتها التقطتة فى لهفة: ماما وحشتينى أوى يا ماما نفسي أنام في حضنك وتطبطبى عليا

قالت فوزية فى قلق: زهره قلقتيكى عليكى مبرديش ليه على تليفونك مالك يا بنتى بتعطى ليه

مسحت زهره دموعها وقالت بأسى: مش بعيط يا ماما عندى برد شديد فصوتى متغير

قالت فوزية فى قلق: طيب ما تيجى يا زهره لعند ما تخفى وبعدين ترجعى تانى

أجابت زهره محاولة لطمئنتها: لا أنا أخذت دوا وريحت النهارده منزلتش الجامعه هنام وهبقى كويسه ماما ادعيلى محتاجة لدعائك أوى

- ربنا يعافيكى ويستررك ويوفقك يا بنتى.



قالت مديحة فى قلق عبر الهاتف:فارس يا حبيبى ارجع البيت أنا خلاص لاغيت القرار يا فارس لاغيت قرار حرمان زهره من الإمتحان يا ابني تقدر تروح الكليه فى أي وقت تعالى يا فارس هتيجى يا حبيبى هستناك النهارده على الغداء

قال ببرود: حاضر هاجى سلام

انتظرت مديحة ابنها فى قلق فمهما حدث بينهما لم يصل الأمر إلى ترك المنزل وفور وصوله نهضت واقفة وقالت:فارس نورت البيت يا حبيبى

نظر إليها ثم قال: ماما أنا بحب زهره وهتجوزها

قالت بهدوء: فارس خلىنا نتكلم فى الموضوع ده بعد مناقشه الرساله المناقشه بعد بكره ركز يا فارس فى مستقبلك يا حبيبى ونتكلم بعد المناقشه ماشى

أجاب بإقتضاب: ماشى هدخل ارتاح فى أوضتى

فوجئت زهره بصديققتها حنان نظرت إليها فى دهشة : حنان إيه اللي جابك هنا

قالت حنان بقلق: جيت أشوفك يا زهره واطمن عليكى بقالك أسبوع مجتيش الجامعه فارس هيتجنن عليكى وهو اللي بعتنى المناقشه بكره يا زهره مناقشه الدكتوراه لاحظت عدم إهتمامها ثم أردفت:مالك فى إيه

قالت فى برود:عندى برد ومقدرتش أنزل الكليه

قالت حنان فى عجب:طيب مبتزدش على فارس ليه مش هتحضرى المناقشه

أجابتها متجاهلة سؤالا:حنان ممكن اطلب منك طلب

- طبعاً يا زهره
 - خدي الهدية دى إديها لفارس بس بعد المناقشه مش قبلها قوليله زهره تعبانة ومقدرتش تحضر وبعنتلك الهدية دى
 - حاضر بس طيب ما تستنى تديهاله إنتى أحسن
 - معلىش يا حنان مش هقدر البرد مكسر جسمى ولازم ارتاح لما أخف
 - حاضر يا زهره
- وقف فارس أمام لجنة التحكيم يتلقى المزيد من الأسئلة ويجاوب عليها إلى أن تم إعلان قرار اللجنة.



لقد تم منح الطالب فارس المنشاوى درجه الدكتوراه بتقدير إمتياز مع مرتبه الشرف فوقف الحاضرون جميعاً وقاموا بالتصفيق

حضنت مديحه إنها قائلاً: ألف مبروك يا دكتور فارس

قبل يديها قائلاً: الله يبارك فيكى يا ست الكل

نظر فارس بين الحاضرين لم يجد زهره وجد أحمد وحنان

قام أحمد حينما وجد فارس ينظر إليهما وتبعته حنان ليهنئوا فارس نظر فارس لحنان ثم قال:

- أومال فين زهره مجتش ليه

قالت حنان بعدم فهم: هي تعبانة شويه مش هتقدر تيجى بعثلك الهدية دى فرح فارس لتلك الهدية وأخذها

دخل فارس غرفته بدل ملابسه وفتح هديه زهره وجد ساعة فضية اللون أنيقه وبجوارها ورقه إلتقطها وفتحتها ليقراً

(فارس مبروك كنت على علم بانك ستمنح الدكتوراه بإمتياز فكتبت خطابى هذا كى أهنئك قبل أن أودعك فارس لم تعد فارس الأحلام كما لم أعد زهره الربيع لقد تمادينا في أحلامنا غارقين في نهر من العسل ناسين القدر والمجتمع والظروف كلهم إجتمعوا كى يفرقونا ولقد نجحوا في تحقيق هدفهم ثرى يا فارس لم ارتكب خطأ لكنى سأصبح مذبذبه في نظر المجتمع فلا يهمنى المجتمع من يهمنى هو أنت ماذا يحدث؟ لو رأيت زهرتك في وضع مخجل وحالة يرثى لها وكل الأدله والبراهين تثبت بانى مذبذبه ستصدق الأدله والبراهين أم ستصدقنى حين أقول بانى بريئه لن أنتظر كى تأتى هذه اللحظه لا أريد أن ترانى في حاله يرثى لها ووضع مخجل فلنفترق على صورتى الجميله في مخيلتك تخيل أن عاصفه شديده أنت فألقت بزهرتك مع الأتربه في إتجاه العواصف ذاهبه بها إلى بلد بعيدة يوماً ما ستجد زهره أخرى غيرى كى ترويه وتعتنى بها وتصبح زهره حياتك وداعاً يا من أحببت .)

انتهى فارس من قراءه الخطاب تلك الخطاب الذي بدل حاله وزرع في رأسه الشكوك والأسئله أعاد الخطاب مكانه بجوار الساعه وألقى بهما في أرجاء غرفته

غريب تلك القدر وكأنه يعاقبنا على سعادتنا في ذلك اليوم الذي فرح فيه بالدكتوراه أصاب قلبه بجرح لا يعلم سببه

قالت حنان لصديقتها عبر الهاتف: زهره أنا عوزاكى ضرورى إنزلى قابلينى في الحقيقه اللى جنب المدينه في المكان اللى بنقعد فيه



قالت زهره في ضجر: حنان أنا مش قادره انزل ومش عاوزه أخرج ولا اروح في أي مكان

قالت بإلحاح: زهره إنزلي أنا لوحدي عوزاكي في موضوع مهم

قالت زهره بإستسلام: حاضر يا حنان جايه هلبس وانزل على طول

وصلت زهره إلى الحديقة فلم تجد حنان أخذت تبحث عنها يميناً ويساراً إلى أن تفاجأت بوجود فارس أمامها ناظراً إليها في غضب ثم قال:

- في إيه مبترديش عليا ليه وإيه الكلام اللي كتبتھولي في الجواب ده أنا مش فاهم حاجه قالت زهره في دهشة: فارس إيه اللي جابك هنا أنت طلبت من حنان تديني معاد هنا فارس بضجر: مكنش في طريقه غير دي علشان أتكلم معاكي ممكن افهم في إيه؟

خفضت رأسها إلى أسفل قائلة: فارس إحنا لازم نفترق

قال فارس في عجب: نفترق! وقدرتي تقوليها يا زهره نفترق ليه إيه اللي حصل إزاي بتحبيني وعاوزه نفترق

قالت في ألم: فارس أنا مبقتش بحبك

مسكها في ذراعها في عنف قائلاً: إنتي كدابه بصي في عيوني وقوليلي إنك مش بتحبيني ووقتها همشي ومش هتشوفي وشي تاني

نظرت زهره في عينيه لم تتمالك نفسها ظلت تبكي وصمتت عن الكلام

قال فارس بإلحاح: في إيه اتكلمي لازم اعرف في إيه؟ اتكلمي يا زهره

لم تحتمل وقعت مغشياً عليها بين ذراعيه حملها وذهب بها إلى المستشفى إنت متأكد إنك شوفتهم مع بعض؟ هكذا تقوه نورا بهذه العبارة عبر الهاتف ثم سمعت صوت والدتها فأنهت المكالمة سريعاً

قالت جمالات: كنتي بتكلمي مين ومالك اتخضيتي كده ليه؟

قالت بارتباك: كنت بكلم واحده صحبتي

- طيب تعالى ساعديني في الأكل خالتك وفارس زمانهم على وصول

- يعني كان لازمها إيه العزومه دي يا ماما

- يا بنتي فارس أخذ الدكتوراه بلاش نعمله واجب

- ويا ترى الدكتور فارس هيبجي ولا هيبكون مشغول بحجات تافهه



قالت مديحة في عصبية عبر الهاتف: فارس أنت فين يا ابني مستنياك علشان نروح عزومه خالتك

قال فارس في عجلة: روى إنتى يا ماما وأنا شويه وهاجى وراكى على هناك ورايا مصلحه مهمه هخلصها واجى على طول

قال فارس مخاطباً الطبيب المشرف على حالة زهره: خير يا دكتور

قال الطبيب: مفيش حاجه تقلق واضح إنها وقعت تحت ضغط ومستحملتش هى حالياً كويسه وفاقت تقدر تظمن عليها بس لازم تفضل في المستشفى لبكره نعملها شويه فحوصات زيادة اطمئنان

قال فارس بحرص: اللى تشوفه يا دكتور اعمل اللازم

دخل فارس غرفة زهره بالمستشفى نظر إليها في حنان: حمد لله على سلامتك يا زهره الدكتور طمنى بس هتفضل في المستشفى لبكره علشان يعملوا شويه فحوصات

قالت بإرهاق: فارس روحنى أنا عاوزه امشي ودينى المدينه

قال فارس: زهره هنستنى لبكره

- فارس أنا بقيت كويسه علشان خاطرى وصلنى أحسن ما أقوم اركب تاكسى

- ماشى يا زهره

ساعدوها في الوقوف قائلاً: حاسه إنك تقدرى تمشى لعند العربيه ولا اشيلك

- لا لا همشى بقيت كويسه

قال فارس بلين: زهره أنا مش هسألك في إيه تانى إهدى وروحي إرتاحى ويبقى نتكلم بعدين إنتى لما تفكرى في هدوء هتيجى تحكىلى علشان دائماً بتفكرى معايا وبتحكلى على كل حاجه ومبتقدرىش تاخذى قرار لوحدك من غير ما تاخذى رأى

فتحت نورا باب المنزل بعدما سمعت جرس وجدت مديحة نظرت يميناً ويساراً ثم قالت: أومال فين فارس يا طنط مجاش ليه

قالت مديحة: هيجى عنده حاجه مهمه بيعملها وجاى

قالت نورا بضجر: حاجه مهمه! ماشى يا خالتو اتفضلى.

وصل فارس منزلة في وقت متأخر من الليل بعدما أوصل زهره للمدينة الجامعية



وضع المفاتيح طاولة السفرة ثم اشتعل النور فجأة ووجد والدته في إنتظاره
 قالت مديحة بغضب: كنت فين لحد دلوقتي يا فارس مجتش العزومه ليه كسفتني مع خالتك
 وجوزها عاملين العزومه علشانك ومتجيش
 أجاوب فارس بإقتضاب: معلش يا ماما أحمد كان تعبان وكنت معاه مكنش ينفع اسيبه الله
 يخليكي سيبيني أدخل أنام علشان تعبان
 استرخى على سريريه يفكر في حيره تدور الأفكار في رأسه لعله يجد سبباً لما فعلته زهره
 قالت حنان بقلق: زهره إنتي مبتجيش الكليه ليه لسه عندك برد كل ده
 زهره في إرهاب: حنان ليه تابعه نفسك وجايه المدينه
 قالت حنان بشك: جيت أشوفك يا زهره أحوالك مش عجباني هو إنتي مش أختي ليه مش
 بتشاركيني في مشاكلك دي آخر سنه في الكليه نسييتي حلمك
 قالت جميلة بفرح: إيه الشياكه دي كلها يا حسن
 قال حسن بثقة: رايح الشغل الجديد يا ستى وجيت أصبح عليكي علشان يومى يبقى حلو
 - أنت مسافر القاهره دلوقتي
 - أيوه هروح وهاجى كل خميس
 - هتعدى على زهره هناك
 - لا يا جميله الشغل بعيد خالص عن زهره هبقى أكلّمها اطمئن عليها
 - حسن أو عى البنات هه أحسن أنا عارفه بنات مصر كويس
 أجاوبها ضاحكاً: إنتي وبس اللي جوه القلب
 - سلام بقه يا حياتي علشان متأخرش
 قالت حنان فى صدمة: يا لهوى يا زهره كل ده يحصل معاكى ومعرفتيش مين البنت دي ولا
 حتى اسمها
 قالت زهره باكية: معرفش ومش عارفه اعمل إيه خايفه احكى لفارس ميصدقنيش واتصدم
 غير إنها هتفضحنى وتبعت صورى لبابا ممكن يموت فيها
 قالت حنان: زهره إنتي لازم تحكى لفارس
 زهره فى خوف: خايفه يا حنان صورتى تنتشوه في نظره وميصدقنيش وقتها هتصدم اخترت
 إني أفارقه صحيح هتعذب في بعده عنى بس هيبقى أفضل لما يشوف صور زى دي يا حنان



مسكت حنان يديها برفق قائلة: حبيبتي فارس بيحبك من وقت ما جيتي الجامعه وانتى معرفتيش حد غيره اكيد هيصدقك لازم يا زهره يعرف أحسن ما يشوف الصور ويتقاجئ ووقتها يشك فيكى

قالت زهره بإقتناع: إنتى شايفه كده يا حنان

- أيوة يا زهره لازم

- خلاص هكلمه النهارده وانزل اقباله وربنا يقدرنى واحكيه فارس أنا عاوزه أشوفك بعد ما تخلص محاضرات في نفس المكان تفوهت زهره بتلك الكلمات عبر الهاتف

جاءها الرد من الجهة الأخرى: حاضر هخلص واكلمك

وجد فارس مطروف على مكتبة فنادى العامل مستفهماً: عم محمود عم محمود

جاء العامل مهزولاً: أيوه يا دكتور فارس

قال فارس مستفهماً: إيه الظرف اللي على المكتب ده

أجاب العامل: ده ظرف واحد جبھولك هنا وحطيته على المكتب

فارس بإستغراب: واحد! متعرفش مين

قال العامل: لا مقلّيش هو مين

- تمام اتفضل انت واعملى قهوة مضبوط

فتح فارس المطروف لم يتمالك نفسه مما شاهد امسك بهاتفه وقال بغضب عبر الهاتف: إنزلى حالاً قابلينى

قالت زهره بعدم فهم: دلوقتى مش قولتلى بعد ما تخلص المحاضرات

قال بشدة: أنا بقولك تنزلى دلوقتى يعنى دلوقتى ثم أغلق الهاتف

شاهدت زهره فارس من بعيد ووجهه يملؤه الغضب ويحمل في يده مطروفاً اقترب منها ثم قال: نعم أنا سامعك إيه اللي خلاكى تقولى لازم نفرق

نظرت إليه أرادت ان تحكى خانتها قوتها ولم تستطع فصمتت

قال فارس بغضب: مش قادره تقولى إنك خدعتينى بقناع البراءه اللي كنتى لابسه على طول

صدمت مما قال قالت: فارس بتقول كده ليه أنا



صفعها على وجهها وأخرج الصور من المظروف أمامها
أجهشت بالبكاء إمسكها من ذراعها بقوه قائلاً: جاوبيني أنتى اللى فى الصورة دى
قالت باكية: فارس أنا بريئه
فارس بصوت يملؤة الغضب: جاوبيني أنتى اللى فى الصورة ولا واحده تانيه
خفضت رأسها ثم قالت: أنا يا فارس بس أنا بريئه اسمعنى
قال بغضب: أنا إزاي اتخدعت فيكى
قالت برجاء: فارس أنا بريئه
هم مغادراً
قالت فى رجاء: لا يا فارس استنى اسمعنى لازم أتكلم أنا معملتش حاجه فارس متسيبنيش
فارس
تركها ورحل جلست على الأرض تبكي لظن فارس بها قائلة: إزاي تظلمنى كده يا فارس
انتبهت لقدوم حنان مسرعة: قومى يا زهره
قالت بحسرة: حنان إنتى جيتى شوفتى فارس عمل فيا إيه
أسندتها برفق: قومى يا زهره أوصلك ترتاحى
زهره فى ألم: فارس يا حنان فارس مصدقنيش
قالت حنان بأسى: معلىش يا زهره هو مصدوم دلوقتى سيبه أما يهدى ويفكر مع نفسه
هيعرف إنك بريئه
انتفضت فوزية من نومها فى ذعر قائلة: يا ساتر يا رب أعوذ بالله من الشيطان الرجيم
استيقظ مراد قائلاً: في إيه يا فوزيه إيه اللى قومك من النوم مفزوعه كده
قالت فى قلق: كابوس يا أبو حسن شوفت زهره فى مكان ضلمه بتصرخ وتنادى عليا أنا
قلقانه أوى يا مراد عليها
ربت مراد على كتفها قائلاً: طيب نامى دلوقتى وبكره نبعتلها عماد يتظمن عليها ويظمننا
قالت مديحة: فارس الأكل جاهز تعالى اتعشى فارس مبتردش عليا ليه



قال فارس بحزن: سيبيني لوحدي دلوقتي يا ماما

- مالك يا فارس من ساعة ما جيت من بره مخرجتش من أوضتك

- مفيش تعبان وهنام سيبيني بقة دلوقتي

حاضر يا فارس خرجت مديحه وأغلقت باب الغرفة ورائها

داعبه السهر ولم ينم ظل يفكر فيما حدث ممسكاً خطابها بيده قرأه مرات عديدة حدث نفسه قائلاً: معقول تكون دي زهره اللي حبيتها معقول تكون دي البنت اللي عرفت بس أنا ليه حاسس إنها بريئه بس إزاي وهي اعترفت إن دي صورتها أنا ربيتها على إيدي من وقت ما جت الجامعه كانت متعرفش حاجه عن أي حاجه علمتها إزاي تتعامل مع الناس وإزاي تتكلم من وقت ما شوفتها حسيت إنها بنتي قبل ما تكون حبيبتي.

ساعدت حنان صديققتها في الإسترخاء: زهره نامي دلوقتي متفكريش في حاجه أنا لازم امشي علشان اتأخرت هكلمك بالليل اطمئن عليك

أوقفها زهره قائلة: حنان إنتي مصدقاني مش كده مش معقول إنتي كمان تشكي فيا

قالت حنان بدهشة: إنتي بتقولي إيه يا زهره طبعاً أنتي أختي وعرفاكي كويس وفارس كمان عارف إنك بريئه بس هو مصدوم شويه وكمان في حلقه مفقوده عنده لما يهدى ويفكر كويس هيرجع يتناقش معاكي

مش ممكن تكون بريئه يا فارس هكذا قال أحمد لفارس

أجاب فارس بشك: أيوه يا أحمد لكن الصور دي إيه مفيش دخان من غير نار

قال أحمد مفكراً: فارس في لغز في الموضوع بدل ما تظلمها اقعد معاها واعرف إيه الحكايه

- أحمد أنا مش عاوز اشوفها ولا حتى اسمعها

- طب اهدي يا فارس ربنا هيحلها.

امسكت زهره بصورة فارس تحدثها وهي باكيه: فارس كيف لك أن تحكم على زهرتك بالإعدام من دون أن تسمع دفاعها أيعقل أن يعدم المتهم دون الدفاع عن نفسه وكيف صدقت تلك الخدع وظننت بي سوء

قلبي تسمم من نظراتك الحادة وكلامك القاسي وظنونك في برائتي وكيف لقلب تجرع السم أن ينبض من جديد يا ليتني ما حلمت وأتيت إلى هذه البلد كي أحقق ذلك الحلم يا ليتني ظللت حبيسه في غرفتي مقيدة أحلامي بجوارى يا ليتني لم أقابلك

يا ليتني يا ليتني يا ليتني



وآه على جرح لم يلتأم أیحتمل قلبی فراقك أم یحتمل ظنونك؟

قالت فوزية بقلق عبر الهاتف: زهره أنا هموت من القلق علیکی یا بنتی

قالت محاولة التماسك: الحمد لله یا ماما بخیر إنتوا کویسین بابا عامل إیه وحسن استلم الشغل الجديد

قالت فوزية بحرص: زهره ابعتلك عماد یحبیک

- لا یا ماما تبعتی عماد لیه أنا بقیت کویسه وهنزل الجامعه من بکره

تفاجئت حنان بزهره فی الكلية اقتربت منها قائلة: حمد الله علی سلامتك یا زهره الكلية نورت والله

قالت زهره: الله یسلمک یا حنان مفیش أخبار عن فارس أنا نفسي أشوفه أتكلم معاه

- طیب ما تروحيله المكتب یا زهره

- خایفه یا حنان یقابلنی بطريقه مش کویسه مش هقدر استحمل

- تعالى یا زهره هنروح سوا واسییک معاه

وصلت الفتاتان للمكتب وجدتا الباب مفتوح ولم یوجد احد بالداخل قالت حنان: ده مش موجود فی المكتب طب استنی هروح اسأل العامل

رجعت حنان لزهره قائلة: بیقول عنده محاضره للفرقه الأولى فی مدرج ٩ فوق خلاص بقه یا زهره أما تخلص المحاضره نبقی نازل تانی أنا هروح الکافیتريا أجیيلک حاجه معایا

قالت زهره: لا یا حنان هرجع أنا المدرج استناکی هناك

لم تمنع زهره نفسها من الذهاب لمدرج ٩ مدرج الفرقة الأولى دخلت من الباب الخلفی وجلست وسط الطلبة فی الخلف تستمع المحاضره وتتنظر لفارس وتحدث نفسها فی ألم: أراک أمامی ولا أستطيع التحدث إلیک لا تفصلنا المسافات الطویله ولكنک لا ترانی ولا تشعر بی ماذا فعلت کی تعاقب قلبی ما ذنبه لأنه عشقک لا أستطيع لمسک ولا رؤية عیناک عن قرب.

قال فارس: مساء الخیر یا ست الكل

أجابتة مديحة بترحاب: فارس حبیبی مساء النور

قال فارس: أنا هسمع كلامک واخطب نورا



قالت بدهشة غير مصدقة: بجد يا فارس بتتكلم جد مش مصدقه والله دى هيجر الها حاجه لما تعرف من الفرحة

- أيوه يا ست الكل كلميهم واتفقوا على كل حاجه
- حاضر هكلمها دلوقتى فين الموبايل كان هنا دلوقتى
قالت مديحة عبر الهاتف بصوت يملؤ الفرحة: نورا حبيبتي هقولك على خبر بس امسكى نفسك هه

قالت نورا بدهشة: بجد يا خالتو أنا مش مصدقة قلبى هيقف من الفرحة
أغلقت نورا الهاتف وجرت على والدتها وقالت فى لهفة: ماما يا ماما أنا عاوزه أروح الكوافير وعاوزه اشتري فستان وميكب وكمان شوز
نظرت إليها جمالات فى عجب: مالك يا نورا مش على بعضك ليه
قالت بفرح: فارس يا ماما أخيراً حس بيا وهيجى هو وخالتو يخطبنى النهارده
قالت بدهشة: بجد إيه اللى غير رأيك كده

قالت بارتباك: أنا عارفه يا ماما مش مهم المهم إنه هيجى أنا فرحانه أوى أوى عن إذك يا دوب الحق أجهز نفسي

قال أحمد فى دهشة: خطوبتك على بنت خالتك! أنت مقتنع بالخطوبه دى يا فارس

أجاب فارس: أيوه يا أحمد مش هتيجى

قال أحمد بشك: لا أكيد هاجى بس أنت مش حاسس إنك اتسرعت ثم اكمل: فارس طيب وزهره

قال فارس بإقتضاب: أحمد أنا نسيت الموضوع ده ومبقتش بفكر فيه.

تجلس زهره كعادتها كل ليله تشاهد عروسه الباليه وهي ترقص على أنغام الموسيقى كأنها أصبحت صديقتها بعد غياب فارس عنها

قالت زهره بآلم: حنان أنا قلقانه على فارس أوى حنان مبترديش عليا ليه مالك يا حنان

حنان فى حيرة: زهره أنا مش عارفه أقولك إيه حاولى تنسى فارس يا زهره وركزى على دراستك ومستقبلك



زهره فى إستغراب: ليه بتقولى كده يا حنان إزاي إنسى فارس إنتى تقدرى تنسى روحك فارس روحى يا حنان

قالت حنان: زهره خطوبه فارس النهارده على بنت خالته زهره ألو ألو روحتى فين أحمد لسه مكلمنى وقالى ألو زهره ردى عليا

أقلت زهره بهاتفها على الأرض كما مدت يدها وأقلت بعروسه الباليه ذلك الخبر الذي زلزل كيانه واقتلع قلبها من مكانه ففارسها سرعان ما وجد زهره غيرها ليعطيها قلبه ولم تعد زهره الفارس فارس لقد طعننتى بخنجر آخر في قلبى ليتك أنتظرت كى اشفى من جرحى الأول لكنك قسوت على وألحقتنى بجرح آخر أى طبيب يداوى تلك الجروح لا يصلح إلا استئصال القلب ووضع آخر مكانه قلب لا يشعر ولا ينبض ولا يكثرث لأحد.

قال مراد فى عجلة: فوزيه يا فوزيه عماد لسه مجاش كلميه تانى

قالت فوزية بقلق: في إيه يا أبو حسن أنت مخبى عليا إيه

قال مراد: كلمونى من المدينه يا فوزيه علشان أروح أجيب زهره مريضه ومش عارفين مالها عاوز عماد ياخذ عربيه ويروح يجيها بسرعه

وضعت يدها على صدرها قائلة: بنتى يا ساتر يا رب

مراد محاولاً تهدئتها: اهدي يا فوزيه أهوه عماد جه

عماد الله يخليك يا ابني زهره مريضه خد عربيه وروح هاتها

قالت نورا بفرحة عارمة: فارس بقالى سنين بحلم باليوم ده بحلم بيه من وإحنا صغيرين فاكرو لما كنا بنلعب مع بعض وعروستى اتكسرت وفضلت ابكى وانت روحت اشتريتلى عروسه غيرها علشان مزعلش

قال فارس: ياه يا نورا ده مر زمن

قالت بحب: فارس أنا بحبك أوى

قال مغيراً الموضوع: قوليلى بقه ناويه تعملى إيه مش ناويه تعملى ماجيستير بعد ما اتخرجتى

قالت ببرود: لا ماجيستير لأيه هو أنا محتجاه في إيه يعنى



فارس متعجباً: محتجاه في إيه! هو لازم تحتاجي الماجيستير علشان حاجه تاخديه علشان طموح تبقى في مكانه كبيره ومركز كويس

- أنا من عيلة كبيره وغنيه ومش محتاجة للتعليم أصلاً
 - اسمحيلي يا نورا وجهه نظرك خطأ ثم أكمل قائلاً:
 - ليس الفتى من يقول كان أبى ولكن الفتى من قال ها أنا ذا.
 - ماشى يا سيدي تعالى أوريلك فستان شوفته على النت وعجبنى أوى
- قال مراد مخاطباً الطبيب: خير يا دكتور زهره عندها إيه:

- ولا حاجه متقلقوش هي بس مناعتها ضعيفه وضاغطه أعصابها شويه يمكن علشان الإمتحانات أنا كتبتلها على مقويات ولازم تاكل كويس
- قال مراد: وصل الدكتور يا عماد

احتضنت فوزية ابنتها قائلة: زهره إيه اللي جراك

قالت زهره بإرهاق: ولا حاجه يا ماما أنا دوخت فجأه يمكن علشان مأكلتش كويس

قالت فوزية بعتاب: ليه كده يا زهره وبعدين ضاغطه أعصابك ليه هو إنتى أول مره تمتحنى

قال مراد: سيببها ترتاح يا فوزيه وقومى جهزيلها الأكل

ظلت زهره نائمه في سريرها تتجول بنظرها في أرجاء الغرفه كأنها تبحث عن شيء ما تلك الغرفه تمت لو لم تكن خرجت منها صحيح أنها سجن يعزلها عن العالم لكنها داخل السجن لم يحترق قلبها كما هو حاله الآن ظلت تحدث نفسها:

فارس لقد أصبح وجهى شاحباً ولم تقدر قدمى على حملى الموت يداعبنى لقد أخبأت قلبى في قاروره محكمه الغلق وألقيتها في بحر عال الأمواج كى أحافظ عليه من العشق وآلامه ولكنى لم انجح في تحقيق هدفى وحدك من عثر على تلك القاروره وأطلقت سراح قلبى منها ولكنك أسرته بعشقك ماذا أفعل الآن ألم تعد أنتظرك حين يأتى الصباح مع قدوم العصفير وشروق الشمس وحين يأتى المساء عند ظهور القمر انظر إلى النجوم كل ليله وأرسل معها أشواقى إليك عد يا فارس عد كى أنظر إلى وجهك وأقتبس من عينيك قدر من الزمن أقوى به على الحياه عد كى ارتمى بين ذراعيك ابكى وأشكو منك اشتقت لأحضانك اشتقت أن تضمنى إلى صدرك وتربت على كتفى اشتقت لصوتك أريد أن أسمعك تناديني (أنا هنا يا صغيرتى)

ألم تأت؟ حسناً أعد إلى قلبى المسكين إذن كى أداويه



هنزل أقابلك بعد نص ساعة في نفس المكان هكذا همست نورا في الهاتف أغلقت الهاتف وتفاجئت بوجود فارس خلفها

قال فارس بشك: كنتى بتكلمى مين يا نورا

قالت بارتباك: فارس حبيبى دى واحده صاحبتى عوزانى أروحلها هنزل بقه علشان متأخرش عليها

أوما برأسه: ماشى يا نورا خلى بالك وإنتى سايقه

- حاضر يا حبيبى

خرجت نورا من منزل فارس ذاهبه إلى إحدى المقاهى الحديثه تبعها فارس بسيارته من دون أن تراه فقد شك بعد سماعه لها تتحدث في الهاتف لشخص وكذبت عليه وقالت أنها صديقتها وجدها جلست مع شاب وجهه مألوف بالنسبه له جلسا سويا يتحدثان لبضع دقائق ثم خرجت نورا من المقهى وركبت سيارتها وغادرت ، دخل فارس المقهى بعد مغادرتها ذاهباً إلى الشاب كان لازال متواجدا ولم يغادر فور مغادره نورا

نظر إليه الشاب تعجب الشاب من وجوده وقال فى دهشة: دكتور فارس المنشاوى!

تفحص فارس فى وجهه قائلاً: أنت تعرفنى؟

أجاب الشاب: أيوه أنا محسن طالب في كليه الآداب حضرتك درستلى لمدى ٣ سنين

قال فارس: ممكن أعرف نورا خطيبتى كانت قاعده معاك ليه في إيه بينك وبينها

قال بارتباك: نورا مين مكنش في حد قاعد معايا يا دكتور فارس

فارس بغضب: أنا لسه شايفها وهي خارجه ولو مقولتش كل حاجه هقعديك في سنه رابعه عمرك كله

قال محسن فى إستسلام: هقول لحضرتك على كل حاجه

لكمه فارس في وجهه عده لكلمات بعد سماع حديثه قائلاً: بقه أنت ونورا اللي عملتوا التمثليه الرخيصه دى علشان تشوهوا صورته زهره قدامى عملتلك إيه زهره

وضع يده على أنفه قائلاً: علشان حبيبته وكنت كل لما أتكلم معاها تصدنى وتحسنى إنى أقل منها واتصاحبت على حنان علشان أوصل لها معرفتش علشان كده لما كلمتنى نورا مصدقت قولت فرصه انتقم منها



ضربه فارس مره أخرى قائلاً: هو اللي زيك وزى نورا بيعرفوا يحبوا
خرج فارس من المقهى غاضباً فقد ظلم حبيبته وجرحها من دون أن يسمع لها فبأى وجه
يذهب لها وهل ستسامحه؟

قاده عقله إلى منزل خالته كي يفرغ غضبه في نورا تلك الفتاة تحولت إلى وحش كاسر
ودبرت مكيدة لزهرة بسبب غيرتها حين علمت أن فارس يحبها ويفضلها عليها
حين تتسلل نار الغيرة إلى قلب إمراه لا أحد يستطيع إخمادها.

قالت جمالات بترحاب: أهلا يا فارس نورا في أوضتها هندها لك
لم يهتم فارس لما قالت ودخل غرفة نورا وصفعها على وجهها عدة صفعات سقطت على
الأرض وقال بغضب: إيه اللي انت عملتيه في زهرة؟
قالت باكية: فارس أنا أنا
قاطعها قائلاً: أنا كنت مع محسن وعرفت كل حاجه يا شيخه حرام عليكى عملتك إيه علشان
تدمريها

قالت نورا بألم: هي اللي دمرتني أخذتك مني يا فارس ودمرت كل أحلامي وكسرت قلبي
فارس بضجر: إنتي إنسانه حقوده وأنا ميشرفنيش ارتبط بواحد زيك وهم مغادراً
قالت برجاء: فارس استنى أنا عملت كده علشان بحبك فارس
غادر فارس غاضباً وركب سيارته وقادها بسرعه البرق
قالت جميلة بقلق: مالك يا زهرة لما حسن كلمني وقالى قلقت عليكى وجيت أشوفك احكيلى
فارس مزعلك ولا إيه

قالت زهرة بأسى: جميله أنا مش قادره أتكلم

- ماشى بلاش تتكلمى يا ستى بس كللى أي حاجه علشان خاطرى بلاش علشان
خاطرى علشان خاطر الورد بتاعك
- والنبى يا جميله تقومى ترويه لأحسن مش قادره
- حاضر يا ستى من عيونى بس يا زهرة باقى شهرين على إمتحاناتك دى آخر سنه
لازم تبقى قوية وتجيبى تقدير زى كل سنه أنا هقوم بقه لأحسن ماما زمانها هتنادى
عليها سلامتكم يا قمر



فارس حاسب يا فارس هتقع فارس فارس تمتت زهره بهذه الكلمات وقامت مفزوعة من نومها

جاءت فوزية مسرعة واحتضنت بنتها قائلة: بسم الله الرحمن الرحيم زهره بتصرخى ليه يا بنتى

قالت باكية: شوفت كابوس يا ماما أنا خايفه أوى يا ماما

قالت فوزية: من إيه يا بنتى أنتى أكيد محسوده

حضنت فوزيه إبنتها ورددت بعض آيات من القرآن ثم تركت ابنتها وخرجت من الغرفة قالت زهره بخوف عبر الهاتف: حنان مبترديش عليا ليه أنا قلقانه على فارس شوفت حلم وحش من شويه حنان متخبيش عنى في إيه

قالت حنان فى ضجر: مكلمانى في نص الليل علشان تسألينى على فارس مفيش حاجه يا بنتى آخر مره أحمد شافه كان يوم خطوبه فارس ارحمى نفسك يا زهره

قالت زهره بغضب: سلام يا حنان

غضبت زهره من صديقتها وأغلقت الهاتف في وجهها رن هاتفها من جديد ظنت انها صديقتها حنان فأجابت قائلة

- أيوه يا حنان

جاءها الصوت من الجهة الأخرى: أنا مديحة المنشاوى

اعتدلت زهره فى جلستها وقالت فى دهشة: دكتوراه مديحه المنشاوى

قالت مديحة باكية: زهره فارس عمل حادثة ودخل فى غيبوبة ابني هيروح منى يا بنتى تعالى إنتى الوحيدة اللى تقدرى تخففى عنه

هبت زهره واقفة من على السرير فى صدمة وقالت: حضرتك بتقولى فين فى أى مستشفى أنا مسافة الطريق وأجى

فتحت زهره دولابها فى لهفة وقلق تبحث عن شئ ترتديه

دخلت فوزية تطمئن على ابنتها وجدتها ارتدت ملابسها نظرت لها فى دهشة قائلة: زهره رايحه فين وإنتى عيانه



قالت زهره: ماما لازم أسافر القاهرة دلوقتي حنان كلمتني وقالتلي في إمتحان مهم بكرة ولازم احضر

- أيوه بس إنتي عيانه
- ده إمتحان يا ماما مينفعش اغيب وبعدين بقيت كويسه
- هتسافري بدري كده يا زهره
- يوه يا ماما الفجر أذن من شويه والنهار طالع أهوه أقولك نادی عماد يوصلني علشان تبقى مطمئنه.

قالت جمالات بغضب: كده يا نورا كل ده يحصل ومن ورايا أنا رببتك على كده يا نورا إزاي قدرتي تظلمي بنت بريئه وعلشان إيه ده كله علشان فارس متعرفيش الظلم آخرته سيئه
قالت باكية: عملت كده غصب عني مكنتش عارفه بعمل إيه لما عرفت أن فارس حب واحده غيري وساب البيت لأول مره علشانها اتجننت ومعرفتش عملت كده إزاي
قالت جمالات بعتاب: يا نورا إنتي عملتي كده علشان كبريائك مسمحكيش أن فارس يرفضك ويختار واحده بسيطه

- يا بنتي الحب عطاء وتضحيه عمره ما كان إمتلاك
قالت نورا بعدم فهم: يعني إيه يا ماما
أجابتها قائلة: يعني لما تلاقى الإنسان اللي بتحببه سعيد مع واحده غيرك تفرحي علشانه وتشاركه فرحه كمان اللي بيعجب حد بجد يا نورا بيعمل أي حاجه علشان يشوف حبيبته سعيد في حياته حتى ولو على حساب نفسه يا بنتي
قالت بآلم: أيوه بس أنا بتعذب

قالت جمالات مربتة على كتفها: عارفه وحاسه بيكي بس فتره وهتعدى لما تتنازلي عن الإنسان اللي حبيبته طول عمرك تبقى تضحيه كبيره ووقتها ربنا هيمنص حزنك ويعوضك بإنسان تاني وحياه جديده

احتضنت نورا والدتها متأثرة بما قالتة اهدنتها جمالات بكلماتها فما أعظم الأم حين تداوى جروح أبنائها

- يلا بقه قومي البسي وتعالى نروح لفارس المستشفى
- روحى أنتي يا ماما أنا مش قادره أبص في وش خالتو خصوصاً إنى السبب في اللي حصل لفارس



قال مراد معاتباً زوجته : إزاي يا فوزيه تسببيها تسافر وهي تعبانه
أجابه قائلة: عندها إمتحان بكره وكم ان عماد راح يوصلها وبعدين لو محضرتش الإمتحان
هتسقط

قال بتفهم: خلاص هكلم عماد ييات عند حد من أصحابه ويستنى معاها لعند ما تحضر
الأمتحان ويجيبها بكره

- أيوه كده يبقى اطمئنها عليها يا أبو حسن
قال عماد بحرص: على مهلك يا زهره استنى العربيه كان هتخبطك مالك عقلك فين كل ده
علشان عندك إمتحان

لم تدري زهره ماذا تقول لعماد قلقت على فارس لا يعقل أن دكتوراه مديحه تحدثها
وتترجاها أن تحضر إلى المستشفى إلا إذا كان فارس في خطر
قال عماد باستغراب: زهره أنا بكلمك مبترديش عليا ليه؟

قالت بإرتباك: معلىش يا عماد أنا بس علشان الإمتحان جه فجأه ومش مستعدة علشان كده
قلقانه.

قالت جمالات لاختها: طولى بالك يا مديحه فارس هيقوم بالسلامه متعملش في نفسك كده
قالت مديحه باكية: فارس هيروح منى يا جمالات الحادته عملتله إرتجاج في المخ ودخل في
غيبوبه إبنى الوحيد
ربنا هيقومه بالسلامه إن شاء الله يا مديحه إدعيله.

قالت زهره مسرعة: وأخيرا وصلنا روح أنت بقه يا عماد أنا هطلع أوضتى اريح شويه من
السفر وبعدين أقوم اراجع للإمتحان

قال معترضاً: لا يا زهره أنا هروح أبات عند واحد صاحبي زى عمى ما قالى واجيلك بعد
الإمتحان ونسافر

قالت مسرعة: لا أنا مش هسافر حنان قالتلى احتمال كبير يبقى في إمتحان تانى آخر الأسبوع
إنت عارف إمتحانات الميديم تيرم بتيجى فجأه وبعدين متقلقش أنا بقيت كويسه وعموماً لو
تعبت هكلمك تيجى تاخذنى

قال بتفهم: خلاص يا زهره هروح بس لو حصل حاجه كلمينى على طول خدي بالك من
نفسك



ما لبثت زهره أن وصلت لغرفتها بالمدينة وضعت حقيبته السفر ونزلت فور مغادره عماد.
ظلت نورا تفكر فيما قالت والدتها إلى أن سمعت الأذان وكأنها تسمعه لأول مره في حياتها
قامت وتوضأت وارتدت عباءه فضفاضة صلت فرضها أنهت صلاتها وجلست تدعو الله أن
يغفر لها

إلهي اعلم إنى مذنبه ومقصره لكن كرمك وعطفك أشمل اطمع في رحمتك اغفر لى وأرح
قلبي وعقلي وارزقنى السكينه وابعث في قلبي الطمأنينه.

انتبهت مديحة لقدوم زهره واعتذلت قائلة: زهره الحمد لله إنك جيتى سامحيني يا زهره كنت
هظلمك واضيع عليكى سنه

قالت زهره بقلق: طمئيني فارس عامل إيه

قالت باكية: فارس وفى غيبوبه بقاله ثلاثه أيام أنا جيبتيك لأنك الوحيد اللى تقدرى تنقذيه هو
بيحبك ومتعلق بيكى ولما يلاقيكى جنبه هيقوم

دخلت زهره غرفه العناية وجدت فارس ممدد على سرير غائب عن الوعي لا يشعر بأحد
في عالم آخر جسده موصولاً بأسلاك وأجهزه مخيفه اقشعر بدنهما مما رأت تماسكت نفسها
قدر المستطاع فحبيبها بحاجتها ولا بد أن تكون قوية

اقتربت منه امسكت بيده ودموعها على خدها ظلت تتحدث إليه وكأنها يسمعها

فارس أنا زهرتك زهره الفارس أنا جنبك عارفه إنك حاسس بيا دلوقتي وأنا بكلمك أنا
محتاجك يا فارس متسينيش لوحدى قوم علشان نحقق أحلامنا سوا ثم أكملت قائلة:

فارس من دونك أشعر بأني طائر مسكين قد كُسر جناحيه يرى الطيور من حوله تحلق في
الفضاء وتغنى أنشوده الصباح تتجول بين الأغصان حيناً وتزاحم السحاب حيناً آخر ولكنه
كُتب له الأسر على غصن شجره ليس له أب ولا أم ولا إخوه يحملن له الطعام ويشاركوه في
وحدته إرحم ذلك الطائر وعد إليه كى ينعم بالحريه.

أخذت زهره زاوية في غرفه بجوار غرفه فارس ووضعت عليها ستاراً وجعلتها مكاناً
للصلاه وظلت تتاجى ربها كل ليله

إلهي أسألك أن تحفظ لى محبوبى إلهى لقد زرعت فينا غريزه الحب أعلم بأني أخطأت لعدم
محاولتى جعل ذلك الحب في النور ربما يكون هذا عقابك لى أرجو المغفره لقد أحببت عبدك
فارس وتمنيته زوجاً لى لا أستطيع العيش بدونه أسألك النجاه لفارس



أسألك بضعفى وقوتك بقله حيلتى أن تعافيه إنك على كل شيء قدير.

انهت مناجاتها وأحست بيد تربت على كتفها إلتفتت فوجدت مديحة

قالت مديحة: زهره روحى يا بنتى ارتاحى بقالك أسبوع بايته مع فارس فى المستشفى

- مقدرش أسيب فارس يا طنط
- أيوه بس إمتحاناتك يا بنتى قربت
- متقلقيش يا طنط مديحه حنان بتكتبلى المحاضرات وهتجيلي الكتب هنا علشان أذاكر
- له حق فارس يحبك ويتمسك بيكى سامحيني يا بنتى كنت هضيع مستقبلك
- أنا نسيت الموضوع يا طنط مديحه اعتبريني زى بنتك إن شاء الله فارس هيرجعلنا بالسلامه

لا يا حسن تعدى عليا فين هكذا قالت زهره عبر الهاتف ثم أكملت قائلة: أنا مش هروح البلد الإمتحانات قربت ولازم استعد كويس قولى أنت عامل إيه فى شغلك اتوفقت فيه

- ماشى الحال الحمد لله أنتى لسه بنتعبى يا زهره
 - لا خالص يا حسن ده كان شويه هبوط مش أكثر سلملى على بابا وماما وطمنهم عليا.
- قالت زهره: حنان جيبتيلى الكتب اللى قولتلك عليها

أجابتها حنان: أيوه وجبتلك كمان هدوم من عندى هو فارس عامل إيه دلوقتى

- زى ما هو يا حنان خايفه أوى فارس يروح منى
- ربنا يشفيه زهره فى محاضره مهمه بكره لو غيبتي هتأثر على النتيجة إنتى عارفه دكتور نجيح رخمه أوى ومنبهه على حضور آخر محاضره بالذات تعالى احضريها وارجعى تانى المستشفى
- ماشى يا حنان هي المحاضره الساعه كام
- الساعه ١١

انهت نورا صلاتها ودعائها وشعرت براحه لم تشعر بها من قبل

انتبهت جمالات لنور غرفة نورا مضاء فدخلت تطمئن عليها قائلة: نورا أنتى لسه صاحيه

قالت نورا: كنت بصلى يا ماما جيتى إمتى من المستشفى فارس كويس

قالت بدهشة: كنتى بتصلى ربنا يهديكى يا حبيبتي فارس ربنا ينجيه

قالت مايسة بضجر: زهره بقالها أسبوعين بايته بره المدينه والمشرفه ساكنه المفروض بيعتوا لأهلها إنذار



أجابته هناء: مش بتقول حنان صحبتها في المستشفى وبايته معاها

مايسه بشك: هناء أنا شوفت حنان صاحبه زهره في الكليه من يومين إزاي بقه تكون في المستشفى مش المفروض نعرف زهره بايته فين كل ده

هناء بعتاب: وإحنا مالنا يا مايسه ما يمكن حد من قرايبها في المستشفى وبايته معاها

قالت زهره وقد غلبها الإرهاق: وأخيراً المحاضره خلصت يا حنان أنا مش هحضر محاضرات تانى لازم أروح المستشفى لازم أفضل جنب فارس لعند ما يخف

قالت حنان: أحمد كلمنى من شويه يا زهره وقال إنه رايحله

- معلش يا حنان لازم امشي مش قادره استنى هروح اغسل وشى ل احسن حاسه إنى

هنام وبعدين اطلع على المستشفى

دخلت زهره حمام الكليه تغسل وجهها وتعدل حجابها سمعت حديث العاملات مع بعضهما

متقلقيش يا أم إبراهيم العميده مش هتيجى الكليه خالص دلوقتى إنها يا عينى في المستشفى

قالت العاملة الأخرى: لا عم محمود قالى من شويه إنه مات ربنا يرحمه ويصبر قلبها

نزل حديثهم عليها كصاعقه من السماء سقطت منها الكتب على الأرض تركتهم وركضت مسرعه إلى المستشفى لا ترى أمامها أيعقل أن يكون القدر أخذ منها حبيبها

- حنان إيه الحلاوه دى نظرت حنان تجاه الصوت وجدت محسن قالت بغضب:

- عاوز إيه يا محسن مش مكفيك اللي عملته في زهره وفارس

قال بخبث: سمعت إنك اتخطبتى

قالت بشدة: وأنت مالك شيء ميخصكش عن إيدك أنا معنديش وقت اضيعه معاك فور

مغادرتها وجدت أحمد أمامها نظر إليها فى غضب قائلاً: حنان مين اللي كنتى واقفه معاها ده

- أحمد أنت جيت إمتى؟

- ردى عليا يا حنان مين ده؟

- ده محسن

- مش محسن ده سبب المشاكل كلها واقفه معاها ليه

- هو اللي جه كلمنى يا أحمد وأنا نهيت الكلام معاها

- مش عاوز أشوفك تكلمى البنى ادم ده تانى لأي سبب من الأسباب

- حاضر يا أحمد أنا أسفه مقصدتش أزعلك

- يلا علشان أوصلك



قالت زهره فى فزع فور وصولها المستشفى: طنط مديحه فارس فين إيه اللى حصل

اجابتها مديحة: مالك يا زهره بتجرى كده ليه فارس في العنايه محصلش حاجه

وجدت زهره فارس مثلما تركته ما زال على قيد الحياة ارتمت على صدره وظلت تبكي قائلة: فارس أنت مش ممكن تسيبنى لوحدى مش كده رد عليا يا فارس قوم بقه أنا تعبت مبقتش قادره استحمل أشوفك كده أنا بتعذب يا فارس كنت أنت اللى بتقوينى على اى محنه وبتخلينى استحمل مين اللى هيقوينى على محنه مرضك فارس أنا محتجالك متسيبنيش وظلت تبكى إلى أن سقطت دمعة من عينيها على عيني فارس ثم سمعت إسمها بصوت خافض رفعت رأسها وجدت فارس استيقظ قالت فى لهفة يصحبها فرح:

فارس أنا مش مصدقه الحمد لله يا حبيبى وأخيرا فوقت ورجعتلى متتكلمش علشان متتعيش قال بعناء: زهره سامحيني أنا

قاطعته زهره قائلة: دلوقتي رجعتلى روحى يا فارس أنا كنت هتجنن لو جراك حاجه ربنا لطف بقلبي ورجعك ليا يا فارس ارتاح يا حبيبى هروح أناذى الدكتور خرجت مسرعة : طنط مديحه فارس فاق

لم تصدق مديحه ما سمعته جرت على غرفه إبنها وظلت تقبله قائلة: فارس حبيبى حمد لله على سلامتك وجعت قلبي عليك حاسس بايه يا حبيبى

قال فارس: زهره فين يا ماما

قالت مديحة: راحت تنادى الدكتور البنت دى أصيله يا فارس فضلت جنبك على طول كانت بتبات هنا في المستشفى كنت أدخل عليها الأقيها بتصلى وتدعيلك وهي بتبكي ربنا يجعلها من نصيبك يا فارس

أهلاً يا جميله اتفضلى يا بنتى هكذا قالت فوزية لجميلة

أجابتها جميلة فى عجل: لا يا طنط أنا جيت أرجع طرحه زهره كنت أخذتها منها قبل ما تسافر

مدت فوزية يدها أخذت الحجاب ودخلت غرفة زهره وفتحت دولابها ووضعته وهمت مغادرة فإنتبهت لورقة على الأرض بجوار الدولاى التقطتها وفتحتها تقرأ ما بها:

كيف لقلبي أن ينبض لغيرك فارس اشتقت لأحضانك فحين أنام على صدرك أشعر بأنى ملكت الدنيا ألم يأتي الوقت كتى تنهى فراقك



جاءها صوت مراد من الخارج: فوزيه يا فوزيه إنتى فين

طوت فوزيه الورقه سريعاً وأخبأتها في مكان ما في الغرفه وخرجت قائلة: أيوه يا أبو حسن

قال فى قلق: مبترديش عليا ليه مالك يا فوزيه؟

- ولا حاجه كنت برتب أوضه زهره لما ناديت عليا

- طب اعمليلي كوبايه شاي

- حاضر حالاً يا أخويا

نظرت مديحة لابنها قائلة: الدكتور قال إنك بقيت كويس وهتتنقل أوضه عاديه مده أسبوع
بس تحت الملاحظه

قال فارس بإرهاق: بس أنا علوز أروح يا ماما زهقت من الرقده دى

تدخلت زهره في الحديث قائلة: وبعدين بقه لازم تسمع كلام الدكتور يا فارس وأنا جنبك
ومش هسيبك أبداً

قالت مديحة: زهره عندها حق يا فارس وبعدين أسبوع هيعدى بسرعه أنا هروح البيت
علشان اجيبلك شويه غيارات

إنصرفت مديحة وتركزت زهره مع فارس

نظر فارس لزهره وقال بحب: زهره كنت حاسس إنك جنبى على طول وكان نفسي احضنك
بس مكنتش واعى سامحيني يا زهره ظلمتك

- ماشى يا سيدي هسامحك بس بشرط

- أوبا هنشرط بقه

- يعنى مش لازم استغل اللحظه دى ولا إيه يا فارس

- قولى يا ست البنات لما اشوف

- تحضنى وحشنى حضنك أوى

- إيه! بتقولى إيه

- أنت سمعت متستعبطش

- سمعت بس مستغرب

مد يده إليها فألقت بنفسها في أحضانه قائلة: فارس متبعدهش عنى تانى أبداً

قبلها فارس على جبينها تلك القبله التي طالما حصلت عليها المرأه شعرت بأنها ملكه متوجه
على قلب حبيبها



- مش هسيبك أبداً يا زهره حياتي
مسكت حنان بيد أحمد قائلة: أحمد يا حبيبي أنت لسه زعلان مني شيفاك ساكت مش عادتك
قال بمكر: أيوه طبعاً زعلان علشان كده هعاقبك يا حنان
قالت متعجبة: تعاقبنى! إزاي مش فاهمه
أوقفها وامسك بيدها قائلاً: هنروح نشترى فستان الفرحة
- فستان الفرحة لم تتمالك فرحتها تعلقت برقبتة كطفله أهداها والدها حلوى
- ده أحلى عقاب
- خلاص بقة إحنا في الشارع
- ربنا يخليك ليا يا حبيبي
- هنعدى على فارس الأول في المستشفى
صافح أحمد صديقة فارس قائلاً: حمد لله عل السلامة يا فارس قلقتنا عليك يا ريس
قال فارس: الله يسلمك يا أحمد عمر الشقى بقي
أحمد بحماس: أقولك بقة على خبر حلو يا ريس إحنا خلاص حددنا معاد الفرحة بعد إمتحانات
حنان على طول
فارس بفرح: ألف مبروك يا أحمد ربنا يسعدكوا
- وأنت وزهره إيه مش ناويين بقة
- لا طبعاً اطلع من المستشفى واروح اطلبها من أهلها مش هستنى لبعد الإمتحانات
- على البركة يا فارس
قال مراد لزوجة في قلق: مالك يا فوزيه بقالك كام يوم مسهمه ومش على بعضك
- أنا بس قلقانه على زهره
قال مراد: مهى بقت كويسه حسن طمنا عليها وخلاص الإمتحانات باقى عليها حجات بسيطه
فجأة أثناء حديثهما رن جرس الباب أردف مراد قائلاً:
- قومي افتحي الباب شوفي مين
فتحت فوزية الباب واستلمت مظروفاً من عم مرزوق البوسطجي
أغلقت فوزية الباب وقالت لزوجها: جواب جايلك من المدينه الجامعيه
قال مراد في قلق: طب هاتي كده ربنا يستر لاتكون زهره مرضت تانى



ظلت واقفة مكانها خاطبها قائلاً: هاتى الجواب واقفه عندك ليه

- حاضر اتفضل الجواب يا أبو حسن
قال فارس: زهره طمنيى عامله إيه فى المذاكره
قالت بحماس: متقلش على تلميذتك هجيب إمتياز زى كل سنه وكم ان هعمل ماجيستير وابقى
دكتور وانا فسك وابقى اشطر منك

أجابها ضاحكاً: طبعاً وردتى دائماً شاطره هو مفيش حد من الممرضات هنا ولا إيه

- عاوز حاجه يا حبيبى
- عاوز احلق دقتى وعاوز ممرضه تساعدنى
- فارس شكلك أحلى بالدقن بس حاضر هنده لك الممرضه
أنت الممرضه وجلست أمام فارس بدأت تضع معجون الحلاقه
نظرت إليها زهره فى ضجر فقد اشتعلت بداخلها شراره الغيره تحدثت قائله:

- لا إنا كده هنعطلك عن شغلك عنك إنتى جذبتها من يديها على عجل فوقفت
واسأذنت مغادره
جلست زهره مكانها نظر إليها فارس ضاحكاً: شكلك حلو وأنتى غيرانه بس قوليلى هتعرفى
تحلقيلى دقتى

قالت زهره بضجر: عادى هتعلم فيك وخلص مش أنت اللى عاوز تشيلها استحمل بقه

- طب بالهداوه هطلعى غيظك فيا
- زهره أنا أول لما اخرج هروح لوالدك أقابله مش هستنى لبعده الإمتحانات أنا كنت
هموت يا زهره وهتحرم منك
- بعد الشر عليك متقولش كده تانى ربنا يخليك ليا حاضر يا فارس بس هسافر الأول
علشان أمهدلهم فى البيت أنت عارف محدش يعرف لسه حاجه عنك استنى ماما
بترن علما

قالت زهره لوالدها: ماما عاملين إيه فى إيه مالك اجى دلوقتى ليه يا ماما متعصبه كده ليه
طيب بس الإمتحانات طب خلاص حاضر بكره الصبح دلوقتى يا ماما ألو ألو

قال فارس فى قلق: فى إيه يا زهره



اجابته قائلة: مش عارفه يا فارس ماما متعصبه خالص وبتقولى تعالى دلوقتى ومقالتليش في إيه أنا قلقته يا ترى إيه اللى حصل فارس أنا لازم أسافر دلوقتى وهرجع بسرعه متقلقش هروح بس أشوف في إيه وهجيك بكره بكره الصبح هكون هنا

- زهره دى فرصه كويسه تحكيلهم عنى بس ارجعى بسرعه باقى ١٢ يوم على الإمتحانات يا دوب اراجعلك المواد

- حاضر يا حبيبى يلا أشوف وشك على خير همت مغادره أوقفها قائلاً:

- زهره استنى قربى عاوز أقولك على حاجه

- طب قول

- قربى أصلها حاجه سر علشان محدش يسمعنا

أجابته ضاحكه: هو في حد معانا في الأوضه

اقتربت منه فضمها إليه وهمس لها أحبك يا صغيرتى عودى سريعاً سأنتظرك في صباح الغد نتناول الشاي سوياً إنتزعت نفسها من إحضانه برفق متمنيه ألا تفارقه وغادرت

قالت فوزية لزوجها: اهدي يا أبو حسن الضغط هيعلى عليك

قال بغضب: اهدي يا فوزيه يا ريت أموت علشان ارتاح بنتك هتجلبلنا العار يا فوزيه المدينه بتخلى مسؤوليتها بتقول بقالها ١٨ يوم بايته بره المدينه ميعرفوش بتبات فين من يوم ما سافرت

قالت مسرعة: ما يمكن يا أخويا الإخطار ده جاى بالغلط

قال بغضب: غلط إزاي وبنتك أحوالها متغيرة من وقت ما جت من القاهره وهي مريضه وسافرت على ملا وشها كانت بتنام فين

سقط الأب مغشياً عليه

هرولت فوزية تحرك زوجها قائلة: مراد رد عليا يا مراد

جرت نحو الهاتف واتصلت بعماد تستنجد به

قالت زهره ل أخيها عبر الهاتف: حسن إزيك عامل إيه بابا وماما كويسين يعنى

قال حسن: الحمد لله يا زهره إنتى كويسه

- أنا في الطريق مروحه البلد ماما كلمتني وصوتها مكنش عاجبنى متعرفش في إيه

- لا مش عارف أنا في الشغل إنتى كده قلقتينى يا زهره لما توصلى طيب طمينينى



قال عماد في قلق: إيه اللي حصل يا مرات عمى الدكتور بيحذر من الأنفعال الضغط كان
عالى وبيقول ربنا ستر كان هيجيله جلطة

قالت فوزية بارتباك: معرفش يا عماد هو تعب فجأه

- طيب خليكى جنبه هروح اجيب الدواء
نظرت فوزية لزوجها وقالت فى أسى: سلامتك يا أبو حسن

قال مراد بغضب: زهره لسه موصلتش

أجابتة قائلة: لسه يا أخويا اهدي علشان صحتك يا مراد يمكن إحنا فاهمين خطأ ودلوقتى
زهره توصل نسمع منها

قال بلوم: يا ريتنى ما وافقت على روحتها الجامعه البعيده دى يا ريتنى مدخلتها الجامعه
أصلاً معظم الناس في الصعيد بلدنا اللي كنا فيها الأول بتجوز بناتها جواز البنات ستر

قالت بحرص: صل على النبى يا أخويا عماد زمانه جاى مش عاوزينه يعرف حاجه غير لما
نفهم القصه.

اندهش فارس حين وجد نورا أمانة وقال بغضب: إنتى إيه اللي جابك هنا مش عاوز أشوفك
قالت برجاء: فارس سامحنى أنا ندمت على اللي عملته فيك وفى زهره يا فارس متعذبنيش أنا
عرفت خطاى وجيت اعتذرلك وأقولك حمد الله على السلامه

- عموماً شكراً على زيارتك

- فارس

قاطعها قائلاً: من فضلك يا نورا أنا تعبنا وعاوز أستريح.

وصت زهره المنزل وحين وجدت والدتها ابتسمت قائلة: السلام عليكم يا ست الحبايب
وحشتينى خالص في إيه بقه قلقتينى

سمع مراد صوت زهره خرج من غرفته غاضباً وأول ما وقعت عينه على إبنته استشاط
غضباً وظل يضربها على وجهها قائلاً: إنتى جايه منين كنتى فين

قالت باكية: بابا في إيه كنت في الجامعه

صفعها على وجهها إلى أن سقطت على الأرض وظل يضربها

أمسكت فوزية بزوجها قائلة: مراد بالهداوه البنت هتموت في إيدك



إزاحها جانباً وقال:متدخلش يا فوزيه

أمسك زهره من شعرها وقال بغضب:ردى عليا كنتى فين الفتره دى كلها المدينه باعته إخطار بتقول بقالك ١٨ يوم بايته بره كنتى بتبأتى فين ردى عليا أحسن ما أطلع روحك في إيدى

زهره بأنفاس متقطعه: بابا أنا أنا ...

قال بغضب:انطقى يا بت

قالت باكية:كنت بنام في المستشفى ثم أكملت دكتور علم الاجتماع اللى بيدرسلنا في الكليه كان عامل حادثه وحالته خطيره وروحت أزوره وكنت بنام في المستشفى علشان لو احتاج حاجه

ضحك مراد بسخرية:هو أنا عيل علشان تضحكى عليا بالكلام الهايف ده طب رتبى كدبك علشان يتصدق

قالت برجاء:والله يا بابا بقول الحقيقه أنا معملتش حاجه تخليك تخجل منى أنا كنت جايه احكيالك

قال بعدم تصديق:إيه المنطق اللى يخليكى تنامى في المستشفى علشان الدكتور عمل حادثه هو إنتى من بقية أهله

صمتت زهره عن الكلام وكأنها لم تجد جدوى وأن أباه لن يصدقها مهما تحدثت وربما يكون أثار الضرب أفقدها النطق والحركه سقطت على الأرض تلهث أنفاسها بصعوبه وشعرت بالدوار

قال مراد بعصبية:فوزيه البننت دى تاخدى منها الموبايل وتفضل في البدرن تحت من غير أكل ولا شرب لعند ما تموت ونرتاح منها.

استعادت زهره وعيها وجدت نفسها في غرفه مظلمه لا ترى شيء أمامها قامت وتحسست الجدار إلى أن وصلت لباب الغرفه وجدته مغلقاً عادت إلى زاوية الغرفه تتضارب الأفكار في رأسها لا تدري ما فعلته كان صواباً أم خطأ هل أخطأت حين أخفت عن أهلها حب فارس أم أخطأت لكونها عشقت فارس لحد الجنون وهل الآباء يفعلون مع أبنائهم مثلما فعل أبى لقد حبسنى في زنزانه مظلمه من دون محاكمه عادله أعلم بأنى أخطأت حين أخفيت حبي ولكن لو لم أكن أخفى ماذا كان حدث دعونى أخبركم كان سيحرمنى من الجامعه خوفاً من أن أفعل شيء مخجل يجلب له العار مثلما فعل الآن الذنب الذي ارتكبته هو إنى أحببت



ولأول مره قلبى ينبض لأحد أين تلك النص من القانون الذي يحكم على من يعشق بالضرب والسجن تابع لقانون العدل أم الرحمه ليتنا نقدر على إغلاق قلوبنا للأبد كى لا تنبض ولا تشعر

نظرت مديحة لابنها وقالت: مالك يا فارس؟

- زهره تليفونها مقفول المفروض كان تطمنى إنها وصلت
- تلاقيه فصل شحن وكانت تعبانه من السفر ونامت
- لا يا ماما أكيد في حاجه أنا قلقان عليها
- متقلقش يا فارس إن شاء الله خير قولى ليه مش عاجز تسامح نورا
- اسامحها! إزاي طيب اللي عملته ده يستحق السماح
- حبيبى نورا اتغيرت خالص وعرفت غلطتها وندمانه وربنا رءوف رحيم
- ماما بعد إذنك متكلمنيش في الموضوع ده تانى
- سمعت زهره صوت فتح باب الغرفه نظرت لترى لم ترى فعينيها اعتادت على الظلام لليله كامله وحين رأت الضوء وكأنه سهم أصابها أغلقت عينيها سمعت صوت والدتها
- زهره قومي جبتيك أكل زهره أنا أمك احكيلى الحقيقه يا بنتى أبوكى هيجراله حاجه قالت زهره بدّهشة: حقيقة! هو إزاي بابا يشك فيا ويظن فيا سوء يا ماما
- قالت فوزية: كلامك مش منطقى يا زهره أنا قرئت جواب كان واقع في أوضتك إيه حكايه فارس اللي إنتى كتباليه الجواب ده؟ وإيه العلاقه اللي ما بينكوا؟ وكنتى بتنامى فين؟
- وقفت حنان أمام المول وقالت: الله يا أحمد الفستان ده جميل اوى
- قال احمد بضجر: لا يا حنان ده مكشوف هنشوف واحد غيره
- أحمد أنا عاجبنى ده وبعدين دى ليله العمر
- مفيش حاجه إسمها ليله العمر يا حنان تبقى تلبسى فستان مكشوف وكمان تقلعى الحجاب
- أنت كمان عاجزنى أتحجب يوم فرحى
- أبوه يا حنان مينفعش تقلعى الحجاب ولا يوم فرحك ولا في أي يوم تانى
- إنتى هتبقى مراتى وربنا هيجاسبنى عليكى غير إنى مستحملش حد يشوفك من غير حجاب أو بلبس مكشوف
- أنت بتغير عليا بقه
- طبعاً بغير والكلام اللي بقوله هو اللي هيمشى مفهوم ولا لا



- مفهوم يا حبيبى ولا تزعل نفسك إيه ده فارس بيتصل
- ردى عليه شوفى في إيه
- أيوه يا فارس مش عارفه والله أنا بردوا كلمتها لاقيت تليفونها مقفول طيب يا فارس أنا هكلم جميله جارتهم وخطيبه أخوها اسألها عليها وافهم في إيه وهطمك حاضر
- في إيه يا حنان
- زهره سافرت البلد وتلفونها مقفول وفارس قلقان عليها ربنا يستر يا أحمد
- قالت زهره بأسى: ده كل اللى حصل يا ماما من وقت ما روجت الجامعه لحد النهارده فوزية بعتاب: إنتى غلطانة يا زهره علشان خببتي حاجه زى كده وعيشتي قصه حب في الضلمه يا بنتى كان المفروض يدخل البيت من بابيه ويمشي صح
- زهره برجاء: يا ماما فارس مستنى منى تليفون علشان يجي يقابل بابا وبعدين دى آخر سنه حرام تروح عليا كلمى بابا خليه يوافق احضر الإمتحانات حتى لو عماد هيفضل معايا يوديني ويجيبني حرام تروح عليا الكليه
- أجابتها فوزية: هكلمه بس مش عارفه هيوافق ولا هيصدق الكلام ده أصلاً
- قال مراد بعصبية: فوزيه مش عاوز حد يكلمنى في الموضوع ده تانى ولو عرفت انك نزلتي لزهره تانى هيبقى في كلام تانى
- قالت فوزية برجاء: يا مراد البت بريئه دى مقهوره علشان أنت زعلان منها بتقول معقول بابا يشك فيا ويسئ الظن معقول يفكر إني ممكن أكسره
- فوزيه امنع الكلام في الموضوع ده حسن هيوصل إمتى
- حسن زمانه جاى في الطريق
- أيوه يا حنان إزيك يا حبيبتي عامله إيه وأحمد خطيبك كويس بجد ألف مبروك أكيد طبعاً
- هنحضر أنا وحسن وزهره هكذا قالت جميلة لحنان عبر الهاتف
- قالت حنان بقلق: جميلة متعرفيش زهره تليفونها مقفول ليه أنا قلقانة عليها
- قالت جميلة: زهره! معرفش يا حنان بس حسن زمانه جاى من الشغل النهارده هسأله عنها أبقي اطمئنك يا حنان
- قال حسن لوالدته فى عدم إستيعاب: معقول يا ماما كل ده يحصل ومحدث يقولى
- قالت بحذر: حسن أبوك بيتعب لما بيتكلم في الموضوع ده بلاش تكلمه دلوقتي سيبه لما يهدى
- طب وزهره يا ماما معقول تسيبوها محبوسه في البدر



- يا ابني حكم القوى كام يوم بس أبوك يهدى وبعدين نكلمه
لم تقترب زهره من الطعام الذي تركته والدتها كيف لسجين أن يأكل

تقوست على نفسها وأخذت وضع الجنين وأحاطت رقبتها بذراعيها تحتضن نفسها وأخذت
تتحدث لعل أحد يشعر بها من ماره الشوارع ويأتي ليحررها ولعل نحيبها وبكاءها يصل
لأذن حبيبها فيأتي ويخلصها

فارس الخوف تسلل إلى أوصالي تركوني في زنزانه مظلمه أخاف كثيراً من تلك العتمه
أشعر بين الحين والآخر أن أحد ما سيأتي من خلفي ويقتلني ألم تشعر بي تعالى كي تأخذني
من تلك الزنزانه أشعر بالبروده إحتاج لحضنك كي يدفئني مد يدك وامسح دموعي فحين
تلامس يدك عيني ستكف عن البكاء وحين تلامس شفתי سترسم البسمه عليهما وأنسى كل
أوجاعي باتت نبضات قلبي تؤلمني وأشعر بالإختناق في تلك الغرفه يا ليت أبي قتلني ولم
يسجنني ويبعدني عنك وعن أحلامي أشعر بروحي التي انفصلت عني حين بعدوني عنك. يا
للعهه العشق حين تصيب أحد يرافقه العذاب ويُهوى به إلى القاع من على هاويه مرتفعه.

قالت مديحه: فارس لسه الدكتور مكتبلش على خروج رايح فين

قال فارس بقلق: لازم نسافر لزهره حالاً زهره في خطر حنان لسه مكلمانى

- وهي حنان عرفت منين
- من جميله خطيبه أخوها
- يا ابني دول أهلها بردوا مش ممكن يأذوها
- ماما أبو زهره صعيدي وأنتى عارفه الصعايده وطبعهم لو زهره جرالها حاجه مش
هسامح نفسي
- طب علشان خاطري نستنى لما الدكتور يكتبلش خروج
- ماما لو مجتيش معايا نوضح لهم سوء الفهم واطلبها هروح لوحدي
- حاضر يا فارس اللي يريحك يا حبيبى
- قال مراد محدثاً ابنه: عامل إيه في الشغل يا حسن

أجابة قائلاً: الحمد لله يا حاج ماشى الحال كنت عاوز أتكلم معاك في موضوع زهره

- حسن قوم روح لخطيبتك زمانها مستنياك
- وصل فارس لمنزله بعد ما ترك المستشفى توضاً وصلى شاكراً فضل الله عليه لنجاته من
الحادثه ودعى الله أن يحفظ حبيبته ويجمعهم سوياً

قالت فوزية لزوجها: يا أبو حسن في ناس عاوزينك في الصالون



أجابها في ضجر: مين يا فوزيه مش قادر اقبال حد

- مش عارفه شكلهم أغراب مش من هنا
دخل مراد الصالون وجد شاباً وبجواره امرأة بعمر زوجته ألقى عليهم السلام وتحدث قائلاً:

- أهلا وسهلا مين حضراتكوا
قال الشاب: أنا فارس المنشاوى دكتور في كلية الآداب جامعه القاهرة وأشار إلى مديحة قائلاً: والدتي مديحه المنشاوى عميده كلية الآداب والدي الله يرحمه كان رئيس الجامعه سابقاً

قال مراد في عدم فهم: أهلا وسهلا يا ابني خير
ما زالت زهره تحتضن جسدها لكنها شعرت بوجود فارس وتحسست جدار الغرفة إلى أن وصلت إلى الباب

فارس أشم رائحتك أين أنت أشعر بأنك في مكان ما لم يبعد عني هل شعرت بما أنا فيه وأتيت لتأخذني أم أننى أتوهم لكونى أحبك دائماً ما اسمع صوتك في أذنى أرى وجهك كلوحه فنيه رسمت على جدار تلك الغرفة كلما نظرت لها شعرت بالإطمئنان
فارس أين أنت فارس أين أنت أين أنت فارس

أخذت تردد في اسمه إلى أن سقطت مغشياً عليها.
قال فارس موجهاً نظره لمراد: أنا حكيثلك يا عمى اللي حصل من أول ما عرفت زهره لغايه اللحظة دى وأنا عارف أنى أخطأت علشان مجتش اقبال حضرتك من الأول لكن زهره هي اللي كانت بتمنعنى كانت دائماً بتخاف على شعورك كانت بتقول بابا هتتهز ثقته فيا وكانت مأجله مقابلتي لحضرتك لعند لما تخلص الكليه

أجابة مراد: أنا مقدر صراحتك يا ابني لكن أنت فعلاً أخطأت علشان مشيت في الضلمه من الأول وكانت النتيجة بنتى سمعتها اتشوهت وأنا كمان ظلمتها هي كمان أخطأت لما خبت علينا كلنا

قالت مديحة في رجاء: يا أستاذ مراد إحنا جايين نعتذر بعد ما عرفنا اللي حصل لزهره وأن المدينه أخلت مسئوليتها ووضعتها في موضع شك من زمايلها بسبب إبنى اعذرني أنا أم وابني كان هيصيغ منى كان بين الحياه والموت وبنتك فضلت جمبه وكان ليها الفضل في شفائه بعد ربنا وأنا اللي كلمتها وطلبت منها تيجى المستشفى ولأنها بنت أصل فضلت مع فارس لما قام بالسلامه



قال مراد متفهماً: عموماً حصل خير يا دكتور ه مديحه

نادى مراد على زوجته قائلاً: يا فوزيه نادى على زهره من تحت

نزلت فوزيه إلى حيث الغرفه التي حُست فيها زهره فتحت الباب وجدتھا ملقاه على الأرض غائبه عن الوعي تحسست وجهھا قائلة:

- زهره زهره يا بنتى ردى عليا

صعدت مسرعه لزوجها وقالت فى فزع: إلحقنى يا مراد زهره واقعه على الأرض ومش بتتطق

هرول فارس مسرعاً وراء أبيها حملها بين ذراعيه إلى سيارته ذاهباً بها إلى إحدى المستشفيات القريبه في القريه

قال فارس لمراد: بعد إذنك يا عمى المستشفى هنا مفهش إمكانيات أنا هأخذ زهره على مستشفى كويسه في القاهره

حزن مراد لما جرا لإبنته بسببه أجاب مطأطأ الراس:

- اللى تشوفه يا ابني



الفصل الرابع

حب وتضحيه

فتحت زهره عينيها وجدت فارس بجوارها اقترب منها وامسك بيدها قائلاً:

حمدلله على سلامتكم يا صغيرتي

قالت غير مصدقة: فارس أنت هنا ولا أنا بحلم

- أنا هنا يا حبيبتي وهفضل هنا على طول الدكتور طمنى عليكى وقال بقيتي كويسه

ومتقلقيش يا ستى هراجعك المواد كلها وهتلحقى الإمتحان

- فارس هو الدكتور قالك إيه

- قالى متخليهاش تبعد عنك تانى

جلس مراد على بابا غرفه زهره واضعاً يديه فوق رأسه ربت فارس على كتفه قائلاً:

بقت كويسه يا عمى تقدر تدخل تظمن عليها بس بعد إذنك يا عمى زهره لازم تفضل في

القاهره علشان الإمتحانات بعد أيام وخسارة تروح عليها السنة تسملى اكتب كتابها دلوقتي

والفرح يبقى بعد الإمتحانات أنا عارف أن الوقت مش مناسب بس علشان تبقى متظمن عليها

قال مراد: ولا يهملك يا ابني بس نظمن عليها الأول

دخل مراد غرفه إبنته بالمستشفى يتوجه إليها ببطء وعينيه مليئه بالدموع انحنى وقبل رأسها

قائلاً: أنا أسف يا بنتى ظلمتك يا زهره

قالت باكية: أنا اللي أسفه يا بابا إنى وضعتك في موقف زى ده وخليتك تفقد ثقتك فيا

ربت على كتفها وقال: فارس طلبك منى وأنا وافقت ده ابن حلال ويستاهلك يا زهره كان

نفسى تتجوزى عماد إبن عمك بس طالما أنتى بتحبنى فارس وهو بيحبك وكمان هو شخص

كويس زى عماد ربنا يسعدكوا يا زهره

قال عماد لزهره: زهره حمدلله على سلامتكم ومبروك الخطوبه بتمنالكم التوفيق

- عماد أنا أسفه سامحنى قلبى مش ملكى

- ولا يهملك يا زهره أنا زى أخوكى بتمنالكم السعاده ربنا يوفقك مع فارس

- ربنا يخليك يا عماد إن شاء الله تلاقى البنت اللي تستحقك

خرج عماد مسرعاً من المستشفى لا يرى أمامه أثناء نزوله من على درج السلم اصطدم

بفتاه وكادت أن تسقط لولا أنه أمسكها قبل أن تسقط على الأرض قائلاً:



- أنتى كويسه جراك حاجه
- مش تبص قدامك وأنت ماشى
- أنا أسف يا أنسه
- حصل خير
- رن هاتقها أجابت أيوه يا ماما أنا وصلت المستشفى هزور زهره واجى على طول انتبه مراد لها وهى تتفوه بإسم زهره نظر إليها قائلاً:
- إنتى رايحه لزهره مراد
- أيوه
- تعرفيها منين صاحبك
- وأنت مالك بقه بتسأل ليه؟
- أنا عماد ابن عم زهره واسف لو كنت ضايقتك عن إذكك وهم مغادراً وقبل أن ينصرف اقترب منها
- على فكره شعرك جميل بس في الحجاب هتبقى أجمل وانصرف وتركها في حيرتها ما لبثت أن دخلت نورا غرفة زهره إلى أن خفضت رأسها وقالت:
- سلامتك يا زهره أنا عارفه إنى أخطأت في حقك أنا ندمت على اللى عملته معاكى سامحيني يا زهره
- أجابتها باسمه: مفيش أخوات ممكن يزعلوا من بعض يا نورا
- أنتى قلبك كبير يا زهره فارس له حق يحبك تصورى مش علوز يسامحنى
- فارس طيب أوى شويه وقت هينسى ويسامح.
- قالت حنان بفرح: زهره أنا مش مصدقه أننا خلاص أخرجنا وبتقدير كمان زى كل سنه قالت زهره: الحمد لله يا حنان
- زهره أنا نفسي نتجوز أنا وأنتى في يوم واحد إيه رأيك
- والله يا ريت يا حنان تبقى فرحه كبيره بس مش عارفه فارس هيوافق ولا لا.
- حبيبى إيه رأيك نتجوز مع أحمد وحنان في يوم واحد هكذا قالت زهره لفارس
- أجابها قائلاً: مينفعش يا زهره لسه الفيلا اللى هنتجوز فيها مخلصتش
- قالت برجاء: فارس أنا مش علوزه فيلا علوزه بيت صغير وقدامه حديقته علشان أزرع فيها الورود اللى بحبها



قال بحب: حاضر يا ست زهره بس خلى بالك لتتهمى بالورود أكثر منى

- أنا والورود منقدرش نعيش من غير إهتمامك ورعايتك
أتى اليوم الذي يحلم به كل منهما على مشهد من الجميع

جذب فارس زهره من يدها ليرقصا سوياً تبعهما أحمد وحنان وظلا يرقصان على أنغام
الموسيقى الهادئة

عقبالك يا أنسه نورا انتبهت لمصدر الصوت وجدت عماد نظرت إلية قائلة:

هو أنت! شكراً يا عماد

ظلت نورا حائره في تصرفات عماد لماذا يشغل تفكيرها إلى هذا الحد ومن أين أتت الجراه
ليطلب منها الحجاب برغم تناقض عقلها إلا أنها فرحت بما شعرت ناحيته من إهتمام
وعاطفه وظل يتحدثان سوياً إلى أن إنتهى العرس

ذهب كل من العروسان إلى منزله

قالت زهره بفرح: فارس أنا حاسه إنى بحلم أوعدنى تفضل جمبى طول العمر

اقترب منها وهمس لها:

- كيف أتخلى عنك فأنت شمسي وقمرى، ليلي ونهارى، فرحى، آمالى، أحلامى

- القمر يغار من جمال وجهك والزهور تخجل حين تنظر إليك

فزهرتى تشبه الزهور فى عطرها الفواح ورقتها وعطائها فحين ننظر للزهور نشعر
بالبهجه كذلك أنتى بل تفوقين عطاء تلك الزهور يا زهره الفارس.

نظر حسن إلى جميلة قائلاً: عقبالنا يا جميله

- يا رب بقه يا حسن

- هانت يا حبى كلها كام شهر والشقه تجهز ويتلم شملنا بقه.

قال مراد لزوجة بعتاب: مالك يا فوزيه بتبكى ليه

مسحت دموعها ثم أردفت: مش مصدقه أن زهره كبرت واتجوزت

أجابها ضاحكاً: يا فوزيه حتى فى الأفراح بتبكى ولا زعلانه علشان زهره هتكبرك

ضحكت فوزيه وتبادلاً الحديث سوياً

قال عماد عبر الهاتف: نورا أنا أول لما شوفتك اتشدتلك حاسس بحاجه من ناحيتك



أجابتة قائلة: بصراحة وأنا كمان يا عماد أول مره قلبى يتحرك تجاه حد بالسرعه هدى

- فكرتى في اللى قولتهولك بخصوص الحجاب
لا مفكرتش

- طب قومى دلوقتى اقفى قدام المرايا بصى لنفسك من غير الحجاب وبعدين البسى
الطرحه وبصى لنفسك وأنتى لابسها وقوللى أنهى الأحسن

استيقظت زهره مبكراً كعادتها خرجت إلى حديقته المنزل لترى ما زرعتة قد مر أشهر على
زواجهما وقد ملئت الحديقة بأنواع الورود المختلفه كالورود الجوريه وزهور الياسمين
والبنفسج والكاميليا والصفصاف وظلت تروى ورودها وتعتنى بهم لكي لا تحرم من ذلك
المنظر المبهر الذى تراه كل صباح منظر كفيلى أن يبعث في قلبها البهجه والسرور مع تناغم
صوت الكروان وتغريد الطيور فوق الأشجار حقاً ما أجمل الطبيعه الساحره

قطفت ورده من الورود الجوريه ودخلت لتليقظ فارس مررت الورده على عينيه ثم خديه
تسللت رائحتها الفواحه على أنفه واستيقظ قائلاً: زهره صباح الخير يا حبيبتى

قالت بحب: صباح الورد يا فارس قوم بقه علشان النهارده أول يوم في الدراسه مينفعش
تروح الجامعه متأخر

- حاضر بس سيبينى أنام شويه

- فارس اصحى يلا بلاش كسل كده يعنى مش ناوى تقوم ماشى يا فارس
ذهبت إلى الثلاثه وأحضرت مكعبات من الثلج وسكبته فوق رأسه

انتفض مذعوراً من نومه قائلاً: إيه ده يا زهره طب استنى بقه

ركضت مسرعه إلى الحديقته وجرى خلفها وظل يمرحان كطفلين يلعبان معاً في فرح

نظرت حنان لعينى زوجها فى فرحة وقالت: أحمد يا حبيبى انا عندى خبر حلو أوى

انتبه لها قائلاً: بجد قولى

- طب غمض عينيك الأول

- حاضر يا ستى أهوه قولى بقه يا حنان

- هتبقى أب يا حبيبى

- فتح عينيه في دهشه وحضنها بشده قائلاً:

- بجد يا حبيبتى

- أيوه يا أحمد



- من دلوقتي لازم تاخدى بالك من نفسك وهجيبلك واحده تساعدك في شغل البيت
- حبيبي شغل البيت مش متعب أنا هروح أزور زهره وحشتني أوى
- طيب ما تكلميهما تجيلك هنا
- خلاص اللي تشوفه يا أحمد هكلمها وأقولها تجيلي
- احتضنت زهره حنان قائلة: ألف مبروك يا حنان فرحتك أوى وأخيراً هبقى خاله
- أجابتها بود: عقبالك يا زهره
- يا رب يا حنان
- إنتي خلاص قدمتي على الماجيستير
- أيوه إنتي عارفه ده حلمي من أول ما دخلت الجامعه متقدمي إنتي كمان وناخده سوا
- يا ريت بس أحمد موافقش خصوصاً بعد ما عرف إنني حامل عاوزني إرتاح
- طبعاً أول طفل لازم يبقى له أهتمام خاص
- وقفت أمام المرآه تنتظر لشعرها المنسدل ثم أحضرت شالاً ولفته على رأسها ونظرت في المرآه شعرت بحجابها تشبه الأميرات
- أمسكت هاتفها : عماد أنت فين عاوزه أقابلك ضروري قبل ما ترجع البلد
- انتبهت جمالات لابنتها حين وجدتها إرتدت الحجاب وقالت:
- نورا الله إيه الحلاوه دي هتنزلي بالحجاب
- قالت بحماس: أيوه يا ماما إيه رأيك شكلي حلو
- طبعاً زى القمر بس يا ترى مين قالك اتحجبي ولا أنتي قررتي من نفسك
- بعدين بقه أما أرجع هبقى احكيك
- حين وقع نظر عماد على نورا قال في دهشة: اللهم صل على الحبيب المصطفى إيه الجمال
- ده يا نورا
- قالت في خجل: عجبك يا عماد
- طبعاً إنتي مبصتيش في المرايه ولا إيه
- بقولك بقه يا قمر عاوز اقابل والدك
- بابا ليه؟
- علشان اطلب منه القمر
- أجابته ضاحكه: القمر في السما هتطلبه من بابا إزاي



أعدت زهره طعام الغداء كما رتبت المنزل وعطرته برائحته الورد وتزينت في إنتظار زوجها وحين اقترب موعد وصوله وقفت خلف الباب

فتح فارس باب المنزل تسللت الرائحة إلى أنفه دخل وأغلق الباب قائلاً: زهره أنتى فين إيه الريحه الحلوه دى

ظهرت فجأه من خلف الباب قائلة: بخ

ضحك فارس قائلاً: إنتى مش هتبطلى بقه هو أنا متجوز طفله وبعدين إيه الحلاوه دى

قالت بدلال: عجبتك

اقترب منها قائلاً: ريحه شعرك تجنن

أمسكت بيده وممرتها على شعرها ثم عينيها ثم شفيتها ناظره في عينيه قائلة: شعري وعيونى وشفافى ملكك

قال بود: طيب أنا جعت أوى هنتغدى رومانسيه ولا إيه

أجابته ضاحكه: حالاً الاكل يكون جاهز

جلسا يتناولاً الطعام سوياً بادر فارس بالحديث قائلاً: قوللى بقه يا زهره اخترتى موضوع الرساله بتعتك ولا لسه

- في موضوع في دماغى بس مش عارفه هيبقى كويس ولا لا

قال فارس فى حماس: موضوع إيه قولى

- ظاهره التعلق المرضى بس مش في الأطفال في الكبار التعلق المرضى للكبار

- هایل يا زهره موضوع كويس جداً ابدئى اشتغلى عليه.

قالت جمالات فى فرح: بجد يا نورا فرحتى قلبى يا بنتى ده اليوم اللى بستناه طول عمري وأخيراً ربنا استجاب لدعائى

أجابتها قائلة: أيوه عماد هيبجى يخطبنى وأنا أول مره قلبى يدق لحد غير فارس

- مش قولتلك يا بنتى ربنا هيعوضك ولما اتمنيتى لفارس الخير بعثلك واحد كويس

وقلبك ارتاحله

- الحمد لله يا ماما عندك حق أنا كنت بعيده عن ربنا وكان غايب عنى حجات كثير

- ربنا يهديكى يا بنتى ويسعدك

نظر فارس إلى كوب العصير الذى وضع على الطاولة قائلاً:



- زهره اشربي العصير
قالت بضجر: مش قادره يا فارس كل يوم تعملي عصير وتغصب عليا اشربه
- زهره علشان خاطري مش أنتي مراتي ولازم اهتم بيكي
- يوووووه ماشي هشر به قولي بقه رأيك في الأبحاث اللي عملتها دي
أخذ منها الأبحاث وظل يقرأ إلى أن انهى قرائته
- عظيم يا زهره مجهود رائع أحسنتي أنتي كده هتبقى دكتوره شاطره أوى
قالت بامتنان: بجد عجبك الأبحاث
- قال فارس: أيوه يا حبيبتي ولو مشيتي على النظام ده تقدرى تناقشي الماجيستير بعد شهرين
بس
- حاضر هستغل كل وقتي علشان أخلصها نفسي بقه أقف أشرح للطلبة كده وأحس أن
ليا مكانه كبيره في الجامعه
- حبيبتي أنتي ليكي أعظم مكانه كفايه تكوني زهره حياتي
- ربنا يخليك ليا يا فارس
- قالت زهره مرحبة بحماتها: أهلا طنط مديحه نورتي البيت
مديحه في تمنع: عامله إيه يا زهره
- الحمد لله يا طنط
- فارس نزل الجامعه
- أيوه نزل من شويه
- كويس أنا كمان رايحه الجامعه وقولت أعدى عليكي الصبح قبل ما أروح
- ده بيتك يا طنط تنوري في أي وقت هنتغدا مع بعض النهارده
- قالت في إعتذار: لا يا بنتي مش هقدر ثم أردفت قائلة زهره أنا نفسي أشوف أحفادي قبل ما
أموت
- قالت زهره في قلق: بعد الشر عنك يا طنط إن شاء الله ربنا يسهل
- قالت مستفهمة: يا بنتي بقالكوا أكثر من سنه متجوزين
- قالت زهره بعتاب: والله يا طنط أنا كل لما أكلم فارس في الموضوع ده يقولي إنتي مستعجله
على إيه مش راضي نروح لدكتور حتى نطمن
- طيب أنا هكلم فارس متشغليش بالك هقوم بقه علشان متأخرش



- مع السلامه يا طنط مديحه
 قالت زهره عبر هاتقها:جميله ألف مبروك حسن قالى فرحكوا بعد أسبوع طبعاً يا جميله
 هاجى أنا وفارس بس حنان مش هتقدر تيجى معلىش إغذريها أنتى عارفه ظروفها
 نظرت زهره لفارس بدلال وقالت:فارس عاوزه أرتب الهدوم دى في الرف اللى فوق من
 الدولاب بس أنا مش طايله أنت عارف أنا قصيره
 نظر إليها قائلاً:ولا يهكم يا ستى أخلص الكتابه اللى في إيدى وأجى ارتبهملك أنا
 قالت بحب:لا يا فارس عاوزه أرتبهم أنا على مزاجى
 اجابها قائلاً: طيب هاتى كرسى واطلعى عليه ورتبى الهدوم
 قالت بتمعن:لا أخاف أقع من على الكرسى

- أو مال عاوزه إيه
 - شيلنى
 - أشيلك !
 - أيوه شيلنى وارفعنى لفوق لعند ما أرتب الهدوم
 أجابها فارس ضاحكاً: زهره هو أنتى عيشتى طفولتك؟
 قالت فى ضجر:بتسأل ليه
 قال مبتسماً:تصرفاتك بتقول إنك معشتيش طفولتك
 قالت بتذمر:يعنى أنا غلطانه علشان عمال أرتب أنظم في الدولاب بدل ما تساعدنى ولا نلغي
 الدولاب ونحط مكانه عشرين كرسى للهدوم علشان تحط هدومك عليها زى ما بتعمل لما
 تيجى من بره

قال فارس بعتاب:معلىش يا حبيبتي ببقى جاي تعبان
 - أنا بهزر يا فارس أو مال أنا لازمتى إيه أنا موجودة بس علشان راحتك وسعادتك يلا
 بقه مش هنرتب الهدوم
 حملها فارس بين ذراعيه كالطفله وأخذ يناولها الملابس لتضعها في نظام ثم قال:
 - ها خلاص خلصتى أنزلك
 أجابته فى دلال:خلصت بس أنا مرتاحه كده ومش عاوزه أنزل
 إنزلها فارس وجذبها من ذراعيها بقوه نظرت إيه قائله:يعنى بلاش اتدلع عليك شويه



- فارس عاوزه أتكلم معاك في موضوع
- موضوع إيه قولى
- فارس أنا نفسي أبقي أم نفسي أجيب طفل واسميه (زين) ليه كل لما افتح الموضوع ده تقفله
- طيب إيه رأيك نأجل الكلام في الموضوع ده لعند ما تناقش رسالتك قالت في ضجر: ماشى يا فارس
- قالت زهره لوالدتها: عاملين إيه يا ماما لا أكيد هاجى فرح حسن أنا وفارس سلميلى على بابا كتير فى رعاية الله يا ماما
- قالت نورا بحماس: عماد أنا نفسي أخرج خرجنى أجابها بحب: بس كده عاوزه تروحي فين
- نفسي أروح البحر
- البحر
- أيوه يا عماد
- طيب إحنا ممكن ناخذ مركب في النيل ويبقى نروح البحر لما نتجوز بس هنروح علشان نتفرجى عليه بس
- نعم هي الناس بتروح البحر علشان تتفرج عليه ولا علشان تنزل وتعووم
- معنديش مانع بس هتلبسى مايوه إسلامى
- هو في مايوه إسلامى يا عماد وده بيبقى إزاي بقه
- يعنى زى البيجامه كده بس بيبقى وواسع حلو يعنى للبحر
- بيجامه! لا بلاش البحر أحسن حلوه نزله النيل
- صحى فارس باكراً وجدت زوجته مستيقظة نظر إليها قائلاً:
- زهره إنتى صاحيه بدري أوى كده ليه
- انتبهت لقدومة وقالت: فارس أحضرلك الفطار أنا نمت ساعة وقمت علشان أراجع الرساله باقى أسبوع على المناقشه ولازم ابقى ملمه لكل حاجه
- قال فى قلق: زهره عينيكي باين عليها التعب قومى نامى ارتاحى شويه وبعدين قومى كملى
- فارس مش عارفه قلقانه ليه
- اقترب منها ومسك بيدها قائلاً: متقلقيش أنا جمبك وأنتى مخلصه كل حاجه ومرجعينها سوا ليه بقه القلق يا دكتور



- دكتوره
- أبوه طبعاً
- فارس أنا بحبك أوى مجرد ما ببص في عينيك بنسى التعب والأرهاق
- تحسس فارس وجهها برفق وقبلها قائلاً: ادخلي نامى وهصحيكى كمان شويه ونراجع مع بعض مش رايح الجامعه النهارده معنديش محاضرات
- حاضر يا حبيبي
- قالت جميلة فى تدمر: حسن أنت فين لسه في الشغل يعنى فرحنا بعد بكره ومش عاوز تاخذ اجازة
- يا جميله الاجازة واخدها بعد الفرحة شهر هنقضيه مع بعض
- طيب هتيجى إمتى
- بكره الصبح هكون في البلد
- خلى بالك من نفسك يا حسن
- حاضر يا روجي
- وقفت زهرة أمام المرأة قائلة: فارس خلصت لبس ولا لسه
- أجابها بحق: خلصت بس مش عارف أربط الكارفته
- طب هات اربطها لك كل مره بوريلك ومش بتعملها
- مش بعرف أربطها زيك مش بتطلع حلوه وبعدين أنا بحب تربطها لى أنتى
- طيب يلا يا حبيبي علشان نلحق الفرحة
- فأكره يوم فرحنا يا زهرة
- لا كده هنقعد نراجع الذكريات وهنتأخر عاوزة اروح وارجع بسرعه علشان المناقشة بكره.
- نظرت زهرة لجميلة وحسن قائلة: ألف مبروك يا حسن مبروك يا جميله
- قالت جميلة: الله يبارك فيكى يا زهرة أو مال فين فارس
- فارس ببس على بابا وماما وجاى
- مدت زهرة يدها لجميله بعلبه قطيفة قائلة: اتفضلى يا جميله هديه الفرحة
- تسلميلى يا زهرة
- قالت فوزية بقلق: زهرة هتروحو دلوقتى



- أيوه يا ماما إنتى عارفه المناقشه بكره وعاوزه اروح علشان الحق احضر نفسي
متتأخروش إنتى وبابا بكره
- طيب يا بنتى ربنا يوفقك أكيد مش هنتأخر.
أنتهت زهره من المناقشة نظر إليها فارس قائلاً:
- ألف مبروك يا دكتور زهره أخذتى الدكتوراه وبتقدير إمتياز مع مرتبه الشرف كمان
قالت بفرح: الله يبارك فيك يا فارس ده أحلى يوم في حياتى بعد يوم فرحنا
- يلا بقه نروح لأحسن تعبت من كتر الأسئلة اللى اتسألتها في المناقشه
فتح فارس باب منزله ودخل وزهره وراءه وأضاء الأنوار نظرت زهره إلى المنظر المبهر
الذي أعده لها فارس
- بلالين معلقه في السقف ورسومات رسمت على الحائط وسفره معده بالشموع وبجوارهما
تورته مكتوب عليها الدكتور زهره
- نظر إليها وقال: إيه رأيك في المفاجئه دى
قالت فى دهشة: فارس لحقت تعمل كل ده إمتى
- اجابها قائلاً: كان لازم نحتفل بالمناسبة دى يا دكتور زهره
- تعلقت زهره برقبه فارس من فرحتها حملها وأخذ يدور بها في أرجاء المنزل
- كفايه يا فارس لأحسن دوخت
- إنتى تقعدى هنا على السفره وأنا هجهز كل حاجه يا دكتور زهره
جلست زهره على إحدى كراسى السفره ودخل فارس المطبخ كى يعد الأطباق
- قامت زهره لتساعد زوجها في تجهيز السفره حين نظرت إليه من بعيد وجدته يضع حبوب
في كوب العصير صدمت مما رأت ورجعت مسرعه إلى مكانها قبل أن يراها وقد شل
تفكيرها ماذا يضع فارس في كوب العصير ولماذا
- جاء فارس مقاطعاً تفكيرها قائلاً: أتأخرت عليكى
صمتت مخفضة رأسها
- نظر إليها قائلاً: زهره مالك سرحتى في إيه
- هبت واقفة وقالت: فارس الظاهر إنى تعبت بس لما هنام هبقى كويسه
- طيب يا حبيبتي اشربى العصير يوفقك شويه قبل ما تنامى



قالت بحدة:

- معلش يا فارس مش قادره أكل ولا أشرب حاجه مجهده خالص هدخل أنام
همت لغرفه النوم لكن اختل توازنها وسقطت حملها فارس إلى الغرفه ووضعها على السرير
قائلاً:

- زهره اجييلك دكتور

- لا كويسه هنام واصحى أبقي أحسن تصبح على خير

رغم تعبها لم يغمض لها جفن

في صباح اليوم التالي ذهب فارس إلى الجامعه قامت زهره وأحضرت كرسيّاً ووضعته أمام
الدولاب وركبت تبحث في ملابس فارس إلى أن وجدت عليه دواء أخذتها وذهبت تعد
الطعام وانتظرت فارس أمام التلفاز وحين انتبهت لقدم فارس هبت واقفة وقالت: حمدلله
على السلامه يا فارس

قال فارس: الله يسلمك يا زهره عامله إيه دلوقتي محبتش أقلقك الصبح

قالت بجديه: فارس قولتلى نأجل الكلام في موضوع الخلفه بعد المناقشه وخلص المناقشه
خلصت

- فارس أنت بتحبني؟

قال في عجب: أكيد طبعاً يا زهره

قالت بحزم: طيب تعالى نروح لدكتور نشوف المشكله فين

قال فارس: حبيبتي أنتى مستعجله ليه

زهره بغضب: مستعجله يا فارس عدى على جوازنا سنتين وشويه أنت مخبى عنى حاجه

قال فى توتر: لا حاجه إيه اللى هخبها عليكى طيب نأجل موضوع الدكتور ده شويه

قالت بأسى: فارس لما أنت مبتحبنيش اتجوزتتى ليه؟

قال بغير تصديق: زهره إيه اللى أنتى بتقوليه ده

أجابه بحدة: لو كنت بتحبني مكنتش تحطلى حبوب منع الحمل في العصير اللى بتعملهولى
كل ليله ليه كده يا فارس ليه بتعمل فيا كده رد عليا يا فارس قولى أي حاجه

اجابها قائلاً: زهره أنتى أعصابك تعبانه بعدين نتكلم



قالت بحزن: فارس طلقني

فارس بدهشة: زهره قدرتي تقولي الكلمة دي

قالت باكية: فارس بقولك طلقني أنت مبتحبنيش بس اللي مش قادره افهمه ليه اتجوزتني

اخفض رأسه ثم قال: زهره أنا هسيبك تهدي شويه وهروح أزور ماما تكوني هديتي

خرج فارس تاركاً زهره غارقة في دموعها

قالت مديحة بقلق: مالك يا فارس

- ولا حاجه يا ماما
- مالك يا أبني شكلك تعبان
- مصدع بس شويه اعمليلي فنجان قهوة
- حاضر يا حبيبي بس هو أنت أتاخاقت أنت وزهره
- لا يا ماما متخانقناش ولا حاجه.
- أبوه يا حنان عامله إيه تفوهت زهره بهذه العبارة عبر الهاتف
- جاءها الصوت من الجهة الاخرى: الحمد لله يا زهره مال صوتك

- مفيش عندي برد
- ياسمين بنتك عامله إيه
- والله مغلباني يا زهره
- خدي بالك منها ربنا يخليها لك يا حنان
- زهره صوتك مش عاجبني أنتي مريضه
- لا يا بنتي شويه برد هأخذ مسكن وأنام
- سلامتكم يا زهره
- الله يسلمك يا أم ياسمين
- عاد فارس إلى منزله في المساء لم يجد زهره في إنتظاره كعادتها ولم يجد من يخفف عنه
- مشاق يومه كانت زهره تنتظره كل يوم وتعد له ملابسه وتحضر الأكل الذي يحبه وتعطر
- المنزل برائحته الورد وتترين في إنتظاره

بحث عنها في المنزل ولم يجدها وجد ورقه مطويه على طاولة السفره فتحها ليقراً

(زوجي الحبيب أيعقل أن يكون احساسى خاننى حين شعرت بحبك لى لم أشعر بالسعاده إلا عندما التقيت بك لأول مره ونظرت في عينيك سرحت في بحر من الخيال وتحققت أمنيتى



وانتقل من عالم الخيال إلى الواقع وأصبحت أعيش مع محبوبى تحت سقف واحد دائماً كنت ممسك بيدي لماذا تفلتها الآن. انتظرت أن ألقى مبرر لما فعلته كى أسامحك لكنى لم أجد وقع عقلى وقلبى في دائره من الحيره والشك لا أستطيع الخروج منها لماذا طعننتى هكذا ألم تعد تحب زهرتك ألم أعد أنا زهره الفارس اعذرنى لأنى تركت المنزل من دون إذنك سافرت إلى البلد حيث أهلى كى أعطيك فرصه ربما تسرعت في قرارك بالزواج منى أو ربما يوجد سر تخفيه عنى فارس يؤسفى أن أفكر في الفراق لكنى لا أحتمل حقاً لقد دمرت رغبتى في الأمومه.

زوجتك

فرحت فوزية حين تفاجأت بإبنتها على الباب وقالت: زهره إيه المفجأه دى أنتى جايه لوحدهك أومال فارس فين

ما لبست زهره أن رأت أمها وارتمت في أحضانها تبكي

قالت فوزية فى قلق: مالك يا بنتى في إيه فارس مزعلك طيب أهدي طيب واقعدى ارتاحى من السفر.

حزن فارس بعد ما قرأ خطاب زهره خرج إلى الحديقته حيث ورودها الجميله جلس أمامها ينظر إليها في صمت وكأنها تحل محلها وتزيل همومه وحدها زهره من كانت تخفف عنه آلامه كانت كل محنه تحولها ببرائتها وطفولتها إلى منحه لكن محنه اليوم لا يوجد لها حل.

قال مراد لابنته بعتاب: إزاي تسيبى بيت جوزك كده وتيجى من غير ما تقويله إنتى غلطانة

قالت فى عدم تصديق: أنا يا بابا أنت لو عرفت اللى حصل هتعدرنى فارس جرحنى

قال مراد: أنا عرفت كل حاجه أمك حكيلى على اللى حصل أنتى ظلمتى جوزك يا بنتى ارجعى على بيتك

قالت فى حيرة: بتقول إيه يا بابا بعد اللى عرفته بتقول إنى ظلمته

جلس مراد بجوار إبنته وقال: زهره يا بنتى هفهمك كل حاجه مكنش لازم نخبى عليكى بس قبل أي حاجه إنتى مؤمنه بالقدر وربنا هيعوضك

قالت بقلق

- أنا مش فاهمه حاجه يا بابا

أكمل حديثه قائلاً: لما تعبتى وروحتى المستشفى يا زهره اكتشفنا أن عندك روماتزم على القلب والدكتور سألنا إذا كنتى متجوزه وحذر من الحمل نهائى قال الحمل في خطوره على حياتك وأنا ممكن نفقدك وأنتى بتولدى وفارس هو اللى طلب منا منقولكيش يا زهره



وقفت زهره فجأه من على الكرسي تبكي بحرقه قائلة:

إنت بتقول إيه يا بابا يعنى أنا عمري ما هبقى أم وكلكوا كنتوا مخبيين عليا وفارس كمان
كان عارف قبل ما يتجوزنى وضحي بحرمانه من الأبوه

قال مراد: فارس شهم يا بنتى وبيحبك كنت خايف يز هق منك لكنه طلع راجل يا زهره

أصابها الدوار فعادت للجلوس مره أخرى

نظر إليها والدها وقال: مالك يا زهره أنتى تعبتى أجيبلك الدكتور أنا عارف أنها صدمه
عليكى بس ده قضاء ربنا يا بنتى

قالت باكية: بابا أنا وجودى في حياه فارس ظلم ليه أنا عاوزه أطلق من فارس حرام يربط
نفسه بيا طول العمر

قال مراد: زهره متاخدش قرار وأنتى في الحاله دى

قالت بحزن: أنا لازم أسافر لازم أتكلم مع فارس

ربت مراد على كتفها قائلاً: يا بنتى ارتاحى النهارده في أوضتك وبكره الصبح ارجعى على
بيتك وأنا واثق إنك عاقله يا زهره.

استرخت على سريرها تستعيد كل ما حدث في تلك الغرفه من أول لقاءها بفارس إلى تلك
اللحظه مرت الأحداث على ذاكرتها كشريط سينيمائى تلك هي الحياه تعطينا من جانب
وتأخذ من الجانب الآخر

دق باب غرفتها فمسحت دموعها واخذت وضع الجلوس قائلة: اتفضل

- وحشتينى يا زهره أول ما عرفت إنك هنا نزلت من فوق أشوفك

قالت زهره: جميله عامله إيه وحسن عامل معاكى إيه

قالت جميله بفرح: الحمد لله يا زهره مبسوطه أوى خصوصاً إنى حامل وهبقى أم

زهره بدهشة: إنت حامل يا جميله؟

قالت جميله باستغراب: هي طنط فوزيه مقالتلكيش

قالت زهره: ألف مبروك يا جميله ربنا يقومك بالسلامه

- متعرفيش يا زهره الطفل ده غير حياتى إزاي قبل ما يبجى تخيلى أنا بتكلم معاه كل

يوم ونفسي يبجى بقه علشان أشوفه واحضنه



سرحت زهره في كلام جميله وتذكرت أنها لم تشعر بما تشعر به جميله قط

- زهره سرحتي في إيه
- مفيش تعبانة بس من السفر
- طيب هسيبك بقه تنامي وترتاحي يا زهره
- قال فارس حين فتح باب منزلة وجد والدته:
- أهلا يا ماما اتفضلتي
- قالت بفرح: أومال زهره فين يا فارس عندي ليها خبر حلو
- اخفض رأسه محاولاً يداري حزنه قائلاً: زهره سافرت البلد
- سافرت ليه؟
- ولا حاجه قالت أمها وحشتها وراحت تشوفها وهتيجي بكره يا بعده هبقى أكلها
- أعرف هتيجي إمتي
- خسارة كنت عاوزه أقولها الخبر بنفسي
- خير خبر إيه يا ماما
- قالت مديحة بحماس: مجلس الكليه وافق على تعيينها في الكليه وهتستلم الشغل على أول
- الدراسه
- فارس بفرح: بجد يا ست الكل ده زهره هتفرح أوى من زمان مستنيه اللحظه دي
- قالت بود: زهره بنت حلال وتستاehl كل خير بس أنت مالك يا فارس ملاحظه إنك زعلان
- في إيه
- ولا حاجه يا ست الكل ده أنتي فرحتيني بالخبر الحلو ده
- طيب أنت وزهره مش ناويين تفرحوا قلبي نفسي أشوف عيالك قبل ما أموت يا
- فارس
- بعد الشر عليكى يا ست الكل
- يا أبني أنا مش فاهمه إنت ليه معارض الموضوع ده أنت مخبي عنى حاجه
- لا أبداً إن شاء الله يا ماما لما ترجع زهره هشوف الموضوع ده
- ربنا يرزقك بالذريه الصالحه يا فارس.
- قالت فوزية لابنتها: زهره عماد ابن عمك هنا اطلعى سلمى عليه ويلا علشان نفطر سوا
- أومات برأسها: حاضر جايه وراكى يا ماما



خرجت زهره وصافحت عماد قائلاً: عماد أخبرك إيه

اجابها بود: الحمد لله يا زهره إنتى كويسه مالك شكلك تعبان

- علشان منمتش كويس بس
- فرحك أنت ونورا إمتى لسه محددتوش
- الفرح بعد شهر إن شاء الله
- مبروك يا عماد ربنا يتمم بخير
- الله بياك فيكى يا زهره أو مال فارس مجاش معاكى ليه
- فارس عنده حجات مهمه قولت أجى أنا وارجع على السريع
- ربنا يعينه يا دكتور حقه حلمك وبقيتى دكتور فأكوره أول يوم وصلتك فيه للجامعه
- قالت مسترجعة الذكريات: يااااه يا عماد عدى وقت طويل الحمد لله حققت حلمى فاضل بس
- اشتغل وادرس للطلاب في الكليه

- ربنا يوفقك يا زهره

انتبهت فوزية لابنتها حين وجدتها ترتدى ملابسها باكراً وقالت: بتلبسى بدري كده رايحه على فين يا زهره

- راجعه بيتى يا ماما لازم أتكلم مع فارس
- طيب يا بنتى هتسافرى لوحدهك
- أبوه يا ماما

صعد فارس درج منزله المهجور فمئذ أن تركته زهره أصبح بالسبه له منزل مهجور لا روح فيه وأثناء صعوده تسللت إلى أنفه رائحة عطر ماء الورد الذي تعطر به زهره المنزل كل يوم شعر بفرحه عارمه وأسرع بفتح الباب وجد المنزل في هيئه جميله مرتب ومنظم ومعطر وأطباق من الطعام المتعدد وضعت على طاوله السفره كما يوجد شمعدان مشعل في أول الطاولة وأخرها دخل وأغلق الباب وراءه إذ به تفاجى بوجود زهره خلف الباب أول ما وقعت عينها عليه احتضنته باكيه وقالت: أنا أسفه علشان ظلمتك يا فارس ليه خبيت عليها ليه شلت الحمل لوحدهك

مسح فارس دموعها وقبلها قائلاً: دلوقتى بس الروح رجعت للبيت كان مهجور من غيرك نظرت إلية قائلة: فارس أنا فكرت كثير يا حبيبى أنا مقدرش أعيش من غيرك وفى نفس الوقت مقدرش أظلمك معايا اتجوز يا فارس اتجوز علشان تبقى أب



قال فارس في دهشة: زهره إزاي أقدر أبص لزهره غيرك إنتى بنتى قبل ما تكونى مراتى
وحبيبتي

- معاكى بحس إني أب وأخ وصديق وزوج وابن وكل حاجه في الدنيا
قالت بحب: فارس يا حبيبي يهمنى سعادتك أنت مش هتطلقني هفضل مع بعض
قال بحس: زهره متفتحيش الموضوع ده تاني

فرحت زهره لتمسك فارس بها ورفضه أن تشاركها فيه فتاه أخرى لكن لم يهدأ بالها كيف
تنعم بالحياه وتحرم حبيبها من الأبوه فكان لديها حل بديل صحيح أن حياتها الثمن لكن هذا
هو الحب

فمن يحب يفكر دائماً في سعادة حبيبته لا سعادته هو يفرح لفرحه ويحزن لحزنه يتمنى أن
يأتي بالدنيا ويضعها بين كفى حبيبته
قال فارس بتمعن: زهره غمضى عيونك

- ليه بقه؟
- غمضى عيونك يا دكتور
- حاضر يا سيدي أهوه
أخرج فارس عليه قطيفة حمراء وأمسك بقدميها ولف حول معصم قدميها خلخال مذهب
مطعم بالفضه ثم قال: فتحى بقه

- نظرت إلى قدميها في دهشة وقالت:
- الله خلخال كان نفسي فيه من زمان ربنا يخليك ليا يا حبيبي
قال بغيرة: الخلخال ده يتلبس في البيت يا دكتور

قالت متفهمة: طبعاً يا حبيبي هو في دكتوراه بتخرج بالخلخال قولى بقه إيه مناسبه الهدية
الجميله دى

نظر إليها مبتسماً وقال: المناسبه أن الدراسه هتبدأ خلاص وإنتى اتعينتى في الكليه وهتبدأ
تدرسى للطلبه يا دكتور

قفزت الفرحة لقلبها وقالت: بجد يا فارس ده أحلى خبر سمعته يا حبيبي اقتربت منه وهمست
في أذنه قائلة: يا بسمه أرتسمت دوماً على شفاهي يا قلبي لا ترحل عنى ماذا أريد من العالم
وأنت بجوارى فأنت قلبي.



وقفت زهره أمام المرآة ترتدى ثيابها في فرح فالיום هو أول يوم لها بالجامعة ارتدت جيبه
بيضاء وبلوزة بنفسج وجاكت أبيض ووضعت البروش الذي أهداه لها فارس ولونت حجابها
بنفس الألوان

أحاط فارس خصرها بيديه قائلاً: إيه الجمال ده يا دكتور زهره انا نازل معاكى

وضعت يديها فوق يديه قائلة: بجد يا فارس أنت نازل معايا

اجابها بحماس: طبعاً نازل وهحضر أول محاضره ليكى هقعد مع الطلبة في المدرج وأقعد
اتفرج عليكى وأنتى بتشرحى

دخلت زهره المدرج تذكرت أول يوم جاءت فيه إلى الكلية حيث كانت طالبة اليوم هي
دكتور فحين يتحقق حلمك تصبح صديق للطبيعه في بهجتها.

علم النفس الإجتماعى يهتم بكثير من الموضوعات الإجتماعيه بما فيها الإدراك الإجتماعى
كما يتبنى الخطوات المنهجيه في فهم السلوك البشرى على النحو التالى:

الفهم، التنبؤ، التحكم، هنتكلم فيهم بالتفصيل المحاضره القادمه وبكده تكون انتهت
المحاضره.

قالت زهره بترحاب: اتفضلى يا طنط مديحه

قالت مديحه بفرح: حمدلله على السلامه يا دكتور زهره أخبار الكلية إيه

- تمام يا طنط متتصويش فرحتى النهارده كانت عامله إزاي ثوانى يا طنط أقوم أجيبك
حاجه تشربها

قامت زهره من مكانها ذاهبه إلى المطبخ شعرت بدوار وسقطت مغشى عليها

جرت عليها مديحه تتحسس وجهها قائلة:

- زهره زهره مالك يا بنتى.

قال مديحه لفارس فور وصوله:

- فارس يا حبيبى أنت جيت عندى ليك خبر هيفرحك أوى

قال فارس فى شوق:

- خير يا ست الكل

قالت بفرح: مبروك يا حبيبى زهره حامل هتبقى أب يا فارس



تفاجئ فارس مما أخبرته به والدته وقال بغضب: إنتى بتقولى إيه يا ماما إزاي ده يحصل يا ماما زهره فين

قالت بعدم فهم: في إيه يا فارس أنت مش فرحان ولا إيه
قال بغضب: زهره فين يا ماما

- جوه يا أبني بترتاح شويه
قبض فارس على ذراعى زهره بقبضته قائلاً: ليه عملتى كده يا زهره الطفل ده لازم ينزل
قالت زهره باعتراض: أنا مش هقتل إبنى يا فارس
فارس بخوف: إنتى كده بتنتحري يا زهره ليه عاوزه تسيبيني لوحدى في الدنيا وتمشى
وضعت كفها على وجهه برفق قائلة: الأعمار بيد الله يا فارس ومكنش ينفع أحرمك من إنك
تكون أب وأحرم نفسي من الأمومه
قال معاتباً: ومين قالك إنى عاوز أطفال يا زهره

قالت بإمتنان: استهدى بالله يا فارس الدكتور صحيح فاهم وعارف بس ميعلمش الغيب غير
رب العالمين ليه بتقدر إنى هموت ليه متقولش إن ربنا هيؤمنى بالسلامه أنا وابني وإذا
كانت حياتى مقابل حياه إبنى فهيبقى حياه إبنى أولى أنا عشت حياتى هو لسه مشفش الدنيا أنا
عشت أعمار معاك مش عمر واحد يا فارس علشان اللحظه بقربك تساوى سنين ملهاش عدد
والنظرة في عيونك أغلى من كنوز العالم.

قالت مديحة فى حزن: لا حول ولا قوه إلا بالله إزاي يا فارس تخبى عنى حاجه زى دى
قال فارس بألم: غصب عنى يا ماما
قالت محاولة طمئنئة: اللى حصل حصل يا فارس أملنا في ربنا كبير خلى ثقتك في الله قوية يا
ابني إن شاء الله تولد وتقوم بالسلامه

- يا رب يا ماما
قالت زهره معترضة: لا يا فارس مش هأخذ اجازة من الكليه لسه بدري على معاد الولاده
قال فارس برجاء: لو مكنش علشان خاطرى علشان خاطر زين يا أم زين
قالت بنشاط: حبيبي متقلقش على زين ولا على أمه لما أتعب هأخذ اجازة.
نظر مراد لزوجته قائلاً: مالك يا فوزيه بتبكي ليه



قالت بخوف: خايفه بنتى تروح منى يا أبو حسن

قال مراد: فوضى أمرك لله بنتك عملت كده علشان خاطر فارس عرفت إنها ممكن تموت وهي بتولد ومهمهاش ضحت بحياتها علشان فارس لازم كلنا ندعيها الدعاء بغير القدر يا فوزيه ادعيها ليل ونهار تقوم بالسلامه

كان فارس يستيقظ من نومه كل ليله قبل أذان الفجر ليصلى ركعتين قضاء حاجه داعياً الله أن يحفظ له زوجته وابنه

صافحت حنان صديقتها قائلة: أنا جيت أشوفك عرفت من أحمد إنك تعبانه

قالت زهره بإرهاق: ادعيلي يا حنان أقوم بالسلامه

- إن شاء الله يا زهره ليه بتقولى كده

لم تخبرها لا تريد أن تشرك صديقتها في الخوف عليها يكفي فارس وأهلها

- مفيش يا حنان علشان بس أول مره مجبتيش ياسمين معاكى ليه

- سيبتها نايمه مع حماتى وجيت اطمئن عليكى هو الدكتور قالك ولد ولا بنت

- ولد يا حنان

- طيب هتسميه إيه

- هسميه زين

- إسم جميل والله

قالت مديحة: زهره أنا عملتلك إجازة من الكليه معاد ولادتك قرب ولازم ترتاحى

- حاضر يا طنط

استيقظ فارس وقام بإعداد الفطار لزوجته وبجواره باقه من الورود الجوريه وأيقظها قائلاً:

- زهره يلا قومى علشان تفطرى

قالت فى دهشة: فارس إيه ده أنت اللى حضرت الفطار

قال فارس بحب: من هنا ورايح أنا الطباخ الخصوصى بتاعك ولازم نسمع كلام الدكتور.

بعد مرور عدة أشهر

ظل فارس يسير ذهاباً وإياباً فى طريقة المستشفى

اقتربت مديحة منة وربت على كتفها قائلة: أهدي يا فارس دلوقتى الدكتور يطلع ويطننا

انتبه فارس لخروج الدكتور من غرفة العمليات جرى نحوه مسرعاً



لاحظ الدكتور قلقة وأردف قائلاً: مبروك يا دكتور فارس جالك ولد زى القمر

فارس مسرعاً: وزهره يا دكتور

أجابه فى عجب: الحمد لله بخير احمد ربنا الحالات اللى زى حاله مدام زهره نادراً ما بتعيش لكن ده كرم كبير من ربنا تقدر تدخل تظمن عليها

نهض فارس نحو زوجته وقبل يدها فى فرح قائلاً: زهره حمد الله على سلامتكم يا حبيبتي قالت بهدوء: فارس

قال فارس والدموع تتساقط من عينة من الفرحة: الحمد لله ربنا استجاب لدعائى وحفظك ليا قالت زهره فى قلق: وابني يا فارس ابني فين

أجابه قائلاً: متقلقش ابننا بخير

قالت فى شوق: عاوزه اشوفه يا فارس نفسي احضنه واشم ريحته

احتضنت زهره صغيرها بين يديها وتحسست وجهه قائلاً: شبهك يا فارس ثم نظرت إليه وأكملت

فارس ربنا كرمنى وحققلى أحلامى حلم الدكتوراه والتدريس في الجامعة الحلم اللى جيتله من الشرقيه للقاهره من سبع سنين وحلم زواجى بفارس الاحلام اللى هو أنت يا فارس وحلم الأمومه ابني زين أنا فرحانه اوى ونفسي أقول لكل الناس تحلم وتُصر على أحلامها هتتحقق فكل منا حلم يولد من فكره منا من يقضى عليه قبل مولده ومنا من يحلق في الفضاء يسابق أسراب الطيور كي يحول حلمه من عالم الخيال إلى عالم الواقع في أيدينا جميعاً نسابق أسراب الطيور حينئذ يصبح النجاح حليفنا .

تلك هي حكاية زهره الفارس .

تمت بحمد الله ..

بقلم

عبير صالح



فهرس

م	العنوان	رقم الصفحة
١	الفصل الأول	٥
٢	الفصل الثاني	٣٦
٣	الفصل الثالث	٨٠
٤	افصل الرابع	١١٧





كُنّا نَحْسِنَ لكنْ هُناكَ حُشَقٌ يَنْتَهِي بِمَجَرَدِ لِسْمِهِ هَوَاءٌ تَمُرُ حَظِيهِ
تَقْتَلِمُهُ مِنْ جَنُورٍ هُوَ هَنا كَمُحْشَقٍ يَخْلُدُ حَتَّى وَإِنْ مَرَّ حَظِيهِ عَوَاصِفُ
وَزَلْزَلَةٍ لَكُلِّ قَلْبٍ حَكَايَتُهُ وَلَكُلِّ حَكَايَةٍ بَدَايَةٌ وَنَهَايَةٌ رِيْمَا تَكُونُ النِّهَايَةُ
مَوَاقِفَ لَكِنْ لَكُلِّ نِهَايَةٍ مَوَاقِفَ بَدَايَةٍ جَدِيدَةٍ .

